

耻堂存稿

高斯得

文硕阁

wenshuoge.com

目录

关于我们	3
提要	5
原序	6
耻堂存稿卷一	7
耻堂存藁卷二	18
耻堂存稿卷三	28
耻堂存稿卷四	34
耻堂存稿卷五	44
耻堂存稿卷六	57
耻堂存稿卷七	70
耻堂存稿卷八	78

版权声明

本书版权保护已经过期，属于公版书！并由"文硕阁"网站的用户制作并发布于文硕阁 网站内,请大家在“合理使用”范围内使用

这本电子书可供中华人民共和国（the People's Republic of China）和世界上大多数其他地区的任何人免费使用，几乎没有任何限制。您可以根据本文件中包含的"传硕公版书许可条款"中的授权许可进行复制、赠送或改编它。

如果您不在中华人民共和国，您必须在使用本电子书之前查看您所在国家/地区的法律。

什么是公版书？

根据我国现行「著作权法」第 20、21 条的规定，除署名权、修改权、保护作品完整权外，中国公民对其著作的法定权利均于作者死亡后第五十年的 12 月 31 日截止。超过著作权法保护日期后，其作品就进入了公有领域（公共版权）

这种因作者死亡超过 50 年而丧失发行权、改编权等著作权利的书籍，就称为“公共版权书籍”，简称“公版书”。

传硕公版书保护计划

中华文明5000多年绵延不断、经久不衰，在长期演进过程中，形成了中国人看待世界、看待社会、看待人生的独特价值体系、文化内涵和精神品质，这是我们区别于其他国家和民族的根本特征，也铸就了中华民族博采众长的文化自信。

文化是一个国家、一个民族的灵魂。文化兴国运兴，文化强民族强。

所以我们发起了公版书保护计划。来帮助把中国五千年的文明硕果进行电子化并服务于大众，我们网站所有内容都是免费、自由、无版权的。对所有的读者免费！

使用 **文硕阁** 中的公版书 不需要获得许可（在中国，这属于“合理使用”）。这适用于所有用途，包括商业用途。换句话说，即使是商业盈利用途，也无需支付版税。

我们希望能有更多的用户加入到文硕阁网站中来，让我们一起来保护传承文明的硕果。

源浚者流长，根深者叶茂。文化自信是一个国家、一个民族发展中最基本、最深沉、最持久的力量。

如何联系我们？

网站：www.wenshuoge.com

邮箱：7sbook@duck.com



(扫码访问网站)



(扫码加客服微信)

提要

【臣】等谨案耻堂存稿宋高斯得撰斯得字不妄邛州蒲江人绍定二年进士李心传辟为史馆检阅迁秘阁校勘累官端明殿学士签书枢密院事兼参知政事为留梦炎所搆罢官予祠宋亡隐居苕霅间而卒事迹具宋史本传斯得父稼端平间知沔州与元兵战歿斯得能以忠孝世其家其立朝謇谔尽言惟以培养国脉搏击奸邪为急务理宗至称为硬汉本传所载论奏凡十余事多当时切要之图今集中所存奏防仅及十篇与本传相较已不能无所遗脱然其于宋末废弛欺蔽之象痛切敷陈皆凜然足以为戒其书事诸篇防所亲歷纪录真确尤足以裨宋史之缺佚至其生平遭遇始沮于史嵩之中厄于贾似道晚挤于留梦炎不得大行其志举凡悯时忧国之念一槩寄之于歌诗虽其抒寫胸臆间伤率易用韵亦时欠检防而感懷纪事要自有激昂沈鬱之观如西湖竞渡三丽人行诸首俱可补奸臣传之所遗雷异鸡祸诸篇亦可增五行志之所未备征宋末故事者得是集而参考之其洵足称诗史矣案本传载斯得所著有耻堂文集行世明叶盛菴竹堂书目亦有耻堂集七册而皆不言卷数其后遂亡佚不传藏书家罕有著录厉鹗撰宋诗纪事采摭极博亦无斯得之名今从永乐大典各韵中掇拾排次厘为文五卷诗三卷用存其槩而仍以元龚璘原序冠之于前至乐语三首体近俳优殊非正格今以原集所有姑附录卷末而于刊本则并从删削焉乾隆四十二年三月恭校上

总纂官【臣】纪昀【臣】陆锡熊【臣】孙士毅

总校官【臣】陆费墀

原序

宋季权臣柄政类恶直丑正故其贤人君子不得安于朝廷之上放弃江湖之间若耻堂高公尤为时所媚嫉而天下后世以其人不用为恨者也公鹤山先生魏文靖公外兄之子早年试防闱奉大对受告君指要于叔父终其身防敢坠淳祐间繇学省以论时政诋斥嵩之既而儉腐相仍取败者益甚屡以秘监召不起竭思诚辞根极事机寤寐矢之未尝防其私晚与庙议殫似道以快人神之愤更以不容去位而亦无可为者矣遯迹雪川饥不复疗时则藩翰如刘伯宣夹谷士常求一识面惟耆成人知训至今人两贤之公之仲子纯彦韩孺甫居吴中与予同里巷者二十年窃获闕所著述易诗皆有說诸史有抄杜佑通典有增损若孝庙实錄则尝秉笔太史氏卒就遗编以自靖献者也韩孺没二子防徃之钱塘闻其客授以养母不坠家传去年以书来曰吾祖存藁尚论之士仪图之若诗篇奏防已刊摹若干卷子实知吾家世盍叙其梗槩焉予拜受而敬赞曰廩廩乎屈原之离忧恳恳乎刘向之先见不幸而无一不验矣先生之志亦足悲夫先生蜀人也坡公当熙丰变法时显讥深刺犯难而不顾亦独何心在当时君相犹或感悟耳迨崇观后倡为丰亨豫大之說雷同一声岂无君子岂能忘其君进而諫之孰其从退而讽切孰其聽哉沿今以遯古王者之迹熄而诗亡诗亡而春秋作要不过使人无以致其忠君爱国之心于是家国天下随之耳呜呼昔吾先正其言明清即其所传有關於人心世道之故人能不兴起于是乎盖名山之藏次第出矣龚璘序

耻堂存稿卷一

宋 高斯得 撰

奏防

轮对奏劄

臣顷者防恩共贰礼闱每惟此官盖古宗伯之属以佐掌邦礼为务职分所系至为不轻故尝日夜深思欲于簠簋俎豆升降周旋之外求有补于国家之大政者而得其说敢为陛下陈之夫礼者何也天之经地之义君人之大柄天下之大闲而禹汤文武成王周公之所谨以守其国者故三代盛时纪纲森严法制明备尊卑有分贵贱有别车服物采各有等衰天下之人日由乎规矩绳墨之中而不敢逾越以故民志一定祸乱不生凭借维持至于数百年之久用此道也周室既衰礼制大坏汉继之扫灭无余末流之 习俗薄恶民人抵冒诸侯骄横而汉法不得行外戚颺恣而大臣不得制宦寺放纵而朝廷不得治汉之宗社遂以陵夷此贾谊仲舒王吉刘向之徒所以发愤慨叹而孜孜于述旧礼明王制以救之也我国承五季衰乱之余知天下之祸败原于礼制不立故创业之初立纲陈纪为万世法先儒程颐论历代之礼独以为本朝大纲甚正而司马光亦为大宋受命太祖太宗能立礼之大节是以百年之间教化兴行臣民轨道凡汉氏藩臣阉戚坏国防家之事一皆无之制度纲纪如此圣子神孙世世持循而弗失可也然臣观自顷以来祖宗典则之旧浸以隳废坏法乱纪之风渐不可制窃为陛下忧之宫邸无故而妄求进秩不问也嬖宠恃恩而豪夺人田不问也戚畹 埋过于侈汰以溷有司不问也宦寺怙势颐指气使驾朝使而倾之不问也而宗藩之横则又甚焉有纵恣輿台囊橐巨盗而邀求内批以免死者矣有嗾使僧卒伐人宰木而躏籍官吏以求胜者矣凡此数端奸礼犯义在崇观政宣之间固不以为怪而隆兴干淳之世则未必有也陛下其可恬然视之而畧不加警乎且上之人既已决隄坏防而聽其所趋矣而台諫侍从给舍之臣复无一人敢逆遏其横流至于都司少有抵牾则加以无君之罪不旋踵而逐去其于圣德能不亏损乎恃恩犯法之徒能不踊跃而攘臂乎政和间諫官黄葆光上防请裁抑省吏朝廷方为施行忽降御笔手诏云于丰亨豫大之时为五季衰乱裁损之计诏下葆光移符寶郎堂后官醵钱入寶篆宫作千道斋以报上恩自是省吏之横不可复制臣谓今日事虽不同而纪纲陵迟豪猾得气无以大异政刑俱失遠迹效尤无怪乎民挺于敝攘吏肆于豪夺而畧无忌惮也臣愿陛下思圣人为国以礼之训而致行之法三代之所以得监秦汉之所以失力守祖宗之法度痛抑亲昵之私情毋使凭借扶持之地日寻斧斤以至于衰乱而不可反宗社之忧其犹可及救乎臣以礼为职言之及此不识忌讳惟陛下恕其狂僭

秋八月壬午大阅防

臣闻有国者武备为急必申儆而讲肄之然后国威奋扬兵力坚勇以守则固以战则克此保民守国之常道不可废也然有其时焉故曰三时务农一时讲武盖必于农隙而为之也周礼仲冬教大阅所以简军实修战法辨旗物飭车徒其礼比春之振旅夏之茆舍秋之治兵最为

详备此三代立武事之正法也春秋之时周官虽废而鲁周公之国也其礼故在威公所当谨守其法以为保民守国之道而乃以盛夏之时行大阅之礼周之八月夏正之六月也是月也神农持功毋起大役此岂劳民动众以阅武之时乎春秋书之言其非时也程颐春秋传曰无事而为妄动也有警而为之教之不素何以保其国乎斯言尽之矣臣尝因圣人言论而考诸祖宗之所行孝宗皇帝修攘之事何其与春秋若合符节也茅滩白石大阅禁旅亲乘戎路以临之者凡再驾焉穡人成功顺动以时旗帜精明戈甲焜耀师武臣力士百其勇而又命两淮忠勇诸军率以十月聚教于官官给钱米莫不踊跃奋厉思敌王忼当是时内外武备修饬如此何其盛哉陛下上绳祖武修攘之政固无不举然迩年以来疆场多虞士气未振岂所以激昂而鼓舞之者有未至欤臣愿陛下以孝宗皇帝励志戎昭为法申儆将帅毋或忘战废备使国威一弛殊隣逖愴襄汉之清日月可冀矣惟陛下留神幸甚

上言学校疏

臣伏见陛下迩者加惠三学既颁奎章以责儒官复命学官公举经明行修气节之士圣意所属昭如日星中外方鼓舞踊跃以诵圣德乃闻忽以小过上触霆威至烦御笔特申警戒天语峻厉闻者怛焉虽其不自爱重颇孤奖励之意然以醉饱罪人恐非盛世之事议者皆谓圣度天宽本无诃问之意特一二邪臣【原注陈司业振孙】受托权奸欲为报仇故乘机激怒而为此耳尚赖圣明曲全事体释而弗竟不然岂不动摇局面而堕小人之计乎夫政教未更之初明伦一疏为羣言之首国家否泰剥复之机实嘉赖之何可泯没自尔以来指陈时事类自切中师儒毒死则白发邪党之阴谋讼狱诞谩则显斥小人之奸状御史非人则夜草扣阁之疏而求力争直士遭摈则亟貽光范之书而求反命凡皆以维持国是摧拉奸萌其有功国家如此纵有大过犹当加宥况区区杯酒之失哉且自昔人臣虽有大罪上之人犹迁就而为之讳如曰簠簋不饰帷薄不修固未尝斥言之也今明诏自亲其文曾不少加覆防岂所以令众庶见乎臣愿陛下以学校为重录其大节弃其小过毋听邪人溢恶之辞遂生厌薄摧挫之意庶几多士气节犹可保全小人闻风知所畏惮其于国家大体诚非小补臣之职业颇关学校故敢缕缕言之惟陛下择焉

应诏上封事【原注淳祐六年正月时为秘书郎】

臣窃惟日食之灾固非小变其在今日尤为非常盖以岁言之则适在丙午国家阳九之防也以月言之则是谓三始前代之所恶也以日言则朔日辛卯诗人之所丑也防裁参防厥咎已彰况未食之前暋阴累日霁于一朝谴告晓然不啻面命既食之后余分逮闇光不及还诹之羣言良非美兆陛下克谨天戒若稽旧典豫思所以饬躬正事防塞大异者罢元防而不讲避正衙而不御却寿觞而不举复下明诏敷求尽言圣心忧劳羣下震恐臣幸以虚薄备数周行懷欲效愚从矣敢不奉诏而悉陈之臣伏覩陛下斥去魁孽更新大化以来夙夜刻厉欲以惩革曩改纪庶政非不至也然行之逾年课其成效茫若捕风系影曾未有以小慰海内之望臣窃惑之大奸嗜权巧营夺服将以遂其三世执命包藏睥睨之志陛下惕然觉悟奋独断而退罢之是矣諫宪之臣交防其恶或请投之荒裔或请勒之休致或议夺其麻而壞之陛下苟行其言亦足以昭示意向涣释羣疑顾乃一切寝而不宣歷时既从人言不置然后黽勉传谕

委曲诤奸俾于褒绶之时妄致挂冠之请因降祠命苟塞人言抱拥存全如防拱璧夫以蔡京之去俾之谢事又削其十一官而谪之杭州凡有乡里姻娅比为死党者如宋乔年叶梦得林摅之徒悉皆逐去不得亲近人谓上意坚定不可回夺矣曾不三年复还相位穷防极恶以阶政宣之祸今罪与京埒而罚不伤其毫毛又有奸人贪其重贿忧其甘辞于密勿之际日夜乘间伺隙而陰为之地焉是以讹言并兴善类解体谓圣意之难测而大奸之必还莽卓操懿之祸将有不忍言者臣窃为陛下凜凜也皇嗣未建国本从虚顷岁以来言者唇腐齿落不知其几防矣陛下始而玩中而疑终而讳焉英宗之选育也仁庙春秋二十有六孝宗之选育也高庙春秋二十有五虽未正名号而圣意固已定矣陛下之年视二祖何如也顾优防不断未有专属非玩坎羣臣立长之论虽涉乎嫌然皆发乎忠诚非有他也而陛下深怪其說非疑坎近者一二小臣论奏及此窃闻宣谕宰执咎进言之烦非讳坎自顷以来诸臣杜口矣日愒月迈罅隙不涂安知无如定陶赂遗后宫求为汉嗣者天下祖宗之天下也陛下受之将以传诸万世其可牵于私系而不以大公至正之心早正而素定乎大臣者贵乎以道事君者也今也献替之义少而容悦之意多知耻之念轻而患失之心重内降所当执奏也则不待下殿而已行滥恩所当裁抑也则不从中覆而遽命揣上之不严于絶恶也则进其余党而尝试意上之追仇乎尽言也则择其甚者而排诋嫉正而庇邪善同而恶异任术而诡道乐媮而憚劳凡其过失见于羣臣之论奏者固已不少陛下暮年之问虚心委寄所责者何事而其应乃尔无怪乎望治之勤而收效之迟也台諫者所以主持公是者也祖宗之时言入輒行无所回挠将以养其气也比日以来厌其强聒求以箝之乃有所谓宣谕者焉权凶逸罚交章请罪则谕止之扈带私授抗防论列则谕止之且陛下以此官为何官耶盖明目张胆立于殿陛以与天子争是非可否者也顾可谕止之乎谕之其可止乎王十朋有言绍兴末台諫奉行天子风防有宣谕使言者有宣谕不得言者台諫之职言不行则去其可受宣谕乎臣谓今日之病何以异此摧其气挫其鋭则精神风采亦日销月铄而已矣陛下果何便于此侍从者所以论思献纳补阙拾遗者也祖宗以来搜览俊乂列布禁涂朝廷一有阙失言语议论之臣交唱迭和图惟正救是以事无过举今也班联寥落虚位孔多职业隳废气象衰 国有大事言之而无助争之而无党政之多牴抑此之由谓当世之士果无足以充是选乎则极论纲常一斥不复者其人也执宪端平拚除非类者其人也防陈三渐力排阉戚显劾二奸肃清宫禁者又其人也若此数人汉庭公卿孰有出其右者诚能聚之本朝岂不足以折羣邪而夺之气今也或弃之而不召或召之而不力天子严憚而不复简记大臣观望而不敢荐延望实之不收乃徒谓人才乏使而目前之苟以充数岂可厚诬哉刑赏者国之纪纲也赏公则人知劝刑肃则人知惧人主所以御天下者惟此二柄而已其可使之私且防乎贵介怙亲第赏重复西垣驳正遂非不省恩旧干泽污玷郎闈 闕徒归而终置不问赏不私乎近臣毒死谋出权奸国人户知贼岂难得发奸擿伏者非但失职又囊橐之典狱讫威爰书诞谩勅榜挂壁迹捕渺茫朝廷弗竟也三凶流窜令非不严乃有廋伏近畿狎玩国法州郡故纵曾不谁何搢绅传言相与愤惋舜之流四凶族曾不如此刑不防乎兵财者国之大政也治兵莫大于谋帅理财莫先于节用淮阩巽懦擢自权奸趋向既邪缓急难倚今纵不能选威望臣以代之见大夫之中岂无可任迁延歲月重于易置岂非忧邊思职者之过乎敌窥南徼事已数载邊臣交奏日骇聽闻夫敌之往复误我者久矣而庙堂之上将信将疑应接常缓飭兵卫峙糗粮结邊丁抚部落繕障塞明斥 非知兵者不能办也乃蹈常袭故不急择才臣以畀之万一邊境不支北骑奄至自岭以南无复横草之备乃骇而图之岂将有及乎军政之阙孰大于此国家版图数年以来荡析几半承平

用度不损圭铢譬如衰败之家产垂尽而费如昔虽不困不可得已遑陲从戍馈饷日繁盐滞楮穷国计大屈此何时而土木不休好赐无艺白鹤新宫斧斤之声未绝师臣赐第版筑之役将兴闻之道路又谓宫掖之间按明禋之旧比贡币帛于版曹贡篚之地既虚至乃辍移他帑以应命由是而推横费侈用外庭所不得知有司所不得防者可胜道哉邦财之蠹孰大于此陛下临政愿治非不焦劳而如前所陈无一嚟志可不思其故欤盖自端平亲政以来号曰更化者屡矣然其所谓更化者不过下一诏书易一宰相而已至于大化之本關乎气运之盛衰治道之隆替当更而不更者则固未之思也本者何非陛下之心乎陛下未明求衣寒心销志见于视朝聽断之时亲近儒臣询访得失见于防夏从容之际虽尧舜之兢业文武之忧勤不是过也然间阎小人妄议圣德或为谨独之地立意之未诚燕闲之时窒欲之不固货利蚀吾之明者也而不殖之戒未严大奸觊还私献络绎相位偶缺多藏交营君臣之间相覲以货相赂以利此桓灵污浊之事岂盛世所宜有哉至于便嬖侧媚之人所以荧惑耳目惑移心意者尤足以为清明之累腐夫巧譖而保傅防摇妖防外通而潜开邪径陰奸伏蛊互煽交攻陛下之心至是其存者几希矣夫陛下之心大化之本也不于是乎洗濯磨淬力思所以更之乃徒立为虚言亡实之名而谓之更化此天心之所以未当而大异之所以示警也虽然是心之非更之虽在陛下而格之在臣陛下断自宸 并建二相所以责望之者特簿书期防之故钱谷甲兵之间而已绳愆纠缪陈善闭邪盖将以为澄源端本之地也舍是不图而汲汲于末流岂足以为贤相哉必定立国本如韩琦挟孔光传以悟上心而犯顔逆指非所惧必决去小人如司马光所谓天若祚宋必无此事而挑怨蹈祸非所恤必止绝内降如杜衍之积至数十连封面还必裁抑嬖幸如陈俊卿之面质上前力去渊覲其能及乎此也则陛下以此望之庶于言动造次交警迭规涵養薰陶潜感密悟必使人主一嚟一笑之间无往而不中其度焉夫如是而后大臣之责尽大臣之责尽而后陛下之心正陛下之心正而天下之事始可次第而理矣孟轲曰君子之过如日月之食人皆见之及其更也人皆仰之陛下诚能销变弭殃以彰更化之盛则孟轲所谓更者盖亦反其本矣臣西南寒儒顷以庚子冬雷应诏上封事乞陛下择才并相以是忤史嵩之流落三年不自意得逢陛下更新大化再玷周行目睹歲旦日食之异敢不奉明诏吐其狂愚狂瞽干诛惟陛下幸赦

直前奏事【原注淳祐十二年七月峕以秘书少监兼侍立官】

臣待罪蓬山碌碌无补陛下过聽擢之摄承记注辞不获命日夜思维所以称塞者就列之初适观国家有非常之异职分所在敢不皇皇汲汲即为陛下言之臣窃见六月以来饶州衢婺台处严陵建寧南劍邵武诸州同时大水败壞官寺屋庐流杀人民以千万计父老咸谓数十百年所无此非小变也陛下可不惕然警惧推原致之之由求以防塞之乎臣观汉儒言灾异谓有某事则有某应皆为必然之理故人或不之信然本朝大儒程頤苏轼朱熹为感应之理甚精其說不可尽废废之则人主忘警戒之心臣今采摭汉儒所论水灾之应驗诸当世行事盖真有若合符者试枚举而陈之汉儒谓政令逆时则水失其性雾水暴出百川逆溢壞鄉邑溺人民今盛夏之月土木横兴毀彻民居妨夺农务穷昼极夜不得休息百姓以其愁苦之气薄陰阳之和感天地之精致异招灾莫大于此举动逆时如此水安得而不应乎汉儒谓辟遏有德厥灾水水流杀人說者谓辟君也人君壅遏有德使不见用则水灾应之今在外之臣固有尝嬰逆鳞一斥不复者有显劾权奸人而不召者当侍从卿监班列一空之际悉招徠之以

补处可也而宿疑未化开悟惟艰至于诏防所趋命召所加则不过一二朋邪贪刻之人而已有德壅遏如此水安得而不应乎汉儒谓道人始去涌水为灾道人者有道之人也今陛下招延众人列于有位天下方以庆历元祐之治望之而因以小人轻蔑学校使师儒望士力争而去若不甚惜比日以来复闻有小人欲防正臣以变时事者一网尽去有其兆矣善类孤危如此水安得而不应乎汉儒谓诛罚绝理厥灾水其水也雨杀人今陛下宽仁出于天性而草茅扣阍或触黥之辟事为创见闻者惊疑至于州县之间冤狱孔多而辅郡杀士尤其著者道路流传莫不切齿内外台臣以其肺腑噤莫敢言陛下深居九重亦尝知其事乎乃若诛罚所当加者莫垓荣若也则反拥防存全不伤毫髮刑罚绝理若此水安得而不应乎汉文帝后三年蓝田水出流九百余家壤民室八千余所杀三百余人汉儒谓是时匈奴犯北边杀畧万余人故有水灾之应往歲之冬防入淮西大掠而去其所杀者奚翅万人创残之余民气破伤官吏侵渔冤苦无告边民失职如此水安得而不应乎元帝永光五年大水壤乡聚民舍及水流杀人汉儒谓是时帝违古制刑臣石显用事故有水灾之应比年以来刀锯之余气焰日炽士大夫无耻者赴壑投林倚为内主而郡邑琐细之讼亦复渔猎以瀆圣聪发命不衷吏道多杂职此之由刑臣用事如此水安得而不应乎凡此六者非臣臆說质之往牒考之时事信而有证至不诬也陛下安得视为偶然而不急图所以销弭之乎今避殿减膳罪已求言既寂无闻所以宽恤诏书辞气平缓殊无哀痛惻怛之意二府引求归政之虚文犹不知改至于处置救灾恤难之事若存若亡未闻有慨然以纳沟由溺为己责如救头目然而图之者此臣之所以甚惑也程颐有言天地之间有感必有应所应复为感所感复为应今灾变如此忽而不图臣恐感应反复殆无终穷不至于大伤败不已况陰盛阳衰昭然兵革盗贼小人将起之证而于五胜之运犹我国家之所甚恶者乎臣愿陛下深思天戒采用臣言亟下求言之诏博求塞异之方必先罢新寺土木必速反忤旨诸臣必遏絕邪說主张善良必慎重刑辟爱惜士类必加惠边民救其死亡必抑遠幸臣絕其干挠信能行此六者不惑不疑则天怒庶乎其可回和气庶乎其可召矣虽然臣复有愚见懷欲吐露已从今天时人事如此其敢复有隱忍不为陛下言之臣观汉成帝时灾异至众刘向告以销弭之术始终不过以和为言其论治世之事曰众贤和于朝万物和于野朝臣和于内万国驩于外曰诸侯和于下天应报于上其论衰世之事曰幽厉之际朝廷不和祸殃自此始曰朝廷胶戾乖刺灾异数见盖反复言之至为深切而又以和气致祥乖气致异之說终焉若向者亦可谓能销弭灾异矣今陛下更新大化励精思治所望于二相者何如也協恭和訓戒勉厉非不淳切柰何纖芥之隙不杜佩剑之风浸成防人交乱其间将至不可复合夫辅佐人主燮理陰阳何等职分顾不以臯防济济相逊者自勉而甘心于衰世背戾之风然则乖气致异涌水为灾二相安得不自任其咎乎臣愿陛下因天灾之可畏明以利害申諭二相使之各弃细故戮力一心以济国事以回天意二相和则众贤和众贤和则万物和如此而犹有变异以为明主之忧臣不信也臣忧爱之深愚戇妄发惟陛下幸赦 贴黄 臣伏觀御笔以诸郡水灾分命朝臣体访被灾轻重宣布德意且令有司给降钱米賑济仰见圣天子忧念元元不遑寧处之意然臣谓近年以来所在常平义仓例多羽化况当水毁之后储蓄抑又可知若令有司專仰此以充賑给必成文具窃见仁宗皇帝庆历八年河北水灾特出内藏库钱帛令三司转漕斛斗賑贍嘉祐元年河北复被水出内藏库絹二十万匹银十万两賑貸神宗皇帝熙寧元年诏三司支钱五十万贯賜河此转运使应副水灾诸州支用以免科扰民间孝宗皇帝乾道元年浙东西水灾蠲免百姓身丁钱絹于内库细支拨还户部以充军用祖宗爱民之切于有司賑给之外又捐朝廷内帑钱物以助之实惠及民不

为空言所以人心感悦天意易回虽然此非祖宗已然之事亦陛下之所亲行者绍定二年台州大水命常平使者叶棠移治经理发丰储仓米十万石封桩库钱五十万贯以充赈济修城之用是时楮价四倍于今计五十万为今二百五十万视三祖所捐盖有过之今被灾之地既广旧比固难悉援然亦安可漠然视之而徒责之诸司州郡乎臣窃料陛下痛伤赤子死亡未必不欲捐缗赈之特大臣每事蓄缩逆畏陛下或有所靳而不敢言耳且绍定赈台之事弥远犹能行之曾谓二相之贤而独不能为之乎夫居钧轴之地遇国家大灾变拘文牵俗踌躇顾虑不能稍稍度外行事以慰天下之心而曰国力方屈吾为朝廷惜费殆不得为知务矣臣谓三使者之行当各以二三百万缗自随所至酌量被灾轻重均济近郡又当兼给以米庶几实德宣布可以转灾为祥朝廷每造一宫建一寺其费动以数千万计若捐百之一二以活十州数百万生灵之命其为福田利益盖有大于宫寺者矣陛下若以臣为可采伏乞睿防付三省疾速施行

转对奏劄

臣比因水灾直前奏事冒进瞽言圣度如天不赐诛斥在臣愚若可以止适当转对义不容默是用再披心腹极陈于前惟陛下垂听焉臣窃见自诸郡大水以来廷绅有奏疏上封言得失者方诸盛明不讳之朝未及百之一二已闻或者恶其讜呶指为己甚邪说乘之遂谓空言徒乱人听无补国事此说一行其祸足以亡人之国臣安得避空言之名不为陛下分明之乎夫所谓空言者谓其高谈濶论远于事情揆诸古则不合施于今则有害如战国横议如西晋清谈若是者信无补也今诸臣之言上则切劘圣主下则砥厉大臣内则摧压奸邪外则销遏强敌盖书所谓乃言底可绩诗所谓我言维服者也而顾以为无补于实政乎夫皐陶之言虽惠非帝舜底于行则无以致泰和之治傅说之言虽良非高宗闻于行则无以成中兴之功今也言不悖于皐说而陛下不能如舜高宗之行不惟不行又从而咎之言果何罪哉且诸臣之言其切劘陛下也谓畏敬不可不存谓货色不可不远谓国本不可不正谓大伦不可不厚谓大臣不可不信谓政本不可不一谓台諫不可不择谓辅相不可不和谓任贤不可不坚谓去邪不可不力谓土木不可不罢谓用度不可不节谓戚里害民不可不戢谓宦寺挠政不可不惩谓凯必昂英诸贤不可不召谓垓荣与籩怙恶不可不罚谓黥草茅之失不可不悔谓轻蔑学校之罪不可不正莫非可行之言也设尽行之则尧舜禹汤之圣不是过矣而陛下亦尝用一言于此乎其砥厉大臣也谓君心之非不可不格谓内降之命不可不还谓开忱布公不可不广谓辨别邪正不可不明谓协恭和衷不可不务谓分朋植党不可不戒谓乡曲之私不可不克谓功利之徒不可不远谓器使人才不可不当谓振防淹滞不可不公谓天灾流行不可不畏谓下情壅阏不可不通谓小人之类不可不絶谓师儒之去不可不留谓去恶之心不可有所私系而勿用谓进贤之道不可有所观望而不力亦莫非可行之言也设尽行之则皐防周召之贤不是过矣而大臣亦尝从一事于此乎夫诸臣之言如布帛之必可衣谷粟之必可食用之则治舍之则乱断断乎不可易也今一切以为空言而莫之省不知舍是将以何者为实言实政乎抑臣闻之道路又以为今日之病在于人主无用言之实大臣无受言之量无用言之寔其未必至于玩諫无受言之量其未必至于罪言玩諫固不可罪言则趣于亡也如水之就下矣故必圣主充容纳之美而进于用言之实贤相絶忌讳之心而拓其受言之量夫如是则诸臣之言皆见于用何往而非实政乎昔孝宗皇帝厉精为治总核名实羣臣进说多见

施行当是时百官轮对翌日必命宰臣进呈择而行之一时善政多出于此廷试居下列者命详定官节録论利害事实处类聚以闻以廷绅之言为未足也谓前宰执侍从亦有献纳论思之责已见利病聴非时闻達欲以知州县民情若是者可谓有用言之实矣故臣愿陛下以为法王安石之为相也不恤人言甚至于加罪司马光论青苗则退司马光苏辙论条例司则逐苏辙刘摯论助役则谪刘摯盖其未相也尝有诗曰为客当饮酒何与主人谋及其为相力行此诗故深恶人议其失若是者可谓无受言之量矣故臣愿大臣以为戒今天下大势剥烂蛊壤无一事堪举目独言路一脉如缕不絶是乃国家之元气也主张扶植犹惧不振奈何又加诋訾而沮抑之乎或者徒疑诸贤之来不过譏譏騰口一闕而去不知于国于身一切不恤而妄求诡异之名自非大狂躁之人何至如此而可以是例目之哉臣谓空言之説好名之语皆设罟罗于国中欲一网君子而尽去者也其言最易入其祸最难言愿陛下如淫声美色以遠之而毋輒惑焉此君子去留之机国家安危之不可不深留圣虑者也臣屡触天威无任陨越惟陛下幸赦

留赵给事奏劄

臣伏觀御笔赵汝腾除翰林学士陆德輿兼给事中除目一出人情震骇以为汝腾在 闕仅两月凡所缴驳皆国家大事君子有所依小人有所惮一旦隆以虚名夺其要职事出匆遽莫知所由或为陛下朝逐徐霖暮夺汝腾之职盖以汝腾尝屡荐徐霖而霖所恃者惟汝腾故疑霖补外必为汝腾所缴遂先事而移之若果因此臣窃以为误矣霖数年前颇有时名汝腾荐之亦未为过但其再来遂负虚骄之气傲睨一世自以人莫能及至于因讲学异见攻诋蔡抗王佖等为奸人昌言于君父之前则无忌惮甚矣汝腾亦知其狂且见天语峻厉霖犹未去与臣亟至其所居趣之使出霖始踉蹌肩輿而去臣居与霖隣寔目见之以此而观霖命至 闕汝腾必不駁之明矣或谓汝腾徙他官非由霖故自以缴驳諫章所论社仓等事因欲陛下出之于外而陛下欲两全之故徙汝腾他职若果出此臣尤以为不可夫邪正是非天下自有公论而汝腾所言大有之奸有无亦何可得而欺者陛下但当问其言之是非而去留之可也若不辨黑白但欲陷以好官使之薰莸并处汝腾行已有耻者也其肯道不行言不聴而包羞忍耻以就华职乎是则名曰迁而实逐之也且陛下更新大化名曰收用诸贤其实皆置闲曹徒为观美独汝腾粗居要处得行其志宗社所頼惟此而已一旦骤夺其职付之柔佞拱默之德輿使汝腾以一世之望宗老之重飘然遠引陛下遂亦弃之有如弁髦中外闻之必大惊怪以为朝廷局面转移国事至此贤者力争而去小人踊跃增气而来盖理势之必然者岂不摇动四方之人心哉臣言及此非敢求名非敢为党盖赤心血忱深痛陛下改纪仅数月而初意遽变已有土倾瓦解之气象沦胥以败特在旦夕间故不自知其言之狂至于此耳臣愿陛下以宗社生灵为念毋蹈系小子失丈夫之戒亟以封駁之职复还汝腾使之有辞复留以系人心以安国步不然臣汝腾之所荐也又顷者使还入对首言更化机括惟在五六台諫而非其人是以致妄议台諫者也当与同去其可独留伏乞奋宸断并赐罢黜臣虽没齿田间其甘如荠干冒威顔不胜俟罪之至

轮对奏劄【原注六月六日时为著作佐郎】

臣猥以非才滥竽东观每惧尸素无补秋毫兹幸登文石之陛下望清光敢输翼翼之愚少殚忠报之分惟陛下垂听焉臣尝静思当时之故窃以为闕乎宗社之存亡者不一而足陛下神明之虑既有所遗而二三大臣复皆视为故常莫有赤心血诚身任其责者是以大化虽更羣贤虽聚而天下之势反日趋于危亡而不可救止也且今日闕乎宗社之存亡者陛下亦知之乎奸邪有复出之忧强敌有必至之势国计有将败之虞三者其机已兆其形已成大臣分任其责汲汲以图之犹惧弗济而可漠然不恻瘼其身乎权凶去位以来所缔结者莫不壊散所排斥者莫不收用攻诋之防多见施行朋比之俦悉就流窜戚里之与为姻娅者又奉诏而停婚上心若坚定国是若昭然士大夫可举手相贺曰自今其无反覆之忧矣臣窃以为未也何则内庭之耳目故在而外邪愈急于窥覩都城之巢穴未破而奸朋犹存于依据帷幄之臣邪正混淆固有觚觚色授助小人如郑居中之主蔡京諫宪之任忠佞错糅固有柔邪深险默伺伺变如杨畏之主章惇在庭百执事出死力以排奸者百无二三希后福而中立者十盖八九甚至陰持异见以力沮草茅之公议阳附善类而甘为权孽之私人指目昭然有不可揜呜呼国家之多衅如此非宰相之责乎夫成周冢宰以正百官为职者也而王之六官亦统焉今羣臣庞杂甚矣宰相所当别其淑慝为上一分明之至于宫禁竒衰黷货外交人言借借岂可坐视而不之问顾乃并包兼容之意多别邪辨正之虑浅忧防避谤之心重直前迈往之志防遂使众臣争衡大权旁落养成积轻之势以启窥觊之渐是得为知其职分矣乎罅隙之不涂几防之不察一切以虚心无我之道待诡譎变诈之人蹊术既熟羽翼既成不幸变故乘之上心一移凶渠立至使宗社有沦亡之忧衣冠遭鱼肉之祸生灵罹涂炭之厄当是时也虽洁身以去其能逃世之清议乎故奸邪有复出之忧宰相之责也数年以来敌攻云南传闻日骇荆蜀广右所奏畧同闻其将帅最能行兵批沓蜀咸袭其背则兵出奇道盖其常能无足怪者庙堂之上虽尚致疑而宥府之臣盖尝论建今既任主兵之责矣则向之所陈固当力守而速图之且其所谓命蜀帅抚结诸蛮邀截障蔽命广帅驻邕州控扼险阻者陛下亦既亟从其议矣今阅数月蜀之所抚结者何族广之所控扼者亦何地招募戍卒孰任其事联结峒丁孰尸其责遣使以访境外之事终何所闻易帅以任经理之寄果何所就夫古之大臣图事揆防不为空言发虑出谋动有成效不以敌国缓急为作辍不以人言有无为勤怠今既以知军容万里之情见推于天下矣及至谋人之国任人之事当存亡关系之秋无始终负荷之志悠悠泛泛自同众人陛下專屬之意固如是哉且臣近者闻诸上流阉幙以为大理人己降敌而朝论方在疑信之间可为痛哭幙府之言必有自来不识是説也阉帅嘗以白于庙堂否乎万一有之而阉帅不以告二府不及知则亦误陛下之任使矣夫以知兵之臣居本兵之地而又專任主兵之责疆事安危众所交属乃令敌人谋我而不思所以待之危机将发而不图所以救之一旦铁骑长驱电发焱至江沱之门土倾瓦解任事之臣寧得不执其咎乎故强敌有必至之祸主兵大臣之责也国家版图日蹙才力日耗用度不给尤莫甚于近年闻之主计之臣歲入之数不过一万二千余万而其所出乃至二万五千余万盖凿空取办者过半而后仅给一歲之用其取办之术则亦不过增楮而已矣呜呼造币以立国不计其末流剥烂麤灭之害而苟焉以救目前之急是饮鸩以止渴也岂有为天下阽危者若是而上不惊者陛下愍国计之屈分命大臣顓领其事盖将使究本末源流而图惟变通之术也固当防出入之大凡察盈虚之至理破苟且之习为经久之远图今也不惟理之无术而反耗之日甚大农经用廩廩不继额外创给日已益多大兵之券不询之有司一日之间而顿增三十余万淮蜀制臣以科降为请则一捐亦各千数百万其他凡所馈给视旧悉增夫军旅之费诚不宜惜然不度其力不虑

其终岂不甚乎且理财无他道亦曰去其蠹财者而已矣蠹财之大者莫若军旅而宫掖次之今江淮荆蜀符籍半虚主帅务私资为橐根株盘结未有能穷其奸利而一清今主财之臣亦尝以覈军旅之实为请乎六宫横费浮淫百出羣奄羽化要索无艺嬖宠祈恩赐予日繁外庭不敢问有司不得计也今主财之臣亦尝以省宫掖之用为请乎滥费之不节宿蠹之不除乃徒张官置吏日事纷更縁飾美观隳紊体统使才名之士不容而嗜进之士得售国家用度日以不给盖有如贾谊所谓大命将倾莫之振救者臣不知何以善其后乎故国计有将败之虞主财大臣之责也夫奸邪能覆人之国能亡人之国而财用空竭犹之气血凋耗亦足以毙人之国有一于此已可甚惧况三患交至而无人焉以任之可不为之寒心哉且是三者本皆宰相之所当总执政之所当与而非可以分任者亦既谋之不臧而分任矣则职分所在可得而辞其责乎虽然臣又窃有疑焉何则二三大臣责任虽不同而心不可以不同侧闻庙堂之上同异浸彰道路传言抑难深信然国论未固窥伺孔多纖芥一开何事不有目前百怪且将舞防鱗而号狐狸祸乱相寻往往出于众人之所易宗社之忧又岂特一去位之奸而已哉故以人才言之执政当进其可进而不必望其有助宰相当用其可用而不必疑其植党以政事言之宰相所当谋诸同列毋独运以贻自用之讥执政所懷当告诸长毋專達以取侵权之诮如同舟而期于济如共车而主于行夫如是庆歷元祐之治虽未能以遽致绍圣元符之祸尚庶几其可纾乎然而臣尚有説于此请得以终陈之夫职分之不尽心志之不同二三大臣信有罪矣待遇之未诚信任之未笃愚臣妄谓陛下亦有过焉何则嘉祐之定国本任其责者韩琦也今陛下以为家事而独谋于左右之嬖御元祐之择台諫预其议者司马光也今陛下懲创太过而專决于宠幸之从臣伸国法以绳横恣庙堂之责也卒压于威命而中辍内降以抑侥幸宰相之事也竟屈于宣諭而奉行彼居其位而不得行其道方赧然以冒其所愧又安能展布四体以志伊尹周公之事业哉臣愿陛下推诚以待之虚心以任之毋以小谋大毋以内图外而使大臣得以粗伸其志焉如此而犹职分之不尽心志之不同以负任使则天下之责固将归之而不贷矣臣出位有言无所逃罪惟陛下幸赦

彗星应诏封事

臣伏觀七月初六日以彗出柳星许中外臣僚直言时政缺失者臣一介妄庸受性愚直淳祐末禩防陛下擢贰蓬省掇承记言竟以遇事妄发得罪而去已而朱熠沈炎何梦然之徒相与捃拾坐废十年自分此生永诀圣代无复一言關於陛下之聽矣不谓垂死之年乃承罪已之诏淳勤恳惻导之使言臣目睹皇上震恐大祸将至其敢畏避权势不罄其所懷以负圣明乎谨沥血忱以羣臣所必不敢言陛下所必不得闻者为献惟陛下幸聽臣谨按国史徽宗皇帝崇寧五年正月戊戌彗出西方光芒长十余丈徽宗大惧日进蔬食每夕焚香涕泣至数百拜星没乃止于是慨然深照蔡京之奸不由人言奋自威断即日罢其左仆射凡京所为政事一切罢之除毁党碑凡元祐奸党指挥二十项悉从荡涤停罢补注方田废三衛彻園土更学法复科举罢后苑制造蠲六尚贡物以至茶盐钱法并照户部议改内外百姓歌謡鼓舞溢于涂巷近世以来以实应天精切勇猛未有过于此者后嗣安得不取法哉陛下数年以来專任一相虚心委已事无大小一切付之果得其人宜乎天心克享灾害不生祸乱不作矣而庚申以来大水为灾浙西之民死者数百千万继以连年旱暵田野萧条物价大翔民命如线景象急迫至此极矣今又重以非常之异妖星一出光芒竟天夫柳为鶉火火者国家盛德所在而彗

出焉其变不小若非朝廷政事大失人心则何以致天怒如此之烈乎臣请得而枚数之祖宗立国一本忠厚大奸巨蠹始加流窜今也大臣轻于用之以怖异已庚申辛酉之间大小之臣追停迁放无月而无威则立矣如斷防祖宗忠厚之泽何士大夫以仕进为业者也今使刻薄小人吹毛求疵控持扼塞动触新制进退无门旅困颠连有厯二三歲竟不得一缺而去者又使轻銳少年数人日夜改七司法煅炼增加日事刻薄惟恐一人之得进至已所欲与则虽碌碌下流超资越序而无所忌憚也人才难得自古而然并蓄兼收犹惧乏使今也以意向为用舍以党类为去留自非素出其门皆弃不錄遂使懷才抱艺之士沉废流落咨嗟愤怨有锢人于圣世之恨岂不足以伤陰阳之和乎古之大臣皆以下士为贤吐哺握髮未嘗少懈所以通达下情搜摯人物共济国事也今不务师古妄自尊大有造光范如謁鬼神越月逾年竟不得通虽有奇才异能何以自见凡此数者皆为陛下失士大夫之心者也自井田既废养兵之费皆仰税租汉唐以来未有能易之者也今也称其私智市田以餉自谓防畧高妙前无古人陛下知其非计嘗欲罢之有秋成举行之命彼悍然不顾也白夺民田流毒数郡告牒弃物不售一钱遂使大家破碎小民无依米价大翔饥死相望有司尚谓田恶日更月易无有已时奸佃乘之咸叛其主识者谓异日浙西有乱必自公田始不特若此又四出虎狼之吏使之磨牙张吻啖昨良民柯山一関遠近为之震惊茗水三贪朝廷为之妙选史越翁到郡数旬而聚斂至三百万推剥之惨不言可知朝廷鋤去黠吏本以爱民也不知反以为害一吏就擒视为奇货株连枝蔓殃数十家得钱数百千万而犹未已质妻卖子破产亡軀哭泣载涂臣所亲见堂堂天朝而甘为破落州县摊賴之举凡此数者皆为陛下失畿甸之心者也江汉上流国家重地中兴之后简畀名臣弹压抚摩未始偏废今也举而付之一夫容养姑息如奉骄子顚指使气使求得欲从斩剗杀伐徧于湖广监司守令畏摄而不敢争使陛下创残遗民沦坠汤火而莫之救江西湖北歲杂给钱其来已久今亦半给告牒人情寧不汹汹以至市舶尽利而蕃人怨盐法苛急而商贾怨比日以来复闻广贛之众相挺而起凡此数者皆为陛下失遠民之心者也然此特臣田间所知万分之一二耳淮海以西岭蜀以东千万人之怨又奚止是哉陛下所恃以有天下者人心而已今大臣尽失之则其相与愁痛号咷哀吁上苍产妖钟孽以警悟陛下以昭示危亡又何足怪哉况近歲以来天生柔佞之徒布在世间立人本朝惟知有权门而不知有君父或称其再造王室或称其元勲不世或直以为功不在禹周公下虚美溢誉日至上前荧惑圣明掩蔽罪恶遂使陛下深居九重專倚一相高枕而卧谓如泰山四维之真可倚不知下失人心上招天譴乃至于此岂非羣臣附下罔上之所致哉陛下试观五年之间廷绅奏疏不知凡几千百亦有一语事关廊庙者乎意之异已者尽斥位之偪已者尽除上自執政侍从下至小小朝绅无一人而非其党虽学校诸生亦复数年噤无一语言路已荆棘所以养成大臣横逆之气人怨天怒不至于彗出不止也且灾异防免三公汉唐以来视为常事丙申雷变陛下亦嘗奋刚断一日而罢二相今彗星之应至不忍言岂雷变发非时之比况人心皇皇万口一时皆指其人独陛下不悟耳且后妃之家不得为执政官仁宗皇帝之着令也政宣犯之终致祸败陛下违仁宗之令典蹈政宣之覆辙固已不合天心久矣今遇非常之变而又不思改图则亦何时而觉寤哉臣恐自今上天不复譴告而伤败旋至矣臣忠愤所激不胜大愿愿陛下取崇寧彗出故事反覆披览力见施行因大臣求退而亟许之取庚申以来一切刻薄害人之政即日罢去申严仁宗着令为子孙万世之法而又尽涤圣心力行好事收召贞贤招洗冤魄以答天心以慰人望如此十日而妖星不灭则寸斩臣以谢大臣以戒狂妄臣不敢辞干冒天威不胜震惧之至贴黄 臣犬马之齿六十有四正先臣捐軀殉国之

年自草此防即以死自待盖未必膏陛下斧钺而大臣怨毒则有不可测者陛下若欲保全防臣乞勿以臣疏付外臣非畏死盖恐一线言路遂絶非陛下之利也伏乞睿照

奏乞下诏趣诸路勤王之师状

臣窃见朝廷屡促诸道勤王之师今已日久尚未有至者当国家危急存亡之秋岂臣子顾望翱翔之日昔靖康之难勤王之师不待督促四面而至特奸臣耿南仲辈以议和却之其不可追之悔至今言之令人于邑明受之变张浚吕頤浩为诸镇唱号召韩世忠张俊之徒入援遂梟二凶成反正之伟功盖君父艰危之际凡委质为臣者皆当不待诏告如手足之扞头目子弟之救父兄今乃或掣肘于权奸拥重兵而不动或私庇于乡井留精锐以自全甚至搂入卫之旅半道邀之以去措意如此公议指之谓其有无君之心而后敢若此视浚頤浩寧不愧死乎臣愚欲望陛下亟下明诏以却责之專遣一介之使监其调遣必师旅就道而后许还其有能率先诸道而至者不惜厚赏以加旌异如尚首防两端逗挠不进重加绌责虽赦不原庶几援师四合神京不耸此今日机务之至大至急者惟陛下幸聽而速图之臣不胜惓惓

耻堂存藁卷二

宋 高斯得 撰

经筵故事

七月二十三日进故事

李丞相沆每朝谒奏事毕必以四方水旱盗贼不孝恶逆之事奏闻上为变色惨然不悦既退同列以为非问丞相曰吾侪当路幸天下无事丞相每奏不美之事以拂上意然皆有司常行不必面奏之事后当已之公不答数数如此因谓同列曰人主岂可一日不知忧惧也若不知忧惧则无所不至矣【原注出三朝名臣言行录】

臣尝观唐虞盛时大臣进说其君虽平居无事未尝不存警戒之意盖人主不可一日无惧也而保持是心使久而不怠则大臣之责也禹臯陶论治于舜之前舜进禹使之昌言禹不及他独举前日洪水滔天浩浩怀山襄陵下民昏垫者以为告禹岂自伐其功者哉盖将以保帝舜泽水敝予之心使之不忘一日之惧所谓昌言莫大于此后世大臣鲜能知此义者惟汉魏相粗有见乎此相敕令史案事郡国及休告从家还至府辄白四方异闻或有逆贼风雨灾变郡不上相辄奏言之夫宣帝之时吏称其职民安其业亦可以言治矣相乃常以逆耳之事告其君使之知所警惧不敢安逸可不谓贤乎我国朝名臣李沆相真宗皇帝每奏事毕必以四方水旱盗贼不孝恶逆之事奏闻上变色不悦同列皆止之而沆不为止且曰人主岂可一日不知忧惧若不知忧惧则无所不至矣呜呼沆之此言真可谓大臣之体矣虽周公作无逸以戒成王何以过此且咸平景德乃国家至隆极盛之际而为宰相者不以已治已安为足方以敝戒无虞为心用能弼我祖宗丕基传之无穷而施之罔极岂非万世宰相之法哉臣窃见比者江浙闽中诸郡同日大水流移人民动以万计中外一辞谓非小变然大臣恬然视之未闻有孳孳汲汲推原致异之由图惟弭灾之防为陛下力陈之者一二廷臣不得已而有言亦人臣愿忠职分之常耳颇闻恶其强聒指为张皇抑何居其位而不知任耶夫魏相李沆居天下无事之时而喜言灾变之事今日大臣当大异较炳之后而恶言灾变之实岂以陛下不乐闻之而顾望以至此乎臣愿陛下虚怀访逮示臣以喜闻敝戒之意如舜之进其臣使之昌言庶几自今或有变异有以开广上心博采人言共图销弭之术宗社幸甚

七月二十八日进故事

淳熙八年二月己亥太府卿蕤现以病乞补外拟除闽漕上曰师揆来乞此阙乃是师垂之兄师垂为淮东提举壤官钱二十余万緡赵雄等奏伯圭不甚教子多责以治生上曰何以为清白之传兼闻其下尚有三弟他日皆作郡则近地州皆占了矣莫若以高爵厚禄使之就闲卿等更议之雄等賛曰凡朝廷一好事皆陛下之意臣等畧无分毫补助容退而熟议庚子雄等奏师揆等差遣昨日虽聆圣训细思似无端由盖陛下方务广恩既难批出臣等日侍左右若作勘防亦涉商量须因人言乃可议此上曰如此则且命师揆依旧淮西运判却别以阙与师

垂使辟其兄庶几体顺乃除师垂闽漕乙巳中书舍人施师防言师垂倚势谋利恐吓细民转输一路财赋其不为民害者几希望追寝除命且与祠禄诏赵师垂差主管台州崇道观【原注出孝宗皇帝实录】

臣恭惟孝宗皇帝临御二十八年一以大公至正为治如天之无私覆地之无私载日月之无私照虽骨肉肺腑之亲未尝轻以官职授之盖天位天禄天职乃天下之公器非人君之所得私也师揆师垂秀僖王之诸孙也孝宗皇帝以师垂贪黷无状且其兄弟众多异日布满近郡易为民害欲以高爵厚禄使之就闲不私其亲而处之尽善真可谓为盛德之事矣向使大臣将顺其美推广其意因此立法凡属籍及戚里自今悉优加禄秩不复烦以治民则经制一定后世子孙有所持循矣惜乎宰相赵雄等识虑不逮避怨姑息沮其事不行而除师垂以闽漕公论沸腾卒为中书所缴孝宗皇帝亟命子祠曾无留难雄等能无愧乎呜呼有君无臣使祖宗盛美不得宣于天下着于后世可胜叹哉臣窃见近者王邸懿亲忽除畿漕 阙争之以为未允且闻其人亦畏人言一再引避陛下若俞其请改命其官乃协公议而复强之使受何耶夫孝宗皇帝于王邸之孙尚不敢私则于王邸之亲其必不私明矣陛下纵未能继孝宗之志立为定制以示后法亦岂可不行给舍之言以伸公论之气乎乃若大臣勇于顺指轻于出命甘心以赵雄容悦为法而不知以道事君之义固不得而辞其责也臣愿陛下少省孝宗皇帝以高爵厚禄使之就闲之训自今于骨肉肺腑之亲但优其恩泽勿使临民庶几三宅之寄皆得其人赤子救宁有以祈天永命臣不胜拳拳

八月十三日进故事

欧阳修朋党论曰臣闻朋党之说自古有之惟幸人君辨其君子小人而已大凡君子与君子以同道为朋小人与小人以同利为朋此自然之理也然臣谓小人无朋惟君子则有之其故何哉小人所好者利禄也所贪者财货也当其同利之时暂相党引以为朋者伪也及其见利而争先或利尽交踈则反相贼害虽其兄弟亲戚不能相保故臣谓小人无朋其暂为朋者伪也君子则不然所守者道义所行者忠信所惜者名节以之脩身则同道而相益以之事国则同心而共济终始如一此君子之朋也故为人君者但当退小人之伪朋而用君子之真朋则天下治矣尧之时小人共工驩兜等四人为朋君子八元八凯十六人为一朋舜佐尧退四防小人之朋而进元凯君子之朋尧之天下大治及舜自为天子而臯防稷契等二十二人并列于朝更相称美更相推逊凡二十二人为一朋而舜皆用之天下亦大治书曰纣有臣亿万惟亿万心周有臣三千惟一心纣之时亿万人各异心可谓不为朋矣纣以亡国周武王之臣三千人为一大朋而周用以兴后汉献帝时尽取天下名士囚禁之目为党人及黄巾贼起汉室大乱后方悔悟尽解党人而释之然已无救矣唐之晚年渐起朋党之论及昭宗时尽杀朝之名士或投之黄河曰此辈清流可投浊流而唐遂亡矣夫前世之主能使人人异心不为朋莫如纣能禁绝善人为朋莫如汉献能诛清流之朋莫如唐昭宗然皆乱亡其国更相称美推逊而不自疑莫如舜之二十二人舜亦不疑而皆用之然而后世不谓舜为二十二人朋党所欺而称舜为聪明之圣者以能辨君子与小人也周武之世举其国之三千人共为一朋自古为朋之多且大莫如周然周用此以兴者善人虽多而不厌也夫兴亡治乱之迹为人君者可鉴矣【原注出五朝长编】

臣窃观仁宗皇帝朝欧阳脩为諫官因小人唱为朋党之说以诬君子进朋党论谓非所患在辨君子与小人而已其言深切着明可以洗千古朋党之论为人君者所当笃信而力行之也夫脩谓周武之臣三千人共为一朋自古为朋之多且大莫如周而周用以兴言善人不厌乎多也今善人方患其少而或者尚指以为党欲排去之抑何与脩异见乎臣窃见近者名臣去位系国安危臣谓举朝之士皆将起而争之矣然以事關諫臣畏威惧祸自宰执而下留行者不过八九人諫臣诬劾其人留之不可能与諫臣争是非者又不过四五人可谓至寡而不能为朋矣諫臣反谓其要私党以乞留又谓逐去数人则朋党可消以激怒陛下呜呼天下安有四五人而可以为朋党者哉夫虞周之朋不厌其多彼諫臣者固不足以知此矣若以汉唐之朋党言之则汉之三君八俊八顾八及八厨唐之八關十六子与其徒充斥朝廷布满天下如是而指为朋党犹可也今蹈方据正之士踈稀牢落有如晨星方患其气势单弱不足以敌羣小而主公议而犹欲以朋党陷之不亦欺天诬人之甚乎且仁宗之諫臣持论如此而陛下之諫臣持论如彼公私邪正固不待辨然亦可以观世道矣臣愿陛下置脩所着于坐隅朝夕省览以虞周信用君子者自勉毋惑于小人诬陷之言庶几善良获安宗社有赖不然脩所谓汉唐末世鋤去朋党甚可惧也可不监哉

九月初三日进故事

哀帝时鲍宣上防曰今朝臣亡有大儒骨鯁白首耆艾魁垒之士论议通古今喟然动众心忧国如饥渴臣未见也厚外戚亲小童及幸臣董贤等在公门省户下陛下欲与此共承天地安海内甚难夫官爵非陛下之官爵乃天下之官爵陛下取非其官官非其人而望天悦民服岂不难哉宜急召故大司空何武师丹故丞相孔光故左将军彭宣皆智谋威信可与建教化图安危龚胜为司直郡国皆谨选举可大委任也陛下前以小不忍退武等海内失望陛下尚能容亡功德甚众曾不能忍武等邪【原注出前汉鲍宣传】

顺帝时李固上防曰安国以积贤为道陛下初登大位聘南阳樊英江夏黄琼庐陵杨厚防稽贺纯四海欣然归服圣德厚等在职虽无奇卓然夕惕孳孳志存忧国臣前在荆州闻厚纯等以病免归诚以怅然为时惜之一日朝防见诸侍中并皆年少无一宿儒大人可顾问者诚可叹息宜召还厚等以副羣望【原注出后汉李固传】

臣尝观舜之命官曰咨汝二十有二人钦哉惟时亮天功皐陶之陈谟亦曰无旷庶官天工人其代之夫人君代天理物朝廷之上庶官所治皆天事也其可一时之不亮一官之或旷哉然旷官有二无其人旷也非其人亦旷也舜之所命禹宅揆弃后稷契作司徒皐陶作士垂共工益作虞伯夷典礼防典乐龙作纳言既不虚其位又皆当其才得人之盛卓越千古呜呼尚矣后世朝廷之官类多旷废非果乏才也有而不能用耳哀帝时鲍宣言朝臣亡有大儒骨鯁白首耆艾魁垒之士论议通古今喟然动众心忧国如饥渴者至于使亲小童在公门省户下可谓旷官之甚也然何武师丹彭宣龚胜之伦盖当时号为骨鯁耆艾者乃以排外家丁傅废斥不用顺帝时李固言朝防见诸侍中并皆年少无一宿儒大人可备顾问者亦可谓旷官之甚矣然樊英黄琼杨厚贺纯之徒盖当时号为宿儒大人者乃忤权臣梁冀病免而归二君有才不用乃使不才者充位脩数以妨贤俊其旷天工也甚矣虽然二汉之官非其人而旷也今日

之病则不但非其人而又至于无其人焉尚书六员不置其一侍郎八员阙其五大小卿监十七员阙其九二府掾属九员阙其六郎曹二十余员阙其半谓天下果乏才耶则祖宗以来如庆历元祐乾道淳熙之际人才辈出布满朝廷皆取诸当世而足不借之于异代也何独今日而无之乎采诸公论在外诸臣可备侍从卿监都曹郎吏之选者固有其人奈何正学直道与时落落谋人之国者观望上意宁使朝廷空虚而不肯召用其负一世之望觝排小人不胜项背相望而去者视之亦不甚惜使鲍宣李固见之能不以何武师丹黄琼杨厚梗弃为叹乎然而今日所甚病者又在于二相矛盾私意相持坐视朝廷旷官废事歷歲逾时会不知恤陛下亦未尝少加训敕使留意于选任也舜臯陶以天工相戒固如是乎臣愿陛下深诏大臣妙选时髦速补众职之阙庶几并志合力共熙帝绩不至取国空无人之谓天下幸甚

九月二十三日进故事

绍圣三年直寶文阁待制知成德军杨畏知河中府右正言孙谔言畏在元丰之间其为御史其论议趋向皆与朝廷合及元祐之末大防辙用事则尽变其趣而从之绍圣之初陛下躬亲总揽则又变其趣而偷合苟容交關执政倾乱朝政至今天下之人谓之三变诏杨畏落寶文阁待制依旧河中府中书舍人盛陶言未敢行词诏移之虢州【原注出第七朝长编】

臣闻舜之戒其臣以难任人为急难之一辞乃圣人屏恶之深意不可不精思而熟玩也盖憊壬之人易近难遠圣人非特去之而兢兢业业戒谨恐惧惟虑其人之复来以倾乱吾国苟畏难之心顷刻不存则彼必緣间伺隙不旋踵而至矣詎可忽哉熙丰祐圣之间小人反覆莫如杨畏利在王安石则附安石利在吕大防苏辙则附大防苏辙利在章惇安燾李清臣则附惇安燾李清臣天下之人谓之三变国家之逆运乱源滥觞于符绍滔天于崇观政宣畏实为之若此倾覆之徒其可近乎嘉熙以来侍从之臣固有随世俯仰逐利转移如杨畏之三变者方其气焰熏灼之时其力至能进退宰相钳制言路善良重足惧遭倾覆之祸幸赖陛下洞照其奸不动声色而去之天下咸仰圣德之明彼退伏散地岂一日而忘复出乎特未有可乘之机耳迺来国家多衅局势渐摇彼静观窃笑久矣一旦因事论建依仿公议以动陛下之思而廷臣不自后先及其奏至之时复加荐引中外相应如此岂得为无意乎陛下苟入其說召之使还臣恐杨畏一来元祐变为绍圣特反掌间耳况比日以来从臣奏议欲用嵩清与燾三党倡邪说以误国事包藏已深乃今又有佞人来矣之渐邪气盘结如此臣窃为国事廩廩也臣愿陛下深察安危存亡之机以舜难任人为法斥去迺言谨勿轻信使已去之奸絕意再用则局面增固善人获安陛下更化善治之初心不至于中道而改辙矣臣忧爱之切遂亡其愚惟陛下采择

十月十三日进故事

至道初吕防正罢相以仆射奉朝请上谓左右曰人臣当思竭节以保富贵吕防正前日布衣朕擢为辅相今退在班列寂寞想其目穿望复位矣刘昌言曰防正虽骤登显位然其风望不为忝冒仆射师长百僚资望崇重非寂寞之地亦且不闻防正之郁悒也况乎岩穴高士不求荣达者甚多惟若臣辈苟且官禄不足以重矣上默然及刘昌言罢上问赵镒等曰频见昌言

否镕等曰屡见之上曰涕泣否曰与臣等言多至流涕上曰大率如此当在位之时不能悉心补职一旦斥去汎澜涕泗钱若水曰昌言实未尝涕泗镕等迎合上意耳若水因自念上待辅臣如此盖未有秉节高迈不贪名势能全进退之道以感动人主者遂贻上之轻鄙将以满岁移疾遂草章求解不果今上初年再表逊位得请【原注出国朝名臣言行录】

臣尝妄谓士大夫立朝不可一日无去心盖去就轻然后能伸吾道之尊而起人主之敬若进退之际不能介洁脱然无累则是有欲而可制其取人主之轻鄙宜矣传曰君子难进而易退则位有序易进而难退则乱也故君子三揖而进一辞而退以远乱也按礼凡食宾君迎宾入大门宾入再拜宾辟君揖入宾从之三揖三逊然后升阶成礼及宾出君送之大门内再拜宾不顾而去此之谓三揖而进一辞而退礼虽主言食宾之仪而记者引之以明士大夫进退之节复申之以远乱之辞盖患失之弊必至于乱其戒人以谨于去就岂不严哉太宗皇帝疑吕防正刘昌言之戚戚于退非果轻鄙士大夫也盖由未有秉节高迈不贪名势能全进退之道以感动人主者钱若水深知其然力求逊位以寤明主以愧贪夫盖可谓能易退而知自重者矣其为一代名臣不亦宜乎比年以来士大夫以退为难控抟爵禄以身殉之若不可一朝舍去者躁竞成风廉耻道防职此之由近者台谏之出既往复来仆仆道路见者指笑以为前所未有一辞而退固如是乎彼盖以诏书趣还借口不知一求复出名节已败虽龊龊充员可以实近臣之虚位然顽顿无耻人所鄙贱祇为朝廷羞则反不若虚位之为愈也臣窃料三人者羞恶之心未能亡必且愧清议终求引去臣愿陛下亟俞其请非特遗之以安其于砥厉士风扶植世道不为无补取进止

十月二十三日进故事

淳熙十年七月丁丑李焘奏臣蒙恩庀职史馆事有当奏取圣裁者谨列于后一从来修书必立年限今四朝正史开院已二十四年三次展限矣所幸纪及志并奏全篇其未了者止诸臣列传耳列传既有底本稍加之意似不难了乞自今更与展限明年春季庶几史官各务协心不致有淹日月一裕陵诸臣列传已经四次修改泰陵三次祐陵两次靖康一次若旧本有误处及有合添处即当明着其误削去合添处仍具述所据何书考按无违乃听修换仍录出为考异不然则从旧更勿增改所有诸臣合立传而事迹无可寻讨者且附他处不必强立庶几后来寻讨得见则不妨别立大抵只要信而有证一臣闻操楫佐轅技不两工故史官必久居其任少兼他职乃可责成若兼职太多用志必分虽高才任职多多益办然人之精力有限正恐详于此则畧于彼今史官犹有阙员自今差除乞选兼职少者委任之庶几専力速成大典从之【原注出孝宗皇帝实录】

臣尝伏读国史窃见修书故事帝纪之传必一书成乃修一书未尝有并修两书者盖国家大典关系至重非専心致志为之则不能纪载得实传信后世且以神哲徽钦四朝正史言之乾道中史官李焘上帝纪既而补外及再还朝乃命修列传故焘初至有此三项奏请列传垂成而焘卒所谓展限来年春季者竟不果就遂召洪迈卒成之十三年十一月乃克登进曰纪曰志曰传次第而修首尾二十七年四朝大典始备孝宗皇帝岂不欲其速具哉而责成有渐如此以焘良史之才无出其右亦不敢诡并修志传而二书之进后先相距其远又如此以是言

之崇成鉅典其可以易言哉臣伏见国史院被防修纂高孝光寧四朝志传限来年三月登进臣叨与载笔苟有管见不敢默然且诏修四朝志传为日久矣赵以夫始專其事不知亟加纂辑乃欲先合九朝正史为一而后以四朝续之用力舛差遂堕汗漫迄以夫之去四朝传竟无一字汝腾继之当其任矣而乃引嫌力辞尤煇又继之亦复控避久乃就职更三史官虚度歲月几及两载实为可惜九月以来乃方命僚属然规模不立人情涣散既不照旧例奏请先立年限又不考故事分志传为两次以百余年间历史官二百八十余人所不能成之书自诡速成于数月之内四脩三脩两脩一脩可谓易于成书矣犹且逾四年而后奏篇今高孝光寧诸臣当立传者人数犹未能定杂糅漏絕无伦次院吏所供初草大抵徒其私家所供志状全未经史官考按增入他书又安得有所谓四脩三脩两脩一脩者乃欲趣办于四五月之间臣知其苟且防裂务应限期希恩赏而不以传信决矣虽然列传粗有张本者也乃若诸志则从前未有片纸纂次今始创为其间天文地理选举礼乐之属犹可编类缀缉惟兵财二者乃百余年建国之实政本末閎濶功力浩瀚非可凿空为之者岂数月之所办乎兼史院官例多兼职往往一时繁剧之任丛于厥身有如煮所谓精力有限详此略彼者而望其專力总领速成大典难矣臣非唱为异论苟欲迁延以逃瘵旷盖考诸故实昭然不诬乃敢援据以为陛下告望圣慈宣谕提举官及此编摩未定之初检照孝宗皇帝修书故事改命史院官專一编纂四朝正史诸志俟奏篇毕续行纂次列传庶几修书次第既合旧典又使诸史官用志不分成篇可準不致苟且防裂貽笑后世取进止

五月初二日进故事【原注咸淳八年三月除起居舍人尽九年十月除工部侍郎】

后妃有正淑之行则继嗣有圣贤之君制度有威仪之节则人君有壽考之福【原注出前汉书杜钦传】

臣闻人君一身天地社稷宗庙山川之主四海九州百万生灵之所系命不可以不谨也古先帝王知其然故保身之道至严极重起居动作悉有检防出则史官书其言动御警察其声音入则女御叙其燕寝女史记其御法隋慢之气不设于身躬宴私之意不形乎动静凡以制威仪之节养壽命之原而为齐家治国平天下之本也秦汉以后古制罕存人主御朝之时观听攸属犹或勉于自飭至于适寝释服妇寺后先其能不为居养所移者鲜矣故成帝临朝渊默尊严若□有天子穆穆之容而一入内庭则声色并进女德不厌赵李争宠伤年损德此杜钦之言所为发也陛下春秋鼎盛行义未过退朝之暇游神典籍恬泊冲虚固中外之所共知也然日者薄愆和豫少旷视朝闻者不能无惑臣谓陛下圣性高明受祖宗之所付托至重其于保身之道造次克念战兢自持必不若汉季之君所为然臣翼翼愚忠犹愿陛下于乐喜之余益思谨疾之道凡纷华柔曼可以倾意而迁神者一皆屏去玩无逸之可以克壽思恬淡之可以永年澄心清魂葆醇练粹虽于昭阳柘馆临宦官女子之际常若露门虎观对学士大夫之时则微疴薄恙安得以匱薄清明之躬而壽基福本岂不亿万年而有永乎臣未得登文石之阶陈当世之务因上故实独以是为羣言之首惟陛下赦其狂愚不识忌讳而察纳焉臣不胜幸甚

七月二十九日进故事

上方郊祠甘泉泰畤召杨雄待诏承明之庭正月从幸甘泉还奏甘泉赋以风盛言车骑之众参丽之驾非所以感动天地逆厘山神又言屏玉女却虚妃以徵戒斋肃之事【原注出前汉书扬雄传】

臣闻人主事天之道惟质与忱而已矣盖质者天地之性而忱则天地之道也大路越席扫地不坛器用陶匏牲用茧栗皆尚质也立择听誓皮弁听报斋明盛服三宿七戒皆致忱也外尽乎质内尽乎忱则天之亲德飨道也宜矣秦汉以后文缛而掩其质敬心弛而汨其忱千乘万骑以为华宝鼎天马以为饰而事天之本废矣牡荆灵旗以祷兵方士祕术以求福而事天之心荡矣若成帝者则以文减质以欲汨忱之尤者也甘泉泰畤之祠正承武帝奢侈之后丞相匡衡欲少去华就实乃奏罢鸾路龙鳞黼绣周张之饰更定其仪与其乐章帝虽勉从而终不能改故雄赋甘泉极道八神警蹕星陈天行万骑中营玉车千乘之盛以致靡丽之讥是时赵昭仪又大幸每上幸甘泉常从故雄赋复云想西王母欣然而上壽兮屏玉女而却虚妃玉女无所眺其清卢兮虚妃曾不得施其蛾眉以戒斋肃之事惜乎帝之驰骛于纷华湛溺于逸欲而不能用也欲以感动天地逆厘三神不亦难乎陛下穆卜季秋中辛以行赐馆之祀今有日矣咸秩之礼昭事之忱所宜蚤戒而豫定者圣心固已孜孜于此盖自干淳以来每遇郊禋必诏有司自祭天仪物及诸军赏给之外凡车服仗卫声明文物之具莫不裁约而归于俭锡赉推恩亦减承平之半或三之一可谓尚质之至矣至于前期斋殿致其精明以对越在天者尤极其严行事之际避黄道而不履虚小次而不御可谓致忱之极矣是以神天顾歆或积雨而顿霁或微恙而立瘳以迄成熙事此陛下之家法也今四郊多垒财力单匱遂不逮干淳之时臣愿陛下于阜陵节约之外损之又损庶几曰祀曰戎二者皆济乃若以忱事天又其大本记曰齐者防其邪物讫其嗜欲言不敢散其志也今距斋宿之期虽曰尚矧然臣愿陛下以圣人久祷为心兢兢业业已如上帝临汝神在其上之时则积此真纯用于一日天人相与如响应声天神之不降地祇之不格风雨之不节寒暑之不时臣不信也惟陛下力行之臣不胜惓惓

十月二十日进故事

文帝十二年诏曰道民之路在于务本今歲一不登民有饥色是从事焉尚寡而吏未加务也吾农民甚苦而吏莫之省何以劝焉其赐农民今年租税之半【原注出前汉书文帝纪】

臣闻为国之本在于厚民厚民之本在于择吏吏不得人则惟务肥己以瘠民而国之根本蹙矣成周盛时自卿大夫以至比闾族党之长皆良吏也故其民生而不伤厚而不困八百年之基业巩固而久长不亦宜乎三代而下惟汉文帝最为有志于民无他道惟择吏焉而已班固传循吏以文帝时河南守吴公蜀守文翁为称首谓其廉平而民从化则吏道固以廉为本也盖廉吏寡欲易足必无苛征暴敛捶肤剥髓之事然以文帝之留心若此吏犹有怠忽而不承命者故十二年之诏责其不加务于民又谓农民甚苦而吏莫之省是必竭民膏血以自丰殖者赐租税之半以振赡之其意可见矣臣观汉唐而后孳孳民事以择吏为先者莫如我朝孝宗皇帝无日不申饬大臣使之遴选郡守郡守姓名皆揭之御屏朝夕览阅其有贪刻害民者往往不待内外宪臣劾治径以御笔罢去而于水旱凶荒之歲尤加意焉其有于灾伤之际不恤民瘼赋敛刻暴者率皆不贷重者至于追停是以干淳之际民物殷阜田里熙和而无叹息

愁恨之心可谓盛矣臣窃见今歲穰人成功之时淫雨弥旬妨于农收二浙水潦弥漫为害尤深陛下哀闵元元申严受纳斛面之禁而于公田民田之租皆有蠲除圣恩所被孰不感戴然吏多不良苛取故态曾不悛改而浙右辅藩尤甚【原注平江倪普】盖自八九月间禾方冒没于水腐烂于泥百姓嗷嗷无所告诉之时固已下令督趣税租急于星火且市斛之大倍于文思往往市斛之三乃可纳文思之一是五倍取于民也往往以资赂遗以规进取如民命何臣愿陛下严敕监司使之督察其有浚民以自肥者必罚无赦毋使肆其贪暴贼吾赤子精选慈惠岂弟之人以一洗其污憔悴虐政之民庶其瘳乎

咸淳九年正月十五日进故事

匈奴冒顿大入围信信数使使胡求和解上赐信书责之曰專死不勇專生不任防攻马邑君王力不足以坚守乎安危存土之地此二者朕所以责君王【原注出前汉书韩王信传】

李广为将军出雁门击匈奴匈奴兵多破广军生擒广广得脱至汉汉下广吏吏当广亡失多当斩赎为庶人【原注出前汉书李广传】

臣闻为将之道能勇而持重则进无轻脱之忧退无逗挠之失者盖将帅之病常患于恃勇而尤患于无勇恃勇者轻敌取败固能为国生患然其志犹可取也无勇则銳气销沮日沦于偷其为国家之祸可胜言哉常武之诗曰震惊徐方如雷如霆徐方震惊言贵乎能勇也出车之诗曰彼旟旐斯胡不旆旆忧心悄悄仆夫况瘁言贵乎持重也王者之师以刚厉柔以柔济刚动而万全所向无敌抑由此之故乎汉高帝朝匈奴冒顿大入围韩王信于太原信不能力战而反求和于匈奴故高帝责之曰專死不勇專生不任谓为将之道專持必死之心则伤勇而反不得为勇專持必生之心则不足以任军事盖持必生之心而无必死之意者宜乎敌至不支卒以败亡也文帝时李广击匈奴恃勇轻敌屡为匈奴生得出雁门则军亡失多出右北平则一军几没虽号名将所至多败轻敌之过也虽然将者军之司命也与其选懦寧其果銳与其为信寧其为广择将者可不加衡于此乎臣窃见襄阳之围旷日持久命将救援泽非不至然气索志偷情见力屈大劳未艾扫清无期岂非将不胜任之所致乎淮西之防俶扰诸郡巢穴既近倏去忽来其有能惩闭门之失者似强人意而遽遣大将自取败衄非旁郡一捷则敌得气去为患日益深岂非将不持重之所致乎襄失之弱淮失之轻惩劝之道不可偏废今丧师失律者既加之罪矣彼蓄缩顾望不发一矢者可不申严师律以少警之乎臣 陋儒不達兵事妄陈所见少效涓尘惟陛下裁择

四月二十一日进故事

洪范八政一曰食二曰货食谓农殖嘉穀可食之物货谓布帛可衣及金刀龟贝可以分财布利通有无者也二者生民之本兴自神农之世斲木为耜揉木为耒耒耜之利以教天下而食足日中为市以教天下之民聚天下之货交易而退各得其所而货通食足货通然后国实民富而教化成【原注出前汉书食货志】

臣闻食货相资自生民以来未有能易者也虞书曰懋迁有无化居蒸民乃粒万邦作乂洪范八政一曰食二曰货孟子曰许子以釜爨鐵耕以粟易之盖二者不能以相无为人上者但当均节其重轻使交利而俱贍未闻有力加遏絕使食货不通以至于饥饿死亡而不加恤者也管子日记本量委则足矣而民有饥饿者谷有所藏也藏者何專貯于一处而不散也谷粟所以养人乃设筦而壅阨之天絕民命使捐瘠于深山穷谷之中何其忍也自古言利之臣桑孔为魁闻其尽笼天下货物矣未闻其禁米也国家着令米谷不税凶年饥歲闭粜有诛祖宗仁政更可不恪守乎臣窃闻近者有司【原注京尹吴益】踵行 政开置米局黠吏豪民共主其事栅水防舟圭撮不泄山泽之民货无所售食无所得饥火迫之触法抵禁啸侣呼俦破栅夺攘以与官角其擒获传送有司骈首就戮向也救死于口而不得今也救死于颈而不能进退皆死何吾民之不幸乎夫移粟移民一国而相通者也晋饥秦救邻国而相通者也安有均为天子县内之民而杞鲁相视哉始作俑者其无后乎为其象人而用之也如之何其使斯民饥而死也作俑者信有罪矣效尤祸也可不监乎今耒耨棘矜犹未散也施禁之令犹未下也正当疆場日骇之秋列郡有杀人取货于城内者京邑有蚁聚蜂屯于田里者长此不已岂不为奸人所惑以摇吾民乎愿陛下申严国家通籴免税之法亟命有司毋惑吏奸毋轻民命取数年 法而扫除之仍昭揭榜諭使遠所山泽溪谷之民莫不闻知则渤海潢池之间必且弃兵弩而持鋤钩卖刀剑而买牛犢矣惟陛下亟行之幸甚幸甚

五月十九日进故事

曹刿曰夫战勇气也一鼓作气再而衰三而竭彼竭我盈故克之【原注出春秋左氏传庄公十年】

臣闻军旅之事以气为主然而气不自昌言养之使壮厉之使刚则由乎上之人焉养之使壮者平居之时训之以孝弟忠信导之以尊君亲上在上者恤其饥寒无使有叹息愁恨之心为将者同其甘苦无使有推剥侵冤之患厉之以刚者有事之时劝之以醴赏厚利切之以信誓明威含血吮疮以结其心酺酒椎牛以快其欲夫如是则居也不馁其动也不慑矣或平日空乏其体肤冻饥其妻子赏罚不公以激怒陞黜不当以召怨临战恩意不足以鼓舞其心号令不足以耸动其听临之以选慙之帅将之以逗挠之夫大敌在前其不憊然惧涣然离奉头而窜厥角而降者鲜矣臣窃观今日沿邊将士气之索也甚矣敌筑城于我疆视之如不见敌掠民于吾境聽之如不闻俘馘之而不耻系累之而不怒弃君父如弁髦赴异域如归市以此众战而望其北首死敌蔽遮江淮难矣哉春秋传曰子瑕卒楚师燿說者谓火防为燿军主丧亡故其军人无复气势李陵之败也夜半时击鼓起士鼓不鸣臣谓今日疆场之气似之曹刿曰彼竭我盈故克之臣不知彼盈我竭其如之何也秋风一瞬奄奄气象未之有改若之何不汲汲于改纪军政以取覆败乎虽然三军之气不振固可惧也士大夫之气不昌尤可忧也上作而下不应君命而臣不承妄揣轻量徘徊观望其可忧可惧又非三军衰竭之可比也臣忧爱之深愚戇妄发惟陛下与帅臣深念而亟图之天下幸甚

八月十五日进故事

仲舒治国以春秋灾异之变惟陰阳所以错行故求雨闭诸阳纵诸陰其止雨反是行之一国未尝不得所欲【原注出前汉书董仲舒传】

臣闻水旱之有祈禳古之道也何则民命所關苟有可以救之者君子必尽心焉不若是则谓之无志于民可也周礼太祝六祈有鬯祭门祭法曰雩祭水旱也汉晋梁隋暨唐皆尊用之不以为世俗祈禳小数而忽之也然臣以为水旱之有祈禳犹焚溺之有救拯当急而不当缓急则可及其未然而弭之缓则灾变成形无益于事矣云汉之诗曰祈年孔夙方社不莫夙兴不莫者言贵早耳古人之于民事皇皇汲汲而图之故曰民事不可缓也董仲舒之治江都史不载他事独详着其求雨止雨之法亦可见以此为先务之急矣行之一国未尝不得所欲忧意感通宜其应之速也国家凡有水旱祈禳之礼着于令甲有司未尝不举而行然常失之迂缓赫赫炎炎苗将槁死而勤雨之令始行浩浩洋洋虑殫为河而闭陰之典方举其未然者固可及救然其所伤亦已多矣有民有社灾已切近勇于行之不为晋越也而犹拘挛蓄缩视仪聽唱亦何为哉虽然水旱者陰阳而已救之者纵闭而已所谓纵闭岂止于城门开阖而已哉夫淫雨为沴者陰盛阳防之证也今朝廷之上明目张胆之夫少而宛舌固声之士多此陰也邊鄙之间投石防距之气衰而弃甲曳兵之习痼此陰也田里之间击壤鼓腹之音絕而疾首蹙额之恨深此陰也光弼出矣而旗帜未见其精明胜之用矣盜賊不为衰止貪墨之吏去之是也而使易镇【原注刘良贵】僨军之将斥之是也而使扞城朝臣舛迁胶戾乖刺几有汉人之患正衙罢奏庶官不对几有唐世之风凡此皆陰盛阳防之证也防者不纵使之日消盛者不闭使之日长安得不感天地之精而生戾气哉此又祈禳之大者而尤当皇皇汲汲以图之也臣忧爱之深愚戇妄发惟陛下幸赦

耻堂存稿卷三

宋 高斯得 撰

论

君仁臣直论

臣闻古之人君大患在不闻其过而已矣夫以一人居天下之上言动几微之间治乱存亡系焉是不可以不闻过也然其威雷霆所震者灭其势万钧所压者摧予夺废置怵于前刀锯鼎镬迫于后自非龙逢比干剖心陨首冒万死而不顾者孰肯以其身婴威怒之锋哉在昔盛时以尧舜为君以禹皋稷契为臣一堂之上都俞吁咈如家人父子温乎其和故昌言嘉谏各得展竭而无余蕴君臣之道两尽不亦休乎三代而下庶几乎此若汉之高帝唐之太宗亦可取也高帝为人宽仁爱人豁达大度故其创业之初羣策毕至虽酈生戍卒之贱皆得至前以吐其愚晚年欲易太子周昌直言极谏比以桀纣而不以为忤太宗宽宏尽下导人使谏孙伏伽李大亮之伦危言说论交至逋发不惟虚怀延纳而又或加赏赐以激励之二君创业垂统国祚延洪皆听言能用闻过能改之所致然要其极而论则亦曰仁而已矣陛下以司马光所载君仁臣直之语为问臣谓战国君臣何足进于陛下之前故置不复言而述尧舜及汉唐令主之事以对然窃窥圣意则知陛下盖深有感于斯言者陛下天资忠厚恕以待人屈己和颜延见羣下未尝疾声厉色真可谓至仁之主矣而在列之臣批鳞逆耳引裾折槛之风若寥寥焉则是陛下无负诸臣而诸臣或负陛下矣虽然是亦有机括焉司马光之告仁宗皇帝也曰仁曰明曰武故臣愿陛下于其有余者勿失于其未至者用力焉传曰主圣臣直又曰君明臣忠此二言者可与圣问所及互相发明陛下试采择焉

圣主之祀臣有五义论

臣闻人臣生而有功德于民则其死也圣主制为祭祀之礼以报之此仁之至义之尽也人君之治天下建立法度兴起事功安定国家捍御菑患必众建臣工而后可以有济然君之于臣也使之必报之生则荣之以爵禄死则秩之于祭祀传曰圣王之制祭祀也法施于民则祀之以死勤事则祀之以劳定国则祀之能御大菑则祀之能捍大患则祀之夫是之谓五义自尧舜以来未有易此者故记礼者列农稷后土以下十有余人皆有功烈于民者也成周之时有勲劳者祭于大烝有道德者祭于瞽宗其他或即其地而祠或立之庙以祭载诸传记班班可考凡皆以崇德报功而已东汉之臣如马援者佐中兴之业平内外之难马革裹尸之志至死不移其于勤事定国御菑捍患可谓兼之矣而大功未录谗言并兴薏苡之谤一闻光武大怒妻孥惶惧不敢归孤魂怅怅而无依况敢与祀典之秩乎同郡朱勃上书显讼其冤而陈圣王祀臣五义之说其规讽光武亦深切矣帝终不悟书奏报归田里终帝之世援谤卒无与明若光武者真少恩之主哉陛下天资仁厚遇下以恩苟有尺寸之功靡不酬报固非汉世之君所敢望矣然襄淮俶扰未清士卒暴露为日滋久岂无身膏野草魂为国殇之人主将不以闻有司不以告则忠愤之气亦能感天地之精忤阴阳之和以召水旱昆虫之变臣愿陛下监光

武之失憫邊圉之勞亟命閹臣搜訪死事悉以上聞旌而錄之庶几將士聞之感激而思奮其于安邊保境實非小補

年弥高而德弥邵论【原注出扬子法言】

臣聞人之進德當與天同其運不可以血氣之盛衰而為進退也人受二氣五行以生其健而不息之體固與天無以異也故昔之聖賢耄耋好禮旄期稱道有孳孳焉而后已凡所以全其賦受而反之于天也曾子臨終謂門弟子曰而今而后吾知免夫小子子張臨終謂其子曰君子曰終小人曰死吾今日其庶几乎曾子至死而后知免于毀傷子張至死而后知克終其事聖門高弟其進德修業刻厲堅勇如此豈非百世之師哉自聖人之道學不傳而學者之性不用方其壯也氣盛力強或能勉強以厲其行年運而往其不進銳退速半塗而廢以負其初心者几希無他不以志氣助血氣而反以血氣亂志氣焉爾若冉求之自畫宰予之昏惰得聖人以為依歸猶且若此況其下者乎盡此道者惟顏子而已苦孔之卓未見其已假之以年則大而化之僉入聖域矣年高德邵何足以言之惜其年之不高也揚雄所謂孔子之徒者此其人也雖然人有年高而德不邵者以不知戒得故也苟志于得則利欲蝕其性外物汨其天如螾蟻之遇物持取如豺狼之死而猶餓終身惟無賄之患其得免于禍幸矣又何德之能邵乎然而血氣既衰戒之在得孔子特為中人以下設戒耳若夫特立獨行之士以萬世在後為心者蓋棺而事始定豈區區利欲之所奪哉夫特立獨行之士未易得也而以富得禍者十常八九亦在乎人君獎廉黜貪以底厲之則有德者進而風俗以美國家以治矣惟陛下留神

伊周论【原注为贾似道作】

或有問伊尹周公之事君有以異乎曰伊尹周公皆聖人也奚其異曰伊尹復政厥辟之後幡然告歸不可復留周公既宅非不欲去卒為成王所留而止非異乎夫聖人之制行不必盡同至于出處大節不可以不同也今若是後世奚所折中哉曰二聖人心同而迹異然人臣之義當以伊尹為正也伊尹受湯之托以相太甲太甲克終厥德伊尹之責塞矣不歸奚為使伊尹而不歸是以寵利居成功與世之患失者無異何以為伊尹曰如子之言周公非欤曰惡是何言也周公大聖人也而我非之是病狂喪心也曰二聖人出處較然不同子是伊尹又是周公亦有說乎曰有孟子曰聖人之行不同也或遠或近或去或不去歸潔其身而已矣使伊尹而居周公之地安得而不留使周公而居伊尹之地安得而不去無他也伊尹異姓卿而周公同姓之卿故也伊尹佐湯以有天下又相嗣王俾克有終其功大矣然進退去就人臣之大節也功成不去必蹈亢龍之悔范蠡所不為也而謂伊尹為之乎周公則不然明農之請亦伊尹之志也然以叔父之親受文武之托為嗣王所留愀然去之屈原所不忍也而謂周公忍之乎故人臣之道二功成之後同姓則當留以蕃王室異姓則當去以遠嫌疑不明此義而去留胥失其當皆伊尹周公之罪人也予患世之多以周公借口也于是乎書

復讎论

客問于高子曰讎可復乎高子莞爾笑曰陋乎子之問復讎天地之大義也而又何疑焉傳曰

父之讎不与共戴天兄弟之讎不反兵而鬪齐襄公复九世之讎春秋大之周平王不能讨申侯之罪传诗之君子诛焉夫民生于三事之如一惟其所在则致死焉古之道也君之讎不复不可以为臣父之讎不复不可以为子兄之讎不复不可以为弟前志所以贵豫让而尊子胥哀王褒而薄嵇绍为是也夫事有疑则问之不必置疑而问君子谓之不善问客曰今有人焉有父之讎二十有八载而不能复有兄之讎二十有六载而不能复非惟不能复也又与讎人同国而居焉是待其父兄曾交游之不若也问之则曰吾非终不复也将有待焉尔一旦为御史之官乃得反之如是者则可乎高子曰是禽兽也恶乎而可夫天子之置御史也使之黜不端治有罪明目张胆斥然正以呼之也若盗天子之权以报家怨借无辜之人以寓奸心枉矢蛇行为鬼为蜮不思置是官也固使彼若是乎被以诛心之法是为无君非禽兽而何彼掩耳盗钟谓人莫已觉也不知君相非之近臣议之同列耻之在廷百执事口不敢言而心鄙之輿台皂隸小夫贱人羣嘲之诗曰墓门有棘斧以斯之夫也不良国人知之陈佗稔矣岂待逵恶而后弃乎公羊子曰父不受诛子复讎可也父受讎推刃之道也夫为天子师儒之官辱士以快私仇者廷绅言天下事于天子之前以大义斥之为天子近民之官贪刻以病民者刺史掾击大奸併狐狸而去之是皆受诛之类也而可报乎管夷吾不复讎夫子以为是王珪魏征不复讎程子以为非孔子曰以直报怨以德报德朱子以为怨有不报而德无不讎夫复讎义也而有权焉彼浅丈夫不学无术知推刃而已安足以及此郭解原涉以侠济民作威作惠王法之所诛也然君子犹曰复讎报直不失仁义今也盗天子之大权以作奸威以害良善是贼仁义者也其罪浮于解涉矣故吾谓举天下之人无不可复讎惟天子之御史则不可昔者孝宗皇帝综核名实以公灭私御史之挟私盗权以诬人者必痛绳以罪林安宅之于叶颙姚宪之于曾懷萧燧之于李景覃大者窜逐其次削秩罢官轻犹徙他官未有但已者也今天子虽圣明而言事官犹观望当国者之意以为向背望其行林姚之罚难矣客曰子之论则正矣气则昌矣然人毁君君亦毁之得无取贾竖女子相争之诮乎高子曰春秋之义乱臣贼子人皆得而诛之吾欲诛无君之人以扶世教正人心而何嫌之避

说

广居说

永嘉陈君所为便坐命曰广居属予书之而发其义所谓广居之义大矣难乎其为言也学者必先识其所谓者而用力焉然后可乎是居者何宅心之地也易曰修辞立其诚所以居业也又曰寬以居之书曰惟厥攸居盖皆有主于中守而不去之义如人之有家焉朝于斯夕于斯常而不厌然后志定而业成夫既识其所居矣而能充之以学问拓之以义理不梏于偏见不汨于私欲逮夫养熟理融之后心体浑然万境俱彻四海八荒皆在吾宇居其有不广乎呜呼此仁者之事学者所当立以为的而俛焉孳孳者故予愿与陈君勉之

史巽之两溪说

坎流水也兌止水也两溪交流坎之重卦象焉两泽相丽兌之重卦象焉水与泽相近而不同故易六十四卦未有以兌为水者予方为季申明两溪之义请置兌而论坎夫坎之为卦心亨

而体劳遗安君从容乡邑之间尊师讲道安土乐天其得坎之亨者乎季申栖迟苕霅两溪之间遗佚不怨阨穷不悯其得坎之劳者乎然劳之中有亨道焉不可不知也季申傥能思遗安之训隐居以求其志固穷以守其身则疏食饮水乐在其中其何亨如之季申借两溪之名以寓维梓之思善矣予复推其义以告之其亦以为然乎

陈坚字子固壑字子思说

圣学二曰知与行而已然非通之以思则知不明非守之以力则行不实二者相须不可偏废也易曰知至至之可与几也知终终之可与存义也又曰知崇礼卑崇效天卑效地语曰知及之仁不能守之虽得之必失之又曰知者乐水仁者乐山四者辞异其指则同知至至之主于知知欲其明故曰可与几知终终之主于行行欲其力故曰可与存义智以知识言欲高明而如天礼以持守言欲安固而如地智以通理如水之周流仁以守道如山之坚确一知一行交进互益此学之大方也永嘉陈宗名其二子曰坚曰壑而遗予书曰公为我字之且发其义予谓坚于文从土其义有不待辨若壑之义当以洪范明之洪范五事皆以本然之性而言思曰睿者思具自然之睿人皆有之非圣人所独得其文义则通而已二子之于学也苟能致其叡以思之坚其守以固之如手足相须而不可相无知行互发不能自己则其进也庸讵知其所止乎请字坚曰子固壑曰子思虽皆昔人已行之字然合而言之以尽其义则此乎昉春秋之义不嫌同辞兄弟一体固不得而析也陈君以为然则愿以告乎二季有可往复幸无辞焉

唐近仁字学行近道字学知说

仁与道难言也肫肫浩浩与天同体学者茫然而求之乌能闯其藩哉故圣人教人常自其近者言之曰刚毅木讷近仁曰力行近乎仁曰强恕而行求仁莫近焉曰知所先后则近道矣曰忠恕违道不远凡皆示人求端用力之要使之即用以明体因显以识防近而不已则亦终至其域而止耳零陵唐直夫取中庸之义名其长子曰近仁而字以学行取大学之义名其仲子曰近道而字以学知求予一言发其义夫力行非仁也何以近乎仁知所先后非道也何以近乎道盖行者仁之实而知者道之门也中庸三知知者之事也三行仁者之事也行不近于仁乎近仁而欲无愧其名则当深体力践俛焉孳孳毋惮任重道远而不力毋以色取行违而自欺行之不已仁远乎哉大学之道自诚意正心至于治国平天下条目众矣而其纲领以致知为先知不近于道乎近道而欲无愧其名则当惩治本心精择义理毋溺于利欲以汨其明必谨于几防以择所向知之之至道不远人矣虽然二者非学不能知非学则不明行非学则不力易曰学以聚之问以辨之宽以居之仁以行之记曰人不学不知道直夫字二子以知行而贯之以学其有见于此矣然而犹有说焉先儒谓知行如人两足不可偏废二子其观予文交警互发则有以知夫仁与道一而二二而一矣乌虜尚勉之哉

纯彦字韩孺说

先君子尝言古者以王父字为氏今宜仿此名诸孙以纯以开府公字公纯故也予第五子纯彦字之曰曰韩孺盖窃取忠献诸子之名俾徼福焉我朝世家之盛莫如韩吕韩公忠贯日月

庆留苗裔予以匹夫慕之亦有说焉且公之诸子或秉国均或备禁裔勲名富贵赫奕一时纯彦居其间皆不能及而其平生行事亦未有卓然登于史氏者予果何取焉取其生长勲阀不忤不骄以保门户称其家儿而已家人六四富家大吉象曰富家大吉顺在位也言顺理以保其家盖非易事故于一卦吉莫大焉呜呼吾邦丧乱以来故家流落后生不谨以坠其世多矣予甚惧焉乃发此义以示警呜呼小子其念之哉

纯鲁字参孺说

余弟不器甫名其子曰纯鲁盖摭秦齐钟铭之文字之曰参孺则取论语曾子之义属余为之说余谓秦铭所谓纯鲁多厘齐铭所谓万福纯鲁有质厚之义不过言受福之厚而已与论语所云若不相似不器借其文以名子犹赋诗断章云尔姑置二铭専明孔氏之训先儒训鲁为钝言其受性之偏非美之之辞也果何取于鲁乎盖聪明才智之人未必闻道而质朴纯鲁者往往得之何也敏者见之既易故守之不坚而鲁者因其造理之难故用心専一探索鑽研不得自己既得之难故守之坚此曾子所以絶出三千之徒而独传圣人之道也呜呼天之降才于人亦不一矣贤者能因其质而用力焉则其赋性之偏反为受道之地向使曾子不知用力则亦终于鲁而已矣何足贵乎余观不器之子疏通闳畅非迟钝者顾以鲁名惟父知子必有深意岂欲其质直务实以济其所不足乎是则以曾子之病为纯鲁之药意虽少异而皆可以入道纯鲁继自今其亦依亲之言体亲之志去便儇皎厉之习为笃实敦厚之归毋悦纷华毋熹轻锐底厉于学问沈潜于义理以无虚乎严君名子之意是予之所望也呜呼纯鲁其亦念之哉

纯约字谦孺说

予弟不流甫之子旧名纯一不流书来欲予为之更名且字之而为之说予谓幼名冠字考之经传鲜有更者独小戴所记父母在许其更名况父之命而非自更之乎故予不曰不可而名以纯约字以谦孺名取左传在约思纯之义字则兼取潘安仁所谓福谦在纯约者焉夫约者何也不哆然以自大之谓也人之自守者约则笃实而不滥收敛而不华其行已也恭其用物也俭其为学也要圣人示人入道之门积德之基未有不由此者故曰以约失之者鲜矣然非其心纯乎义理不杂于利不累于物安能至此夫既能以纯居约矣则天下之谦何加焉天之所益人之所好鬼神之所福舍此焉往春秋之世未必能尽此道若安仁徒能言而不能行故卒盈以取祸我朝有刁约景纯者少与欧富齐名苏文忠称为前辈推尊甚至盖能不愧其名者孔门之约未易骤语纯约其亦希前修之行由是而进以求造乎顔曾之域可也乌虜其亦懋敬之哉

蹇叔潜字成子说

妻之兄子蹇叔潜予所名也始字渊子复改符子一日请曰二字皆未称公所赐名请更之予字以成子而语之曰子达成之义乎在易干之姤潜龙勿用夫子翼之以为不成乎名行而未成夫干六爻皆圣人之事圣人何不成之有自学者言之则穷而未达之时也名无所闻行无

所见非未成而何故潜也者君子进德修业之基济时行道之本也人能于此时刻志厉行笃学力行思其所未达勉其所未信不以人之所不见而自欺不以世莫我知而自画使大学修齐治平之具皆备于我他日出潜离隐举而措之其所成就当何如哉孟子曰舜发于 亩之中傅说举于版筑之间胶鬲举于鱼盐之中管夷吾举于士孙叔敖举于海百里奚举于市六者皆困于潜者用力有浅深所就有小大然其为有成一也成子其勉之哉

范震龙字子云说

蜀公之九世孙范震龙季从访予湘中曰吾字取诸易文言传而未知其说公为我言之予谓水火燥湿其义甚着云龙风虎曷为亦以类言盖龙阳物也云于易亦为阳虎陰物也风于易亦为陰同气相求其从之宜也虽然子之字是矣然混而无别果孰从乎盍以子云易之昔人名字以云龙相配者多矣如陆云而字士龙范云而字彦龙盖其著者士龙以云间自处非不高也而二十四友之污陷身浊淖云龙骃骃固若是乎乃若彦龙朝闻夕死之事其所依乘尤君子之所鄙笑二子皆非予所愿于范君也夫龙之为物钟天地之至阳其体清轻其性灵异而云以至阳之气为之憑依其乘时变化功用不测凡有血气之类安得而拟之哉易六十四卦穷天下之象而龙为首飞潜见跃各有其义非独圣人为然学者皆当体之范君究玩于斯而有得焉则知其蛰也所以存吾身其出也所以行吾志不得时而龙蛇毋如子云之空言而竟辱其身得时而风云毋如陆范之自失而貽笑于世则朋友相字之意庶乎其不虚矣呜呼范君其亦勉之哉

王琚字君度说

吾友王深道名其子曰琚遗予书曰为我字之併为之说庶知乃父有友如此且使佩德言以无愧其名也予曰诺哉乃字以君度而申其义夫佩玉之名五曰珩璜琚瑀冲牙大毛公曰佩有琚琚所以纳间盖佩玉之制惟琚纳于珩璜上下之间所以管摄众玉者也故古人言佩独琚得專其名而四者不得如曰佩玉琚琚报之以琚琚可见然则佩者所以节度乎身而琚者又所以节度乎佩者与传曰古之君子必佩玉周旋中规折旋中矩进则揖之退则扬之然后玉锵鸣也又曰既服习容观玉声凡皆以其切近于身可以敛敖惰之气闲非僻之心焉尔然其为制也必有一玉焉居其总会以节度之名物之中有精义存是岂苟焉者哉琚也而知乎此起居动作其无一而不求合乎度焉谨言谨行常惧悔尤者守身之度也愉色婉容交尽敬爱者事亲之度也笃恩厚别承宁尊者齐家之度也刑善亲仁戴抱忠信者取友之度也权衡轻重剂量辛甘者接物之度也广而充之跬步之间终食之顷皆不越乎检防夫如是则严君名字师友责善之意庶乎其无负矣然而抑有说焉夫度者降衷自然之则非强加束缚于人也始佩玉者容止进退之间若有拘牵之者久则安之矣度之于人亦然善乎吕成公之说曰规矩法度未至于乐循理若维縻然其中自有安泰恬愉之地琚虽未及乎此然有味斯言俛焉孳孳安知不终闯其藩也乌虜尚勉之哉

耻堂存稿卷四

宋 高斯得 撰

记

寶庆府濂溪书堂记

宋君仲锡守寶庆之明年以书来曰郡学有濂溪先生祠尚矣绍定二年教授梁君士英始即先生迁学旧址而改建焉为堂四楹歲未久而頽圯不治仲锡来谒叹曰先生治平间迁学于是岂苟然哉邵水经其前濱江绕其后左挹东山右俯清溪高明夷旷一郡神秀所钟学既他徙昔人即其地以祠先生是矣顾规模隘陋不足以称乃彻而大之中为先生祠堂祠先贤于东西序以侑焉其后为讲堂直舍斋庖门庑庖湑皆备经始于寶祐三年十有一月明年某月成维昔绍熙郡学之祠文公朱先生记之绍定改建之祠公之季父鹤山先生记之今兹之役非公莫记成事敢以为请斯得闻之蹙然曰季父之言立于世浅闻者不足继也况朱子乎且朱子之记发挥太极图书之妙鹤山之记阐明刚柔善恶阴阳动静之理皆已至矣尽矣后学措辞不其僭乎然而侯以邵士之请来不可无以告也惟先生卓然特立于羣圣人絕响之后亲承洙泗道统之传二程先生受业者也先儒拟以顏孟然则舍夫子无以拟先生矣大哉乾元万物资始天道流行物得之以正性命先觉之倡道者似之故原道于无极二五之先夫子之言性与天道也观物于庭草不除之际夫子之四时行百物生也玩心于圣人所乐之地夫子之忘食忘忧纯亦不已也涵泳从容深造道妙与天同体呜呼其元气之防乎蘓公轼非为先生之学者也其诗曰先生岂我輩造物乃其徒识者以为善言德行是岂无所见而言哉然舍造物与孔子无以拟诸形容矣学者诚能想其气象而用力焉则识趣造詣能见大意虽未入先生之室闯其藩跻其闕其庶防乎邵士亲染先生遗泽者也闻风兴起岂无其人故诵所闻若此期与共学焉

梅溪先生忠文王公祠记

士之扶义俶傥立功名于天下者亦观其所遇之时何如尔其或遭明盛之朝防危言之策则发其奇负瓊蘊崇论宏议使功及于朝廷泽洽乎天下诚士之高致也倘所遇之世义牙相抵而不合虽策虑偪亿欲何为哉乌虜若梅溪先生忠文王公之遇高宗皇帝真所谓遭明盛之朝防危言之策者也方是时也大奸方踣世道将回高宗思总攬英雄一解而更张之而王公出焉大对明册空臆开陈法天揽权为羣言首天子当宁叹息擢繇第九爰冠伦魁虎啸而风冽龙兴而致云势自然也公由是被遇正色立朝其论谏大指谓御敌之策莫先于用人用人之要莫先于人望其專屬魏公盖不待隆兴之初矣又悼三衙北司交坚党合不畏蹈祸危言刺讥卒使老将距脱众奄胁息太学诸生赋五贤之诗歌咏其事公为冠首焉虽然皦皦易緇硜硜难全稽山之命闲馆之游公自是卷懷而去矣阜陵即阼登公横榻赤帟复讎之义底柱建督之谋公于魏公未尝识面也徒以国事捐身徇之嶽防流落之死靡变此其本心果何为乎愚尝论高宗中兴策诏诸儒得天下之士二焉前有张后有王言论风指彷彿相似无垢出

于权 未枋之前梅溪兴于魁孽既殒之后故其施設规置畧有不同张公阬于秦相不究其用识者喟息公遇两朝諫行言听故高风劲节磊落震荡当时之士无与为比士大夫立身行道若此可无憾矣虽然愚犹有遗恨焉魏公之再相也荐可为执政者五人公其一也士方翹首冀其大用而公难进易退乾道以后湛浮外服不得久居中以廊庙具终于端尹乃若易名之典世主已更而后命焉凡此皆吾党之士所共不满也虽然自公视之其失其得我何加损乎公歿仅四传子孙日失其序至无聚庐托处行者心恻今吏部侍郎刘公黻生于公里悼先贤之世于今为庶非型善之道位諫省时尝以告上建祠给田以处业之防多事未及行暨开阩四明乃损钱二万缗即公讲学之地里名郭路筑祠堂五楹后建讲堂步櫺门塾靡不毕具属役赋文于咸淳八年之八月九年三月成两淮制阩印公应雷七闽连帅陈公宜中郡太守赵君崇鑑咸有助焉刘公又念祠成而无廩难以持久请于平章贾公似道贾公白于上以没入官田五百畝有奇赐之自是祠春秋有荐士朝晡有饩公之子孙不能自振者歲有廩刘公又谓作而不记非古也乃以见属自惟摧颓汨没仰公鏗鐳大节不可企及执笔顛泚而刘公命以勿辞乃不得已摭公平生大致刻于牲石因以志其愧云

公安南阳二书院记

孟子有言无恒产而有恒心者惟士为能夫士生乎世处乎其乡有竿门圭窆之可居簞食瓢饮之可乐虽无恒产而未有所怵迫故保其恒心也易不幸当丧乱之际颠连困踣无阖庐以辟燥湿无短褐以御风寒无粢粱之食以活躯命士至于此上之人苟无以教而养之人不能皆渊究也其不失口失色而丧其所守也者防希故建学属士于离散安集之余非徒以养其口体而脱其死亡亦所以养其恒心而纳诸君子也自吾有兵难襄蜀之人十九血于虎口其幸而免者率聚于荆鄂之间四民皆穷而士为甚故制置使少保孟公珙肃矜之各即其所聚而筑室以教育焉在公安者即名曰公安书院实维防祠旧址在武昌者曰南阳书院则取武侯躬耕之地以名公安以馆蜀产南阳以舍襄人既又告于圣天子请揭之奎画以宠多士而许焉公安凡六十楹田租歲入二千石有奇山泽间架之利为钱二百万养士百有二十人南阳余六十楹田租歲入六千石有奇山泽 征之利为钱四百万养士百有四十人择文学行义之士众所推服者以师表之旬有课季有试暇日则教之射士无饥渴以害其心咸自砥砺以成其业居无防何蜀产之归试者冠其省襄人试于大廷亦或以射被恩士益用劝乌虓当金革之时谈俎豆之事俗儒往往视以为迂而孟公顾能行之虽时相不学阻格其事而持之益坚为之益力盖庶防乎卫文公敬教劝学知所先务者可不谓贤乎继自今士之遊于斯者亦念公之为此将有望于我也切问近思以省其身修慝徙义以崇其德毋以物之贱者害其贵毋以体之小者累乎大必使反观内照常心复存而无愧于士之名乃为不失建学之意而曰羈旅之供固有委积是徒周我于其土地而已吾知頼其养焉以免死而已则是凡民自为且学古之道而以餽啜者也不惟有负于人抑亦有负于已矣岂不惜哉书院之作荆州别驾史君子翬寔主其事以书来曰是室也落成余十年矣无以记之惧久而废子其以为士者告余不敏始诵所闻如此吾党之士其亦以为然乎

彭泽县狄梁公庙记

士生天地间以忠信仁义自立将以扶植天经纲纪世道其任盖不轻而重也奈何自古以来君子每为小人所乘正论每为邪說所败志士仁人览观前志未尝不掩卷三叹继以流涕痛哭也虽然秉彝好德着在人心浮云揜于一时日月揭乎千古则彼恶直丑正者只足以增光益润而已何足道哉唐武后天授间狄文公以地官侍郎鳳閣鸾防平章事为来俊臣所陷贬彭泽令邑人为置生祠数百年不絕我朝绍兴七年十有一月始名其庙曰显正焉公在当时濡迹周庭系心唐室决策禁中力还国嗣防引五王权輿大计卒能取日虞渊迓续唐祚其何正如之方其黜居陋邦流落不耦湮郁甚矣而邑人钦慕英风懷想遗爱社祠尸祝不懈益防唐祀既忽圣代聿兴肇锡嘉名载光秋祀宋甄留侯不得专美其何显如之昔公巡抚江南毀淫祠千七百房止存夏禹吳太伯季札伍员四祠今也寝庙奕奕与四祠而五呜呼盛哉生祠庙貌颇壮县之迁邑人以遠不得朝夕骏奔乃移诸新邑寄招提境隘陋不足以宴娱神昌元赵君卯发来宰是邑鸡牛妙割之余歷頽寢而焉曰精忠盛德之祀而弗称若是吾之责也乃更卜一垵作为新庙翬飞跂翼邦人改观共称明宰为政知所先后若此非梁公之徒畴克尔耶君又念庙与陶祀为隣而陶祀亦将圯焉乃为建廊庑具庖湏筑新亭于东岭名之曰舒啸而又葺遐观之故亭命浮屠掌之官月廩给以书来曰吾于二公无能为役幸甚获踵芳尘故治防祠以慰邦人之思且以致吾高山仰止景行行止之思公为我记之予谓陶公拳拳晋室于义熙之末狄公孜孜唐祚于天授之间千载一心若合符节曩尔小邦祀二盛德一何幸欤然世方迂教化而轻节义非絕识防乎流俗其孰能发挥之故予于赵君之作重有感焉乃书之以记

赵汉卿解彭泽印为池阳郡丞乙亥冬疆事日急汉卿先为诗寄其弟以死自誓已而北兵奄至不屈死之事闻赠三官与二子恩泽防予以兵部尚书召见上力陈其从容就义非仓皇就死者比乞依知饶州唐震恤典改命遂赠华文阁待制錄后改为京泽昔狄公令于斯庙食二代防六百年汉卿遗爱在人其仗节死义于狄公有光异时少康祀夏予欲言之朝作庙斯邑庶防二忠臣后先辉映九鼎此邦恨老笃且入地不能待也因手抄狄公庙记然思汉卿遂书其后

永州续惠仓记

平糴善政也而无良法非无良法也古无其事而难为法也成周盛时计口授田百姓给足不幸而遭艱阨则有司賑之仓人之粟入廩人之谷用遗人之委积皆直以平之秋毫无所吝春秋战国以后上之人靳于也于是始有贷焉有糴焉贷者责其偿而糴者取其直事虽非古以其足以纾民之急故犹得为善政然糴之为法至难备也何则不裁其直则无益于民裁之则日损一日歲亡一歲必至于尽耗而后已将求其勿壞也谓可无以变而通之哉故糴之所耗有欲资官之钱谷而足之者然人不能皆廉于己皆志于民或遇污者彼视府库财如其财肯剗肉以补之乎必坐视其腴削而不之恤矣有委之巨室而责其成数者则不惟为富者多为仁者少憚于损己以及人且年饥谷贵彼方利之而何取于糴之乎必多端沮挠而幸其废矣有市田为庄頼租以糴者可无二者之患矣然缗钱有限歲入必防不足于糴非磨以歲月不溃于成况官市民田为弊至多水旱不时复且难保其法亦未得为尽善也然则变通之道果将安出哉湘中粒米狼戾之区民生其间本易以得食乃自近歲有司和糴之令甚严舳舻

相衔竭九郡之产而北湘人始困永之为州市民为户不过三千率多贫弱春夏之交苦于贵余绍定间郡守吴君千能积郡计之赢作均一仓自州而邑邑而野莫不有之其在州者为米二千斛命巨室更张棠余之事歲久弊生恶其害民不告于州忧寓公径以自诣常平使者易而田畴之田恶入防规约不备一二年间至无圭撮可棠民甚病焉毗陵季侯来为守愀然曰是非牧养者之责乎于是节缩浮蠹铢积寸累得缗钱五千议创一仓以救其弊防诸郡水溢为灾潭富人有抵罪于刑狱司者愿输粟五万斛赈民自赎者予许焉而以平颁之诸郡侯以书抵予曰郡被灾公移粟以赈甚大也 也无厌窃有请焉吾方建仓平余而郡力绵甚闻公食饥之后犹有余粟盍捐以助我乎予慨然复发二千斛予之未防复以书来曰赖公之力仓已落成吾将以继均一也名之曰续一谨条其规以告维今续一之创将歲歲减价以 民可不思所以维持于后乎顷受公赐市之得钱四千三百余缗合吾所积为九千三百有奇吾将以其四千余二千斛余以创抵当库名之曰平质薄其息以利贫弱之民积其赢以补余本之耗盖库之与仓犹母之权子不可以偏重也吾之余非市于民也郡计素匱每当歲杪无以支吾例听民贱价折纳田租以救目前今以续一之缗易郡仓之粟彼给于用此免于棠庶乎两得其利及其余也计库息之多寡以定米价之高下米升为钱二十库息登二百缗则升可损其一倍焉则损其二库息愈丰则棠直愈下凡一歲之息尽以补棠余之阙备后余之用官无所利焉吾又鉴均一之弊官自司其敛散度地于丽谯之北左库右仓命郡僚二人共主之一歲而代自谓规置粗备或可持久若刑狱司冬夏虑囚之际因一视之则后人愈不敢动矣虽然非公记之惧终无以谄来者况防公之 不及此公乌得无言乎予谓侯之为此盖惩均一之壞于市田而更聚之也然不诿其事于民则巨室既无所损而不至于沮挠不资其助于官则后人虽无所益而不至于腴削三弊尽去三利悉兴孟子所谓仁术侯其得之矣棠法之善复有过于此乎虽然侯之精究熟讲不使有毫髮之缺以累后人其虑可谓遠矣然予谓人生天地间一气而分仁义之心谁独无之来者而如此其必曰前人之不以累我非浅之待我立法当如是也吾不能守之而推行之而增益之顾非耻与予将见有以侯之法行于邑于野而流于无穷者是侯与人为善而千里之内皆将式谷于侯也记曰善迹者欲人继其行善歌者欲人继其声呜呼侯之迹善矣继其行者盍亦深念之哉侯名晞顔尝有位于朝其治郡也专以诗书为政故其功迹类多可纪云

湘乡县平济仓记

予尝患州县之间选懦罢软者多强敏肃给者少晦昧昏塞者多防達浚明者少贪沓污秽者多廉洁清介者少媮合容身者多直谅不挠者少卑下无志者多高遠自期者少以为有皇帝岂果憎民乎哉何其诞降此种布在世间使之刃靡刻轹吾民而曾不少惜也然则混混同流之中得一次山得一子骏有志于民者能不惊喜而叹之乎此令狐立道属记其所为仓予所为欣笔也湘乡为潭剧邑前有庸令芜秽不治吏倚为奸百里之人如坐幽居予既黜令诛吏而新令不时至立道方迟次宜章强之摄焉至则修壞植僵亡防何皆井井就绪以书来曰震已摄承且八阅月愚亡以称使令攷诸壁记摄官居十七八县之頽废以此彼持苟且心视邑如蓬庐视民如俎豆属厌而已肯以同胞为念哉县有平棠二仓各为米千石距今未十年羽化已三之二思欲究极其弊而补完之吏去其籍新令且至卒未可为乃节缩浮蠹得钱二百三十万计可余千石别为仓名曰平济痛惩往弊更立新规以其钱属之丞为籍择邑之巨

室二十三家家赋十万俾及时以糴储米于其家官不复置厥先糴为期命输米于丞之治寺民持券至者米出钱入皆巨室躬任之吏毋得与既事复持钱以归听贸易取息官毋问其出入第及期责米而已将糴丞先以市价白县县斟酌之务在稍平于私而无耗于本县总其纲丞治其详民任其寔糴以粒上不藏于官无侵移之弊无敷配之扰无徒胥之费无折阅之患一举而四利兼焉掌糴者二年而代徧则复为丞秩满县核余本之在民者无耗乃白州听其去上下相维丝牵绳联庶乎久而勿坏吾之为此非不恤后人竭府库财而以干誉也外是钱谷视始至犹不啻数倍事至不为吾恐既去终为乌有而民不防其利虽然亦安保其往也公盍为我记之鼎铭昭揭魑魅莫近或可 此土于无穷乎予知立道固久闻其是举益以叹息今之长民者渴日以自肥往往终其去无一善可录立道摄邑甫数月在他人数十年不能为之事已谈笑而道之且其规置缜密详善可以为法西南之士固多廉直才者立道抑其尤与来者诚能守而勿失复取昔之羽化而仅存者槩 剔蠹放其规橛而改作焉推广增益三仓鼎峙以偿立道不及为之志吾见此邑之人不知有饥歳矣正月之诗曰念我独兮忧心殷殷其乱曰民今之无禄天天是稼君子孤特而无同志以助为善小人贪利而为夭孽以稼害民此诗人之所叹呜呼来者其亦念之哉

淳安县修狱记

古者于狱秋气肃杀则善治之冬气闭藏复增筑焉所以上顺天时而下全民命也凡民得罪而丽于狱皆其自取圣人哀矜惻怛之心岂有已哉听以五声讯以三刺蔽以两辞附以八辟亦既谨且重矣至于居囚之地复设官以司之因时以葺之使负罪以至者有以庇身不毙于瘐不堪于幽以待论决呜呼何其仁也淳安县治自方防平更剏距今百三十年他宇时缮犹足枝梧独狱户頽甚县尹虞君始至承前人废弛之余死罪充斥株送以百数梁腐榱倾势且压愀然矜之于是穷日夜力以成狱辞轻者平反重者论报亡防何而圉空则又色然而喜曰修狱之机不可失也亟请于郡求捐金谷给费且节缩浮费以县余财佐之悉彻旧屋改造十五楹中辟之所扁以泽物囚舍防豁无湫底之患圉墙坚密无越逸之虞规摹眎旧加壮鳩工于淳祐六年七月断手于明年九月以书来曰章侯给费既成其始矣公为记之是成其终也予谓古人缮狱之义虞君既深得之何待予言虽然愿有复焉狱之为文夹以两犬而迫之使言是小人瘐罪者所宜居非善人君子所当至也然世壞刑濫善人有时而不免焉故西伯拘于羑里绛侯囚于请室魏其衣赭关三木灌夫受辱居室太史公言之絶痛治狱而至于此则几何不至玉石俱焚善人将无所恃矣继自今来者其能于谳议之间致其忠爱悉其聪明使衅累服刑善良无枉是为贤尹缮狱以待有罪之意不然报虐以威无世在下天道神明至难欺也可不甚惧矣乎虞君名觐乾道宰相忠肃雍公之曾孙予季父鹤山先生之壻鹤山谪渠阳时从游最久学有师承故其为政知所先后云

江东提刑司新创药局义阡记

予尝病近世士大夫不知职分为连帅者曰缮甲治兵式遏防虐吾之职也 养非吾事也主转漕者曰总揽利权毋乏供馈吾之职也 养非吾事也治刑狱者曰谳平岸狱使民不冤吾之职也 养非吾事也任常平者摘山煮海以佐国用吾之职也 养非吾事也呜呼是得为

知其职分矣乎夫设官分职各司其事人之职分而即天之职分也何谓天之职分仁是也惟人之生一气而分防独困苦举吾兄弟哀矜而振德之虽穷为士且曰吾职况有位乎居其位而交委其责然则蚩蚩者将听其自生自死而已乎吾友王元敬按刑江东寔政悉举水毁之际闾里大疫病无药以疗死无地以 元敬蹙然曰是非吾职乎三代之民疾病相扶持死丧相埋 力足相及者有常产也今吾民贫到骨病则敛手待亡死则蓬颗无托吾不受以为责不负天乎不负君乎乃捐司存羨钱百万创业药局制急于民用者凡五十品民有疾咸得赴局就医切脉给药以归复益以没官田歲收其入增市药物定其规约令幕友三人更主之既又以官田易浮图山地三百余畝为之莹域画成井界 者人授一丈次第而给植之松柏以滋荫樾繚之墙垣以杜樵采于是病者得不死死得所归既成书来属予记之予谓元敬以刑狱使者为是可谓真知职分者由其从事朱子之学而知用力于仁故能若是圣贤虽不轻以仁许人然曰近仁曰仁之方曰仁之端则是固可得而勉元敬所行非其近与其方与其端与元敬哀鰥折狱仁闻甚着今又疚心民瘼笃近举遠可谓善推其所为矣俛焉孳孳力行无倦吾见寔意孚于所部而列郡仰以为师流风達于四境而他路取以为法夫如是则放诸东西南北孰非吾仁而先儒所谓以天地万物为一体者亦不外是矣诗曰不解于位民之攸暨又曰其仪不忒正是四国元敬其 勉之哉元敬名泌淳熙宰相文定公之后尝为宰掾侃侃有守搢绅称之歷官可纪盖得之家法云

跃龙桥记

古者春夏水盈则以舟涉秋冬水涸则以梁济无一定之梁也孟子曰十一月徒杠成十二月輿梁成周语曰天根见而水涸水涸而梁成月令及王居明堂礼所记大率皆然且比舟为之役易费轻无废壞之病后世则不然伐石为砮以与水鬪幸而无败犹数十年乃成甚者从而屋之役劳费伙徒诧美观一遇水溢前功俱废政宣间以河桥一年一修为病始造木桥不数年而壞不知古者之梁不如是也邵故有跃龙桥绍定间鹤山魏公为之记言其叠石为七 歷五郡守十年乃成其劳甚矣未五六年而毀胡侯穎修之十余年又毀于是宋侯仲锡寔来慨民病涉銳意成之桥旧横亘三十丈水败之余视旧加长命工伐石增磬驾梁其上为屋凡三十楹规置雄丽气象显设木市于诸乡工僦于他郡夫取于佃官田之丁役成而民不知钱以缗计二千五百有奇米以斛计千二百有奇皆樽节少府用度而为之是更数守歷十余歲乃成者侯成于朞月之间邦人咨嗟言昔未见乃来求记于予予谓侯于是役其功伟矣夫囿于天地之间凡有形者未有久而不壞况其易壞者乎然有道以维持之则犹或可久圣人于九功之成戒之董之劝之俾之勿壞其无穷之心可见矣继自今来者能申严厉禁以防圯毀儲峙材用以待繕修孜孜戒备毋或怠废而又反求其本平吾政刑和吾教令以弭在天旱干水溢之害桥其有不固乎是役也録事参军周君应星实董其事桥成而宋侯去告于今之州长而相与共勉实有望于周君云

钱塘南山开化寺记

钱塘奥区竺干之宫鳞萃概布不可称数也南山之阳有寺曰开化爰自妙智禅师慧信被遇寿星圣帝赐对便殿问以至事奇珍锡予天渥便蕃师归因卓一牛鸣地为庵祝延曼寿寺于

是始基嘉泰间陈淑妃尤重师尚方之资视前益多繇是遐迩慕向只金輶辚迺拓其庐广盱营表以成胜利请于朝愿以开化为额诏许之于是其徒闻风驱锡至田确而寡 醕不贍嘉泰改元慈懿太后始斥长乐余资命市溉田厚其饶给用能百年间九灯相传以迄于今其勤劳亦至矣然尚有未愜快者处险不厰山门卑侧隘陋与宫弗称太傅平章贾公闻而叹曰此累圣所成就也捐缙市傍近地十三丈有奇彻而新之高廊四柱为楹十余复以余财葺缮法宇周阿峻严列楹齐同至是秋毫无遗恨矣落成主僧妙行介予表弟壻御带杨君亮节求为之记予谢曰柳柳州蘓文忠平生喜作寺记其深明世典下笔沛然予于戒壻慧戸咸所未達若之何措辞杨君曰非此之谓也师欲得公文以侈上赐且述締创之难俾后来者谨孚修飾以保守于无穷而已予曰若然者不敢以恟愁辞遂书以为记

顺庵记

淳祐七年春余来守严嘉禾张君澄为郡别驾望之气和而色平即之坦如知其有养君子也间为余曰吾即先人之庐除一室焉布席藏书名以顺庵子为我记之予曰何哉子所谓顺者曰吾涉世久夷险之途通塞之节憾忻之情淹速之度尝之备矣吾皆顺之不敢二其心自谓颇有得于是然能勉而未能安微子警之惧吾守之不固也予曰懿哉名乎斯中庸素位之說西铭存事之义閎遠防妙非予所及也盍求诸有道之士乎张君请弗置既归逾年复移文以徵其勤至如是曷敢以浅薄辞闻之师曰天地之间纷轮胶轕升降无穷者谓之游气是气也播于阴阳转于五行错杂不齐故其赋予人有渥泊贞脆修短清浊之异然而莫非命也圣人与天为一随遇而安其達也有天下而不与其穷也饭糗茹草若将终身顺命不足以言之也君子则畏天命修身以俟死得位与时曰天将以任我也兢业处之而不敢康贫贱患难曰天将以成我也敬共受之而弗敢愠所遇虽殊君子盖无入而不自得焉自性命之学不明世之昧者始介夫拙信之感以失其忧乐之正知欲之根于性而不知性之由于命事苟适愿懽欣踊跃防无所容所薪一乖顛顛怵迫且至祈死焉乌呼此非仲尼所谓不受命者乎夫人之行世遭有顺逆理也然自有道者观之则惟见其顺而不见其逆何则以其能一之也故赤舄几几周公不以四国流言易其常讲诵 歌仲尼不以菜色陈蔡愆其素事之触吾前者播撼挫握至无已也而吾一切以顺待之循分乐天无秋毫不自慊之意设之心和而平措诸体安而舒绰绰然休休然有天地变化草木蕃之气象非明乎体信達顺之道者其孰能知之予也昔尝有志于是顾忧患怵之欲勉焉未能也因张君之属姑诵所闻以相反复亦将以自厉云尔

温乐堂记

景定三年冬予得西邻废屋十余楹彻之以益故园命之曰老圃留其中一堂因而葺之慕司马公名园之义扁之曰温乐艺花种竹防沼架亭若将终身焉客有过予曰子之名堂则善矣吾有三疑焉司马公龙卧洛波盖当熙丰大往小来之时也今子当眼丁防去勲臣顛国之时曷为不见而隱乎公之去也天下名士大夫咸在涧阿故其退为合于义今世之号为善类者皆在穀中矣吾子僂僂踽踽之外岂复有穷居之乐乎公以争新法力辞副枢不拜而去天下高之今子自触臯辜錮于圣世视公不大有迳庭乎夫公天下大老百世之师也子乐其乐殆

防于僭矣予应之曰子之疑是也予独无說乎今化瑟更张贤能毕用与熙丰似有间矣然人之退处亦各有志程子曰士之高尚非一道也有懷抱道德不偶于时高洁自守者有知止足之道退而自保者有量能度分安于不求者然则岂必皆天地闭而后隱哉今弓旌四出众正毕登子所谓号为善类者莫不愿立于朝矣然尧舜在上下有巢由周室方兴夷齐饿死子谓今日朝多君子山泽之间遂无肥遁之士乎且予当寶祐间辞大农者八辞大蓬者三羣小恶其崛强诬而防之子谓出于朱熹沈炎何梦然之口者果为公论乎然则子之所疑者皆不足疑也况法舜则为舜希顏则为顏见贤思齐尚友论世圣贤之所许也其何僭之有虽然子亦尝闻独之义乎夫君子而处于独世道之不幸也易曰素履之往独行愿也诗曰念我独兮忧心慙慙孟子曰穷则独善其身达则兼善天下屈原曰举世皆浊我独清夫易之君子穷居在下而莫之与故独致其忧孟軻独善战国之世也屈子独清懷王之时也温公独乐王吕用事之际也使易之君子上有大臣之应诗之君子生当西周之时孟子說合于齐梁屈子身遇乎庄昭温公道行于元祐而犹以独为高焉则谬矣然而我则异于是盖数君子之独也独于所当独之时而我之独也独于羣贤入彀非所当独之日也如众星丽天而熠燿宵行如四灵毕至而一狗防家如万木向荣而枯杨偃地非前五者之比然初无害于吾之乐春秋之义不嫌同辞然则非温公之时而乐温公之乐何不可哉太史公曰诗有之高山仰止景行行止虽不能至然心乡往之名堂之义如此而已子母多事既告或人遂书以为记四年正月壬辰记

所斋记

予弟不器甫以所名斋书来言曰昔者鹤山季父为我名而书之蜀有兵难扁燬于火鹤山薨谢记亦无所属再题而阐其义舍兄其谁予老矣书学久废经义复芜其何以复之虽然昔者盖尝讲于此矣试相与订焉夫所者果何所耶亦观诸易与大学则思过半矣易曰艮其背不获其身行其庭不见其人盖艮者不动之义背者不动之物艮于背者止于当止之地也止于当止之地则是义理至当不可移易内不见我外不见人惟见义理而夫子释之曰艮其止止其所也夫不言其背而言艮其止者止即背也止其所者以止释艮以所释背也然则艮也背也止也所也四者一而已矣皆义理至当之地也若夫大学知止之义则又与物相为表里者而曰在止于至善则当止之所舍至善又何之乎故曰为人君止于仁为人臣止于敬为人子止于孝为人父止于慈然则仁者君之所也敬者臣之所也孝者子之所也慈者父之所也一去于是则为失其居矣然而大学特举其大者焉尔引而伸之天下何一物而无当止之所乎故有孚威如治家之所也清心寡欲养生之所也教以义方爱子之所也量入为出用财之所也以是观之所之为义不亦大且博乎书曰五皇极皇建其有极诗曰天生蒸民有物有则极者义理至极之地则者天彝自然之法此二者与所同寔而异名尽此道者非圣贤不能吾侪苟未至于自暴自弃则俯焉孳孳求造其所可不务乎不器甫公侯之世也流落不偶室如悬磬而曾无防微见于顏面可谓知所止矣扩而充之日用常行之间非其所不居非其止不止以尽乎易大学书诗之义则居是斋睹是扁庶防无愧而鹤山之所以望子者可无负矣乌虬其亦 敬之哉

序

沧洲先生奏议序

人臣之告君辞直而气和则上之听之也易非曰俯就量入论议之体当如是也孔子曰君子义以为质孙以出之又曰恶讦以为直者泰陵亲政范太史苏文忠相约上疏已而蘓公见范公之章曰公之文经世之文也轼于朝廷文字失于过当不若公言之皆可行也遂附名同奏蘓公平生忠义慷慨如秋霜烈日之严今其言如此岂非人臣告君之大法哉故刑部尚书眉山程公端平淳祐之间论谏数十自下麴上莫不恺切言人所难然其词反覆曲折足以周尽事理其气忠厚惻怛足以感悟上心不沽激以近名不矫亢以惊俗而其爱君忧国之心蔼然自有不可及者故搢绅士大夫挹其风采钦其议论如麟鳳瑞世莫不爱慕之呜呼圣人所谓有德者必有言其公之谓乎公之 也某尝以诗相挽曰尽言田表圣和气范淳夫其孙绳翁拜且泣曰此实録也非公孰知吾祖父者奏议成编久矣叙于首简其敢他属斯得性狂且戇动与世忤视公之直而温绞而婉有愧焉而公不察其愚常以直道许之每每诵言于众公没之后小人无知乃或诬公与斯得异识者咸切齿之故于绳翁之请不敢固辞非惟求附不朽亦将以破小人之欺洗九原之恨焉耳公名许字季与四海人士识与不识皆称之曰沧洲先生

葛德卿篆注两千文序

古者造字本谓之六书成字而别之谓之六体六书不可一也一则凿六体不可一也一则乱通乎此始可与论书矣夫篆六体之一也而六书备焉六书之凿昉乎荆舒六体之乱则今天下之为书者皆是也所谓六体有古有奇有篆有 有缪有虫今之为书者则一之予观葛德卿篆两千文其书学之惟精惟一者乎何以言之以其为斯水之忠臣故也昔予学篆于鹤山翁问以秘诀翁曰汝闻柳柳州之论文乎谨勿怪勿杂而已惟书亦然予服膺焉今羸老焚弃笔砚久矣德卿介吾友刘养源属序其编观其笔迹甚法而媚故技痒书此德卿试与从事于斯者印之是乎否乎其以告乎我也

白氏长庆集序

予早歲读白傅诗疑其得之太易若寡深沉之思者不深嗜也晚见世之为诗者钻研太工虽清越可喜而沉浸醲郁之风衰矣乃复取白集日繙十数纸则见其温柔平淡冲旷坦夷凡世之肩摩毂击而争者视之泊如也然后知其见远识微一时之士皆莫能及其生平交友如元微之刘梦得辈文章虽畧相似而心事则判然殊矣公平生凡五弃官姑蘓来归年方五十有八已无复当世志优游退避啸傲泉石几二十年朝廷尝强起之尹洛师非其志也抑观其诗颇悼世涂吕梁太行之艰触事生感屡致其意岂其尚友蠡潜而非果于忘世者欤或又谓公晚歲嗜浮图采剧而风情亦不少衰二者相背而驰公则一之不知此其所以为達也呜呼稀矣是岂易与俗人言哉诗凡三千余篇予老不能悉记摭其尤者日讽咏之且以授季女凡五百九十五篇为十卷云

东臯子诗序

黄岩戴复古式之持其先人东臯子诗一编过余而言曰余先人平生嗜诗没时余防藁无一存少长乃得一首一联于竹所先生徐渊子其后尽力得九篇余皆散佚无可复访夫逸者固已无可奈何其仅存者非有所托是又将逸矣盍置一谈于篇端与吾先人以不朽乎余谢不敢当请益力受而读之见其诗风度雅邃防趣和平发言成章不假雕琢盖庶防乎所谓落落穆穆者然玩绎移晷不能去手又以知文于天地间未有无其绪而传者式之之昌其诗殆出于此乎虽然式之之显其亲不托于其可托非也昔吴武陵奉其先人文集属序于柳柳州既亟称之且谓古之太史必求民风陈诗以献于法宫近世未能尽用古道故吴君之行不昭而其辞不荐余谓吴君之诗虽不得献于法宫有柳州以题其首简其为昭且荐也多矣今世虽无柳州要必有执斯文牛耳者式之其往谒焉余言未足托也姑识于篇末云

秀岩先生三礼辨后序

嘉定间季父鹤山先生衔恤里居以书帛至临邛李先生坤臣共读周礼予时以诸生执经坐下每见二先生以礼文残阙汉儒穿凿附防为叹鹤山因言秀岩李公着三礼辨据仪周二礼正大小戴郑王孔贾之谬有补礼学为多李先生深欲见之竟不可得盖是时成甫三年其传未广故尔后十年予登先生之门始得而观之则见其于众說纷乱之中一切徵之以经裁之以理如法家持律以断狱讼精审愜当无一毫牵合臆决之处至于典礼之大者如郊丘明堂庙制官名刑辟征赋车服宫室之类莫不引而伸之下贯歷代以及国朝于是古今典章制度得失之故莫不粲然可见呜呼此岂汉魏以来陋儒俗学驰骋于训诂之末流者可得而及乎书故盛行燬于兵难学者罕见予将指湘中乃因暇日手自雠校以刻诸梓庶防礼乐衰防之后读是书者可得其门而入尚庶防先生立言垂世之志云

耻堂存稿卷五

宋 高斯得 撰

书事

书咸淳五年事

咸淳五年夏四月平章军国事贾似道抗章请去其辞有曰壬辰之吉陛下集英宴羣臣奏事内幄首防清问天颜愀然继以号恸甚而施非所当施之礼使臣震灼俯伏无地自容廷瞻为骇谓何为至此极也先是似道因辞两宫圣节之赐微寓去意以要人主故上于内宴之日恸哭而留之已而宰执侍从台谏卿监以下皆拜疏请留二相之疏有云书曰监我士师工诞保文武受民乱为四辅是成王亦以羣臣之留留周公也侍从之疏有云上而二揆下而百司庶府又下而戴绂垂纓之士举三军万姓下至闾巷小夫窶人童儿孺子疾首蹙頞不谋同辞惟恐师相之一日而去此位也台谏之疏有曰岂特陛下愿其留二相愿其留羣工百执愿其留至于六军万姓莫不愿留则留者人心之所同然也斯得览之至此怆然而痛曰嗟乎此汉庭羣臣颂莽功德之气象也曷为见于盛世哉莽之辞封也前后上书者四十八万七千五百七十二人及诸侯王公列侯宗室见者皆叩头言宜亟加赏于安汉公史详书之所以为世戒也今章鉴翁合之徒无所忌憚如此杂诸莽传谁能辨之成王之留周公也以叔父之尊泊然无欲故举天下以付之而不疑监我士师工云者欲周公之留使百官有所监观以取法耳岂以羣臣之留留周公之谓乎大圣人之事而使后世戚里之家贪私之人得以借口其徒又凿圣经以盖其附下之失书之史策宁不貽笑万世乎且昔之奸臣若崇观之京绍兴之桧嘉定之弥逵未尝不贪权位也然安其为奸邪而不敢求名似道则不然每二三歲必一求去内以要君外邀名誉每一求去披猖矫誨使上下皇扰从而后定甚至使人主仓皇迫遽匍匐恸哭不知贪嗜权势聚敛积实仇视正人畏恶偏已惟恐一朝夺其腐防如是而言去人之视已如见其肺肝而可欺乎似道每谓人曰已未之冬事已去矣至于今日皆我力也故防扈恣睢无所不至而其徒黄万石輩亦曰今日之天下贾氏再造之功也安得不从其欲安得轻使之去万口一谈牢不可破昔刘裕之篡晋也晋帝谓左右曰桓 之时天命已改重为刘公所延将二十载今日之事本所甘心似道恃功之心安知不若是也善乎程颐之言也人臣之道由其位而能为者皆所当为也岂得挟此骄主谓相位为已物乎况已未之事人皆谓蜀将王坚之功彼方窜伏草间率兵自退适防其成功焉尔或曰似道虽奸凶然粗习疆事且能力制人主之欲不可无也斯得以为不然似道之进虽以边为援然实无所能日者敌犯东淮大掠而去能发一矢以却其师乎方城汉水断我荆襄能出一兵以隳其城乎孟子曰惟大人能格君心之非诗曰德輶如毛民鲜克举之我仪图之维仲山甫举之袞职有阙维仲山甫补之格非之事非大人不能仲山甫能自举其德故可以补人君之阙岂有一饔飧淫秽之夫而能以道制人主之欲乎呜呼京之奸陈瓘挂之桧之凶胡铨折之弥逵之専真德秀魏了翁排之堂堂天朝无一人发似道之奸诈方且相与仇仇执之使遂其所大欲而后已志士仁人虽有绕朝之防亦安所施悲夫贾似道大逆不道留梦炎拟防取问事

贾似道既窜岭表有司簿录其家绍兴守臣索得四时御衣玉玺玉带及与臣陈奕吕文焕刘整等交通蜡书凡百余项具以闻给事中黄镛等奏似道大逆不道乞命有司即讯明正典刑三子三孙依律定罪诏将作监簿周郴取问具奏孤臣高斯得闻之仰天恸哭而言曰呜呼痛哉此何等罪名不穷治而但取问也太皇太后处于深宫之中不肯与羣臣相接故中外之情不通而留梦炎得凭谢堂为奸拟防取问而致此大误也春秋之义人臣无将将而诛之将者有邪谋而未发之谓汉书黥布谋反有端发兵加诛端者有端倪而未尝之谓今反具彰彰如此岂但将与有端而已哉乃不行给舍即讯明正典刑之请问之梦炎敢于不恤物议不顾国法如此春秋见贼不讨是谓贼党义戈所指梦炎无辞于诛矣似道柄国十五年浊乱天下兆衅起祸当斥而不斥总戎遇敌不战溃师欲以倾覆宗社当诛而不诛今复大逆不道欲覆赵氏之宗絶赵氏之祀当族而不族自非母后防主之世奸人当国何失刑至是呜呼痛哉呜呼痛哉

书留梦炎见逐本末

先是五月二十八日命将出师而无督将予以问陈王二相陈揆云连日正与左相议此事今耻堂得我心之同然深用敬服恐无出留中斋下此则难其人及梦炎自长沙至予以闻于二相者问梦炎二相尝及此乎梦炎曰屡及之岂惟二相太皇太后因赐诏亦屡及之已而久不出命梦炎寻为右相予上疏引绍兴故事乞催右相出视师不报越三日再上疏趣之梦炎大恨有见逐意然未有以发也防新彘绍兴俞晰上疏劾谢堂等九人论十五事颇侵陈相而京学生刘九皋等上书攻陈相事辞多与晰合陈相上疏自辨而去梦炎遂驳新彘之疏所论皆不行薄暮内批王燾罢平章军国重事高斯得依旧职予祠俞晰大理少卿晰摇陈相而予两疏留之事正相反梦炎乘间以予杂防稽党中为若以党王燾得罪欲以欺不知者其奸险如此故具识之

题防

防冯侍中拯所得真宗皇帝御制

国家当祥符天禧间方隅晏清海内殷富宜有遊豫之事然真庙元夕御制所歌咏者民熙时泰率土多欢蔼然乐以天下之意与丰亨豫大者异矣呜呼此季世也缅想祖宗盛际如四时之春其犹可得见乎

防赵遹所受徽宗皇帝御笔

延康殿学士赵遹行事班班载于国史遹尝两帅真定其始帅也奏不可轻信童贯规取全燕以开边隙其再帅也奏不可谓敌人不知存亡遽增边戍以兆衅端二奏皆恳切有忠君忧国之诚独所谓谏伐辽之疏载于北盟编者则未见岂太史氏网罗放失有未至乎政和间童贯谋北伐诸路已调兵矣防陶悦使敌还言敌未有衅徽庙乃诏防边儆那军兵上边防托指挥更不施行今阅遹所受御笔即此时所降也遹在真定时北事有萌而未盛遹去事始大炽呜

呼使当时受任之臣皆如邇之老成持重不徇奸臣中天之祸岂至此哉景定四年秋九月前史官臣高斯得拜手谨书

防黄给事钩所藏孝宗皇帝御制

臣尝伏读国史乾道四年二月庚子孝宗皇帝出御制春赋以示大臣言农事方兴要使无失其时盖与七月之诗相为表里今观赐臣钩等苑中即事诗感念春和有与民同乐之句其月庚戌也上距春赋之出十日而近是时讲解初定域中晏然时和歲丰百姓安乐而孝皇留意民事如此其后干淳二十年间阜康之美比迹成康猗欤盛哉后七十有九年歲在壬子十有二月前史官臣高斯得拜手谨书

防范文正公帖

近世士大夫以覲举为常同气之间有一显者则为其弟兄请寄营画不得止文正范公遗其兄书既以举主为问矣乃以防微谨末不必预圖勉之文正之爱其兄亦异乎世俗之爱其兄矣乌乎是不足以观世道乎

防朱文公与刘静春帖【原注專言戊申去国之事】

呜呼先生古之大人也而林栗诋其傲慢沈继祖斥其不孝千载之下将惟先生之信抑二僉人之信乎斯得之愚于先生相万也戊申按吏浙东或者谬称其似乃今萧泰来以倨傲不孝见劾复与先生同宁得不荷之以为荣乎三复遗帖慨然以叹因拜手书于其后

防南轩所书愉色堂

南轩先生名零陵唐氏之堂曰愉色其孙亮微予言发其义予谓圣贤之言事亲类微于色曰色难曰下气怡色曰愉色婉容夫外不足以信内于色乎何取譬之木焉爱其根也色其华也木之根深固其韡韡之象发见于外者詎可遏乎故爱亲之深者色不期愉而自愉否则虽勉强致饰其诚中形外有不得而揜矣然则为人子者欲学闵曾盍想见其形容而用力焉

防南轩永州诸诗

杜子美诗自二十一歲以后韩退之二十五歲以后欧阳永叔苏子瞻二十六歲以后皆载集中至今读者谁敢以少作少之惟刘禹锡编柳子厚诗断自永州以后少作不錄一篇故柳诗比韩欧苏诗少而加严南轩先生永州所题三亭陆山诸诗时方二十余歲兴寄已落落穆穆如此然求之集中则咸无焉岂编次者以柳集之法裁之乎昆采夜光要为可宝唐君其谨藏之

防赵忠简公诗帖

中兴宰相虽多名相忠定李公忠肃范公忠简赵公忠献张公四人而已世惟见其勲德焜耀不可企及而不知文章余事亦皆絶人忠定钜集盛行于世有不待论忠肃当靖康建炎间有诗云四海已无容足地百年空抱济时心当时诵之忠献清音堂诗其传尤广斯得曩从二公子孙获观手迹独忠简所着未之见也今乃于其曾孙仁和宰壁得五诗读之益以慨然虽然见乎事见乎辞非有二致欲观数公勲业诵其诗则知之矣

防胡嘉七思诗

鹤山先生尝言国朝名公钜儒有不必要皆自科举而由学校进者絶鲜其敝务以科举组缀之文糜烂士气揣摩迎合之说极丧心术予昔着籍其间而知信然大率蔡京太学之法害之士由之而不知耳胡君去太学二十年犹不已于思懷君养之仁念羣居之乐则可矣若曰成才乎是而不忘其本则吾不知也观者毋以反骚诮之

防鹤山送魏显道西归诗

表兄魏显道宝庆间省鹤山于靖州其归也鹤山赋诗六章送之大率勉以问学绍定间斯得亦往省临去赠言有无限工夫归语尔之句与海显道盖一意也苏文忠在黄冈兄子安节省之其归也送以十四诗不过劳其远来属之家事而已鹤山独勉励后进如此循诱之心今犹可识也抚卷为之三叹

防郭鎰所藏二父帖

先生与沈黎叔父后先入四川制幕与章赣郭君鎰为僚今五十年矣而书尺宛然予时为益昌掾吏楷一牋亦系予后呜呼何好事如此哉使子弟才识下则覆酱瓿久矣郭君外孙衡山尉赵若株不遠二千里特以求识读之慨然书其末而归之

题池氏所藏四君子帖【原注朱文公吕大愚项平庵袁絜斋】

熟观四君子之帖其于池君圣夫切而磋之至矣而朱文公之训尤凛乎其可畏焉昔之所谓师友者盖如此池君既衣德言以就德性复宝是帖以绍子孙则其笃信好学之诚亦可尚矣呜呼狭隘而不能恢广昏陋而无所发明朱门高弟犹有此病而况吾侪当今之世犹有能订而砭之者乎否也

题常氏家传后

本朝大奸元恶孰有出于京桧者敏节公父子后先排击不遗余力竟遭废絀流落以死而中执法身后子孙几得奇祸自当时观之阨穷甚矣然一门大节载在青史与日月争光至今读之使人凛凛有生气然则小人尽力排君子无能为损祇增其光耀而已中执法之曾孙棐摭信史志状诸公之文作为家乘则知常氏世德遠有源流至敏节公父子而始大棐属予书其

后伏读叹息之余拜手以识太史公曰诗有之高山仰止景行行止虽不能至然心乡往之呜呼吾侪可不务乎

题姚氏观敬亭记后

古者墓藏庙祭所以辨阴阳形气之分不可乱也周官祭墓为尸盖非墓祭故余于姚氏墓亭之扁窃有疑焉虽然孝子之敬其亲无死生朝暮之间也一出言一举足敬无不在岂必祭而后可以观之哉名亭之义悦以是引而伸之庶乎其可

题建安李演风露吟小稿

甚矣诗之难也严而不陷平而不俚清而不泊幽而不昧乃可以言诗今之为之者不然险涩以为严凡近以为平寒苦以为清黯黩以为幽李君之诗庶乎无四病矣予读之尽编意欣欣焉抑礧诸错诸使圆美流转如弹丸则无以加矣书其后而归之

题长兴李王显应集序

前牒所志结草亢回为厉杀贼之事皆酬恩报德而然王年十七去浙度淮遇疾而死乃为明神庙食其地国有疆事輒燁威灵其迹显著朝廷嘉之封以王爵先儒所谓无所为而为之者兹其是与予过江阴之青阳王裔孙辰一家焉一方敬之见輒众手加额其遗风余烈尚若此辰一求识王遗事因书其后

题李振介轩

世之论介者大率以为坚彊孤陋人所难能之行不知义理至于确然而不可易者即介也何难能之有人为私欲所屈外物所移往往失其常守而以申徒狄屈大夫之伦为不可几及亦自待之凉矣予同年生李君振仕闽中遇事不可回夺庸斋赵公以介名其轩求予发其义予谓之曰子学易乎豫介于石独于六二言之夫六二中正之爻也然则介非坚彊孤陋而为义理之当然诎不信乎子循理而行毋违中正介在其中矣李君曰善为我书之吾将从事焉

书钦承天闲道錄后

异端之害横流于天下总其要归两端而已智者惑其说愚者沐其利沐其利者其害浅惑其说者其害深沐其利者非惟不可救亦不足救也圣贤所为被髮纓冠辟而辟之者此而已矣然苟无其本徒呶呶以噪之则反为所贱是擅之势而助之攻也且彼方挟近似于吾者以为重銜吾之所不如者以为高吾能辨其所以异者以折之勉其所如者以胜之彼犹未肯厥角稽首也而以口舌争之则可乎呜呼道丧有间矣其轶于他说者鲜不溺焉钦君独能集儒先之说以闲之其志亦勤矣然吾谓当以申公告武帝者为本而以是编羽翼之其庶几乎

防李秀岩先生学易编诵诗训

秀岩先生近世大儒也世徒见其论著藏于明堂石室金匱玉版遂以良史目之不知先生中年以后穷极道奥经术之邃有非近世学士大夫所能及者又其天质彊敏絶人三礼辩二十余万言二百日而成学易编二百八十日而成诵诗训亦逾年而成考订郑王孔贾之谬折中张程吕朱之說精切的当有功于学者为多斯得受业于门每念有以广其传者来守桐江首以诗易二首刻之与同志共其如礼学诸书文字颇多倘未以罪去当陆续以壽梓云

防赵和仲【顺孙】近思錄精义

圣人之道载于经者浩乎其无涯朱吕二公惧学者不得其门而入也掇周程张子之书要切者錄焉使为求端用力之地故名之曰近思读者犹以其义奥而难知也复摭朱子语言文字之及乎此者以发明之然或错以已說或搜辑未广不若赵君此编之精而备也朱子尝言四子六经之阶梯近思录四子之阶梯然则是编也又近思錄之阶梯乎虽然书之备固学者之幸亦学者之甚不幸也天下至赜之理不待研究开卷得之其肯复加沈潜之功乎程子曰信有二有信人者有自信者信人者未必真知自信则不可夺呜呼防哉言也吾侪可不勉乎故善学者必先竭吾心思深探力索待其跃如乃以先儒之言决之庶乎其有得也

性理防求防

大学中庸语孟诸书先儒之說甚备朱子后出从而折中平实精深毫髮无遗恨矣独患学者不能谨守而务为新巧以凿之黎晋甫作性理防求出入朱子之书无一字不据依可谓笃信好学者后生得之习其文义涂辙不差由是以读圣人之书可无穿凿駁杂之病矣易曰防亨以亨行时中也防有可亨之理教者以亨道行之在当其可而已予谓是书施于十五志学时为宜不然则躐等而渎防矣

防南轩双鳳亭记

乌虬先生闻道之早如此作是记时年甫弱冠其论文已谓非特言语之工诵读之博而已其本不过于治身其极可施用于天下此之谓至文虽晚年义精仁熟之言何以过此诗云民之靡盬谁夙知而莫成其先生之谓欤

邓中丞家集防

秀岩先生李公朝野杂记载嘉泰二年言者论近歲习伪之徒唱为攻伪之說今阴阳已分真伪已定人之趋向已正望播告中外專事忠恪奏可其年二月朔遂复赵忠定公资政殿学士徐子宜刘德修陈君举章茂猷薛象先叶正则曾无逸项平甫范文州黄商伯之流咸先后复官自便或典州宫观又削荐牒中不系伪学一节俾勿复有言时朱文公没已逾年周益公留卫公皆已秩贬还政冬十月诏文公以次对致仕闰十二月制复益公少傅卫公少保自是伪

禁稍稍解矣予始读之甚伟言者是举以为机括转移之间邪說遂止善者获伸国脉道命至于今是賴记不表出其人为深可惜及来湘中得观中丞邓公家集则知此疏乃公为察官时所奏也彭忠肃公与公往来之书称其正论侃侃扶持善类于荆榛摧折之余又深叹其措意恳惻委蛇曲折之为不易惜乎公以谪死斯事世鲜知之比年宁錄登进之时秀岩与予先后去国不知后来秉笔者果能搜罗而纪载乎否也予方被命还朝防当告之秉笔者庶几补太史氏之阙云

防赵文定公君锡行实

元祐人虽不一槩其行事亦各不同然后世望其姓名辄如麟鳳之不可及况中司纯孝之行冠冕一世当时名臣如内翰范公之伦咸所叹息称道为善有后天之道也仅一再传于今为庶且颠连困阨无以自贍呜呼岂果蓏草木果不可望其哀且仁也邪览其行事为之三叹

防朱常卿【时敏】奏橐

予昔从太史氏论次中兴四朝事见孝宗于羣臣论对多见施用不为具文尝因见上举以为告有曰孝宗每于臣僚既对次日即命大臣将上随事商榷而罢行之又因以识拔人才如王兰罗防贾光祖楼钥之流皆由此擢用卒为名臣愿陛下取法以革近年陛对具文之弊惜其未之行也今观少常朱公淳熙间奏对蜀中利害君臣往复如家人父子然立以其言付二府施行且留公立朝十年而后去拜观奏橐叹感无已呜呼干淳之盛其终弗可复见矣夫

防卢氏友于堂记

西铭之书其仁人孝子之事乎天之生物使之一本末有不实本之病也故天下罢癯残疾一有不遂于吾之孝犹为未纯况吾之真同胞而有不爱乎书云惟孝友于兄弟诗云兄弟既翕和乐且耽子曰父母其顺矣乎圣人教孝之端大率由此出门举足之不慎欲以行遠登高未有能至者也黄山卢君筑室于墓名曰友于以志其先人之训诸贤记而歌之备矣复求予言何以告之虽然人子之充其孝莫先乎是而非止于是也卢君懋哉

防邹道乡甘泉铭

此铭之作邹公井渫不食之时也其曰水不可以终止王明并受其福之谓也孰知其卒不食以取行恻亦可悲矣夫虽然是铭歲月予窃有疑焉案国史崇宁元年闰六月蔡京为公伪疏责公衡州别驾永州安置二年正月除名勒停昭州居住四年九月移汉阳军则四年正月公安得在永乎张宣公兄弟不以为疑而识名其末其又何也唐君更考详之

防林逢吉玉溪续草

刘梦得定柳州诗断自永州以后惟晏元献家本存省试诗一首人不以为允也柳州之诗孤

峭严健无可拣择其以此乎林逢吉以诗名一日示予续草一编曰吾旧所为三集已别行此近作也愿得一言识之余退食阅之名章俊语颇多三集虽未见必也斯为至矣虽然逢吉老益喜吟续藁之后攷其年数未脱藁者尚多尤余所欲见也而逢吉未肯轻出何邪然则读永州以后之诗请俟他日

防刘直孺拙逸轩记

鹤山尝云拙非圣贤所取周子疾巧之害道故为是矫世之论耳虽然即周子之义而推亦有可言者盖拙有真伪周子所取者真也拙外巧中者伪也人知巧者劳而不知以拙售巧者尤劳何则彼蹈其实而丑其名覆护掩藏惟恐其败故神愈敝也吾愿直孺务勦其伪而致养其真则得周子之意矣

防黎晋甫黄岩县楼记士人送行诗

黎晋甫之宰黄岩也以廉著称予时丞郡深敬爱之去县久矣御史陈垓恶其论事触忤时相托为邑人黎靡有子遗之诗以追诬之余守严陵律已自谓无愧去郡久矣御史周坦托为郡人十七字诗以黷货而追诋二事盖絶相似使垓坦而端人也则言足取信予与晋甫将不容于天地之间矣如其公论之所弃也则滓秽加之馨香采烈又何病焉晋甫以清献杜公之记戴王诸人之诗示余求一言以刷前耻因取余所遭者比而言之庶发观者之笑云

高李鐬征录防

蔡京茶法朝令夕改毒民甚矣然责土产于园户收引息于商人始终未尝变也近世贪吏乃敷引园户案额责偿此又京所不为毒民不愈甚乎予昔为川茶司属白使者罢之三湖李君泽民监名山场请任其事于是前弊顿除园民得息后二十年泽民辑当时所行为一编命曰高李鐬征录求予一言识其末予谓为政爱人仕者之常非有异也然出之而无本为之而无其诚未有能终始惟一者泽民去蜀仕闽孜孜民事尽力为之海隄之役一邑防利虽以是遭防废绌曾不怨悔非所谓终始惟一者乎予故于茶录之末并识其事以厉同志

书惠厚下艰难录后

予观惠君艰难录宣和间守解州金人围之城破执以去已而逃归朝廷以为御营参议官随军至淮阳遇敌而溃复率诸将诣行在所虽其受命于危难之际疆弱不敌不能成功而始终一节自归君父亦可书矣良史因事载之典册【中兴系年要录载此事】令后世知其有名宜哉载览是编为之三叹

铭

江谿习斋铭

人之知道由学之故学而不习学则不固生熟之度盍验诸心九醞味厚七入色深是以中庸贵乎弗措所谓知新弗离乎故或绎于中或体于行表里互发精义入神颜曾以之优入圣域予何人哉胡不是则

吴巽之友竹斋铭

生天地间性命于气匪人独然伊物无二维竹之生受直于天贯乎四时既劲既坚礼居大端诗美令德一言蔽之莫尚乎直潜圣论友以直为先吴子友竹吾有取焉乃貽尔铭揭置座右兴卧以之之死毋挠

赵彦金介庵铭

书名之学有防其意维介于文分而为二在人进修是曰利器以别正邪以判义利由辨之明守则不贰既固既安于石不啻彼百世师谓和之至而能凜然不可易志由择之精知得非义于乎我友斯语之事毋夺尔真毋昧尔智惠何人哉希之则是

王咏省吾斋铭

大贤省身三事而已至于吾侪又奚止此随事默察日夜以思约之又约乃至于是斯维曾入圣以是为主我友希之请事斯语

宋防如心堂铭

心涵太虚万古惟一全体大用存乎神易同人之先中直本同复观诸咸我感彼通求心之道莫尚比拟以已况人夫岂有异味者弗察曾不善惟一膜之外痒痾莫知忠中恕如本自苍颉先觉阐秘精义斯防宋叟之堂高叟铭之尚衣斯言终身行之

贊

王司封【渙】真贊

鞠躬履方择地而行在汉宜乡今有先生四海符谿先生其甥我瞻仪形鄙倍其萌

赵邠发集孟四箴贊

我读七篇有见于耻终身行之未测其沚赵子作箴其目有四孝敬善利贵贱誉毁浩乎博哉精义妙防知之实难行亦匪易维是四者有源有委升高自下适逵从迓充尔知能择尔涂轨穷达好恶皆外物耳愿循其序默察真履考致要归一而已矣我作斯贊曰能则未敢诵所闻以谗同志

答问

玉堂直日答问

子所雅言诗书执礼皆雅言也臣恭承圣问臣闻圣人教人不过日用常行之道所以使学者笃志近思不骛于高远不忽于卑近而有陵节躐等之病也雅者雅素之雅谓平日之所以常言也诗以吟咏情性使人有所感发而温厚和平书以道达政事使人明于治乱而效法监戒礼者天理之节文使人制心检身止邪防欲者也三者皆至近至切如日用饮食之不可阙故常常言之也于礼独曰执者盖诗书言其理而已礼则起居动静所执守据依者非但空言而已也故曰礼不执则不行三者圣人所常言若夫性与天道则宏远微妙孔子未尝轻以语人且此章与五十学易之章相接亦所以见易道之妙非孔子之所雅言也陛下圣学高明日御经帷儒臣所讲诵者莫非圣经贤传如布帛之文谷粟之味固不患其骛于高远而溺于凡近矣臣区区愚忠犹愿陛下即孔子之所雅言而加圣心焉二南诗之首也验之于身吾能乐而不淫乎二典书之首也体之于心吾能敬天敬民乎礼记之首曰毋不敬吾能敬以执之宫庭闲燕之时亦战兢自持不至于失坠矣乎夫如是则孔子之雅言不为空言矣陛下聪明天纵就将之从孔子之言固已默契允蹈臣不量荒陋冀以尘露增益万分惟陛下择焉

答客问

客有问于高子曰昔扬子云为官拓落而取嘲于人韩退之投闲置散而貽笑于士皆为文以解之今子坐废八年憔悴顿踣甚于二子无一言自解不已拙乎高子莞然笑曰若何言之陋二子慕君不得热中有言世称其文之奇予独怜其志之卑也子为我愿之乎自古不得志者莫若孔孟直道取困死而无悔其言曰天之将丧斯文也后死者不得与于斯文也曰夫欲平治天下当今之世舍我其谁也夫以天自断而未尝以说人孔孟之不师而扬韩之慕若何言之陋也客曰非此之谓也自东方先生以来文人才士落落于时未有不因笔墨以自见非特扬韩为然今子不足于文姑自托于圣贤为大言以欺我高则高矣而终未免于拙之谓也高子曰嘻客之要我若是予何爱于言然非耻于拙而动于激特欲客知予平生之所遇也自嘉熙以来子用于时者四绌于时者六用我者曰文清李公曰清献杜公曰丞相吴公曰丞相董公绌我者曰周坦曰萧泰来曰朱熠曰沈炎曰章鉴曰何梦然十人者其为人贤不肖皆非予所能知也夫用于时则荣绌于时则辱天下之常理也而好事者评予之用舍乃皆以为荣予甚感焉求其说而不得则彊以意揣之曰岂用我者法当惟其人绌我者法当反其类而今皆应法矣乎夫使用我者而出于开庆之大臣绌我者而出于端平之御史则予之所惧也呜呼继自今以往其复有知我如二清吴董之伦矣乎予不得而知也其复有厄我如坦泰之徒矣乎予亦不得而知也使无二清予则已矣若犹有之予虽老矣安知其终不遇哉如之何其勇于自绝而急于自解也中庸曰在下位不援上不怨天不尤人孟子曰行有不得者反求诸己而已矣予将循念往愆益求其所未至以听天之所处焉苟徒嗟卑叹老哀穷愬屈以自见于笔墨之间此特文人所为而非圣贤用舍行藏之大法也予非惟不能亦不暇客矍然曰吾以语言文字望子而子以圣贤所为自期乃今日知所进矣长揖而退

客悼

耻堂居士归自宣城客有过之者蹙额而言曰子何归之遽乎吾观一时人士流落不耦未有若子之甚者也吾尝计子之阅阅而知之子之齿于仕版且四十年矣其在内服起自史馆至于大蓬其在外服三秉州麾七乘使传歷位不为不多也然考其实则内不及五载外不过六年余皆投闲置散之时也子于等辈不为后人曷为至此哉居士笑而应之曰客知其槩未知其详也试为客言之始予有位于朝实与枢参季父同时士之有求于季父者往往津介于予一日有扣门者视之谢公方叔也时自列院出为湖南賓客意不自得予言之季父季父未及荐进也俄而自致冠豸矣又一日有扣门者视之赵公与泽也时未脱选予言之季父季父立举之又一日有徒步冲雨而来者予视之姚公希得也时自秦邸出倅当涂太守邓泳拒其来予言之季父季父言之时相易倅他郡十余年予自少蓬得罪去而牟公子才为从官属士争出其门一日赵公曰起自淮东遗予书予素才之荐于牟公云此人善议论蜀人在列者莫能及也闻者不說此四公者未遇时予皆推轂焉今一为王一为相一为执政一建大阍而予犹夫人也不特此尔淳祐之季年丞相吴公当国一日而除一蓬四着善类举手相贺盖予为少蓬牟公与徐景說李纯甫留汉辅为大小着今自景說物故之外一为执政一为内相一为侍从而予犹夫人也官窃秘监之称者十有五年职窃宝文之称者亦十有五年予之落拓如此岂特如客所云而已哉而予之所以至此予自知之客未必知也昔吾夫子于公冶长南容及史鱼蘧伯玉皆比而言之而辞气有抑扬其意若曰长之得罪虽非自取要不若南容之免于刑鱼之亢直虽曰难能要不若伯玉之为君子然则七公之所以達以履南容伯玉之行予之所以穷以蹈公冶史鱼之迹而然也然夫子所贵在彼不在此则优劣岂不较然异哉虽然姑置容冶而以蘧史论之夫子所谓卷懷者必其可懷之物也故宝可得而懷瑾可得而懷至于矢则岂可懷之哉善乎 山之说曰史鱼之如矢虽欲卷而懷之有不可得也故鱼虽不如伯玉而稟之于天者至死不变圣人犹有取焉予将挟鱼之矢以终吾身穷達得丧何足道哉于是客絶然慙曰予之志如此吾以常情测之陋矣詹尹渔父尚不足以知屈原吾安能知子哉乃怅然而去

文

谕俗文

朝廷遣使者观风一道其责重矣所以别白是非采察善恶獎厉忠信懲革浇讹耘耨强梗伸达沉滞使圣天子教化宣明德泽流布光辉灿然着于所部如皇华之光明于野然后为尽其职岂俗吏所能办哉使者受命来使闽中始至尝下教以为上四州之俗近于狠下四州之俗近于顽非鄙夷尔民而待之薄也盖入境以来所闻则然是以明相告谕庶几能改今八阅月于此矣观之讼牒固可槩见往往父子相残兄弟相贼夫妇相弃亲戚相仇较锱铢之财而兴讼至歷数载因纖芥之忿而交愬殆偏诸司虚造事端伪立契券欺诬良善瀆案公私泯泯焚焚何所不有吁使吾民至此非使者之罪乎古之良吏不事刑威民服其教至于人人有士君子之行无他身率以正而已今使者德业无闻行义不着无以表倡乃欲恃区区政刑以相纠督宜乎习俗之不厚狱讼之日滋也视周之使臣相去万万慙负职业如此朝廷设以古法绳

之不陷大譴矣乎今当春和万物更始特述所愧以谕尔民其亦少相体悉各务省循毋长鬻
顽母作奸伪母弃礼义母逆伦理母事鬪狠母恣侵渔使里闾清静田野安生四方之人将曰
闽中陶染诸先儒之风今又服其使者之教如此人之诋其顽狠者妄也夫如是上下岂不并
受其福哉使者之言非饰美观非为迂阔尔民其审聽之母忽

宁国府劝农文

太守下车两月有余风俗犹未周知然大略亦可见矣此邦土饒民顽奸谤喜讼太守欲谕教
之以积习从未能也兹歲二月以令劝农乃先进尔农而告之太守蜀人也起田中知农事为
详试为父老言蜀人治田之事方春耕作将兴父老集子弟而教之曰田事起矣一年之命系
于此时其母饮博母讼诈母嬉游母争鬪一意于耕父兄之教既先子弟之聽复谨莫不力布
种既毕四月草生同阡共陌之人通力合作耘而去之置漏以定其期擊鼓以为之节怠者有
罚趋者有赏及至盛夏烈日如火田水如汤薅耨之苦尤甚农之就功尤力人事勤尽如此故
其熟也常倍及来浙间见浙人治田比蜀中尤精土膏既发地力有余深耕熟犁壤细如麩故
其种入土坚致而不疎苗既茂矣大暑之时决去其水使日曝之固其根名曰靠田根既固矣
复车水入田名曰还水其劳如此还水之后苗日以盛虽遇旱暵可保无忧其熟也上田一畝
收五六石故谚曰苏湖熟天下足虽其田之膏腴亦由人力之尽也太守始至颇闻而农治田
失之卤莽其始种也耕之不熟地力不尽苗既殖矣不耨不耕稂莠并兴陂塘不修圩埂不固
旱不知备涝不知防则又鬪狠鬻讼以聒有司避役顽输以取迫逮心力既分不得專一是以
虽号乐土连歲不登由此故也父老其归以太守言谕告子弟川浙与宣风土虽殊勤则得熟
怠则薄收其理一也虽然尚有以告父老夫水旱虽系天数而感召则在人心若使田里之间
父慈子孝兄友弟恭邻里辑睦风俗纯厚自然可以感召至和风雨调节灾害不生太守得与
汝曹共享一饱为太平民岂不乐哉父老其归丁宁子弟明聽吾言毋忽

严州劝农文

太守奉诏书抚百姓今年矣生于蜀土不能详知汝州利害然汝州至急之务公私所甚忧
者太守虽愚亦知之矣岂非艰食之为患乎汝州山多田少良田才百二三余皆硤瘠尔农虽
尽力以耕及冬斂藏尚不足以糊口常仰余他郡一遇闭遏輒有沟壑之忧太守虽大声疾呼
告于台閤彼不顾也尔农其可不力耕乎去歲旱灾太守早夜焦劳蠲租发廩劝富人赈粜白
于朝得米万石以助赈济自谓心力粗竭然小惠安能徧也今幸阴阳调和腊雪春雨率皆应
天时既顺人事可不勉乎太守用出遠郊进父老而告之古语云人情一日不再食则饥饥
火所驱不顾廉耻奸邪盗贼皆由此起欲其不饥无他勤于耕而已欲耕之勤去其害于耕者
而已汝州之人喜兴词诉在官日多在野日少耕能不废乎汝州之人喜事鬼神竭力费财奔
走道路耕能不废乎好饮博则心志荒好嬉遊则本业堕若能去此四害惟專惟勤田之无收
吾不信也父老皆深知田者母谓太守之言常谈归语子孙明聽力行毋忽

福建运司劝农文

举天下之田皆不可不熟而福建之田尤不可以不熟举天下之民皆不可使饥而福建之民尤不可以使之饥何则歲歉生事此方为甚故也古人有言饥不得食虽慈母不能保其子然则歲歉生事岂尔民之得已哉近年以来时和歲丰上下粗给部中无犬吠之警使者之责亦少寬矣然嗣歲之忧固未艾也今幸阴阳顺序春雨沾足太史所占又主丰登尔农正当上顺天心力修人事使谷之入歲多一歲父母妻子免于饥冻奸邪贼乱不得窃发上下欢欣相安于无事岂不乐哉使者又以耕之三害戒汝其审聽之舍本逐末羣聚私販犯法破家此害耕之大者喜兴词诉伺 官府奔走道路次之博奕饮酒嬉遊无度四体不勤次之苟能去此三者父率其子兄勉其弟沾体涂足一以耕种为事天道神明报应不差以丰年赐汝使者当任其咎尔农母谓常谈忽之

耻堂存稿卷六

宋 高斯得 撰

五言古诗

暮春即事

皇天列四运懿兹暮春熙和风着万物观物令心怡如何魏晋后词人总凄凄退之颇知道及此尤伤悲宁非遭淹留叹老还嗟卑哀乐缘外感安能识天时不见鲁中狂陶然浴清沂问渠乐何事无言对春晖人亡已千年叹息将安归

次韵王秉纯投赠三十韵

狂客写孤愤危词難羣憊秋岳露节角春林扫秬穡长铗剗横鰐寸铁剗妖蟾赤子临横草苍生捐盖苦无衣可自蔽有突何由黔浏泉浸苞粮白露摧苍蒹念此心怛怛因之泪渐渐谁能坐扞舌聊欲一奋髯百忧不易穷千篇犹未履生气凛不怠死灰惊复炎敢云寡鹤唱尚欲神龙潜拾遗爱薛孟谪仙重王阎相邀共夜话快读临风檐更防聖频折乐极酒屡拈国家正闲暇上下方熙恬贾谊枉流恟桓侯笑鍼砭无庸事吟讽且复披湘纍缅怀西方美遐想虞庭金狂愚易搆祸讥刺徒招嫌舌出躬是瘁戏言心如惔且当阮籍醉莫待申屠箝及今不自悔明神将汝殲之子十步才时命三年淹【原注时方下第】江湖久放浪藿盐应齕慙端如伏檻虎更似緣竿鮎匱藏玉有美台餽金无兼我欲引自近寒盟应重燭弁山蕨可茹茗溪鲫堪黏诺金虽未坠许劒已可覘从今但洗耳水程报邮籤

送徐景說归三衢

秋风吐商气庭树憾以飞美人悼时节去意不可羈朋陰傲排荡晨光弄熹微灵修岂敢怨浩荡终难依岐分蹈一失决此存亡机僵株擢新稊倏忽成十围阳隄人所愿苍天詎能违蹇予于夫子亮节深所希取舍既共是排根亦同非岂伊桐江上裴回送将归时危抱深感人遽伤遐睎国家福未艾祖宗临孔威愿子崇明德桑榆借光辉

思耕亭【有序】

吾友王敏道为富阳税官廨近严子陵祠筑亭其旁求名于予考诸前牒富阳汉会稽富春县吴始分富春桐庐先生耕钓之地皆在富春明矣然今分二州则在严者宜以钓为重在杭者当以耕取名绍兴间郑公刚中宣抚四川作思耕亭盖以思孔明耕屯为义予蜀人也习闻其号乃借以名斯亭因系之诗致怀贤之意云莘郊投耒兴六百奠殷祀南阳辍耒出汉业债还起圣贤忧世心秋月照寒水彼哉植杖徒长往见何庠我读逸民传初讶子陵志赤符焰方张注想资共理掉头归深山繆洗巢父耳六经凜刀尺云乎不斯畏反覆史氏词陵去良有以

维人验进德必于师友试歷试犹夫人成就安能伟挽士亦既来舍王宁得已汉道汝不衡先生可轻议钓台千万篇未有愜予意赋诗题思耕聊与发斯义

觴客海棠下以东坡诗红萼是乡人之句分韵予得丝字

南国候伤旱东皇驾如驰月正未强半红紫皆离披蜀花异凡品作态能矜持可怜多迫蹙竟随羣卉移如彼市门女狼籍施胭脂又如贱锦工忙掷梭中丝匆匆不耐看欲速将何为碧鸡有佳人睡足晨粒迟含姿自爱惜肯受春风欺思之不可见感事肠生悲

为温乐堂五绿亭解嘲

园林非不佳名字着难穩稍与流俗异讥呵来噂噂我堂名温乐窃慕涑水翁我亭名五绿又希午桥公客来笑不已谓我何其鄙拳拳二相国所爱人爵耳闻之为一哈争端自予开嗟予信鄙矣笑客亦愚哉相诚吾所爱何必裴与马唐非无李卢宋亦有章蔡尔知相何物是谓圣贤宅士而不为此何以下膏泽孟轲出昼意宣尼载质心温岂独甘乐裴非锢园林二扁有深意客詎窥其渙吾言岂狂言刀尺自孔氏

题黄岩蔡氏青在亭

逢人说爱山谁何是真爱苟无丘壑情在眼犹不在君看终南客岂不卧与对奈何心自盲坐失烟霞态蔡侯故静者肯与青山背作堂老其间列岫俨襟带萝月散庭隅白云屯户外疏櫺纳遥碧平几挹横黛青山信在兹心境两融会岂效逋客徒匿情给松桧咨余秉微尚颇亦厌尘壒幸君分半青着我函丈对

遊巾山得晴字

巾山何亭亭防地蹲中城苍龙擢双角盘空鬬孤撑崇雉俨环抱兼如在涤牲有时霁雾擎插我堂东荣虽劳挂笏望犹賒杖藜行值兹阳和候鲜晖吐新晴摆去纒牵累少畅窥临情借兰得胜引共此酒一盛咏余百忧集乐极万感生去国魂难招怀人涕易盈虽无丘壑姿宿昔芥尘纓寄言山中叟未慕同幽贞

次韵徐景説见寄并呈牟存叟

东南有华屋结构清江濱规橈百年遠庭宇无纖氛前林蓺杞梓后圃植兰荪嘉賓日还往门户生精魂虽慚北第壮犹能植乾坤主人遗后意岂欲徒饱温相期大此屋传世垂无垠人事一朝异祖训成仇冤奸 窃其柄良朋中路捐殖货以自封顾笑以为欢耳目就聾塞谁其与忠言不念乃祖心望尔椒聊蕃感激当世事家国初无分宗子误置相匪人转洪钧瘴善树羣慝瘠国开乱原权豪竞叨愆赤子愁吟呻我室既尽毁大敌将起吞藐焉虬虱臣埋轮承误恩睨冀不能击狐狸加霆震抚已方自慙顾指为尤愆百壬妄见猜欲取棋枰翻谁知孤臣心但

求王室安举目百嫫中莫若二子妍愿识径畎径更认存斋存岁晚定三友短羽追孤骞

迓杜丞相櫂舟白鹤山下有感

维舟候新铉薄言憇兹山丛祠倚层阜回阡俯澄湾竚立心目瞿白鹤悬榜颜嘉名契旧隐身疑堕其间沓嶂森古木荒涂翳枯菅田空少鸿鴈谷腥富豺獫更怀山中人骑鹤去不还平生抱炯介辘张困羣奸徂谢易永久十年閤松关纷吾信虚薄宿昔防砭顽及兹落海峤初心汨忧患竭来因见召感涕凄其潜亦欲防青茆赏心谅难攀孤愤竟何及颠毛自令防

龟溪即事五首

顽云鄱鹤岭积雪明龟溪粉榆社已屋斯焉卜幽栖亦有好事人除馆溪之西门巷寄深窈青山有攀跻平生秉微尚颇忻咏归兮且可投吾簪安能栖会稽【原注史嵩之以冬雷封事见逐改予越倅不赴】

父兄吳下宅师友苕溪矶亦欲从之遊煦湿相因依睽孤谅无乐旅良可唏古来遯世士独立取众非咨予匪能然翼短难高飞怀哉订顽翁示我真指归

王庭陟俊茂三年虱其间愚忠竟何补积咎成丘山媿彼海上沍临机馱其翻昭【案原本有阙文】嗟嗟亦胡颜汝今尚无觉复倚荣辱关晨门独何人永【案以下原本阙】

二疏仕汉庭才术相颉防竝传已云宠同归更辉光蹇予与季父砭砭而琳琅不才自宜汰显斥庸何伤处我嫌疑间斯义安当潜圣讥邻醯焉庾渠肺肠【原注嵩之谓叔侄同朝有嫌】

曩从太史氏论次金匱书龙兴渡江后戢止今皇初微辞记当时只字宁敢虚彼阿者谁子顾欲私毁誉阳秋记慕容史记名山储二子亦过计人心焉可诬【原注宁宗帝纪之末嵩之妄加毁誉于理宗济邸改予所草】

送不浮弟归金陵

分袂四百旬盍簪三十日君来一何迟君去一何疾题彼原上鹄飞鸣不相失奈何缘薄宦参辰各方一我须尽成丝君紵才如栗人生几相见岁月去如斥两苏欠同归二陆事堪栗天伦盍中芥富贵劒头蜜防下饶蹲鸱吴中富仙术纵不死同丘其可生异室愿君解龟后休汝母他适建邺水易滋武昌鱼多乙【原注不浮升鄂皆有屋】急来共藜羹防此青林密春风棣华开溪头望归鹄

不浮次韵予亦再赋

咨余运頹侵非复少年日嵇康既习懒长卿又婴疾避客如避仇俗子意多失独于声气同迹
两心事一粝饭盘菹芹浊酒筮撰栗家食虽清贫尚有币余斥每思世路巖身不寒而栗何如
掩关卧黑甜过崖蜜觉来荷长镰药圃斲芝术末路值令弟自遠造余室未久欲思归依人似
高适飞飞羽差池秋鴈避春乙可怜陆士衡呜咽送亲密桡音转回塘无由望文鹄

读谢章奏疏赋朝阳吟

岷峨秃如赭江汉浊如泔云何只隔夜泼黛按青蓝得非气沆砀祝融困西戡秋风抗手谢天
公吾敢贪此邦旧崛奇神气虎耽耽山为万仞高水作千尺涵尔来 一变风景殊不堪月堕
鸡不晨露警鹤犹 长毕綬若若修綬府潭潭坐令死瓦色空蒙亘西南划闻卷阿奏翠鳳鸣
孤岚尹氏谁敢指家父独纵谈三十六峰下有此奇伟男戛摩参井焰划礲山川慙予方感嫠
纬耳此距跃三作歌为贾勇罪我如饴甘

吏道

劳牵迫吏道儻若洪縻拘九春回尘土一迹园林无直此休沐暇偕我良知娱残梅谢众卉初
柳萸僵株四运巧相斥流目悲荣枯俯仰潺湲沫恻耳弥惊吁故山 何在漱石良辰徂为邦
岁已暮宣城可归与执柯勿睨视州有达士模

物贵

一从泉法乱都野咸荒荒片楮母偏重无子相低昂奸人窃其权百物因大翔握薪重寻桂尺
鱼贵河魴我闻輶轂下鞅法牛毛详物物揭成价大字悬康庄臙鲍 公肆饼师聚官場市易
祖嘉问均输肖 羊爵罗四面布摇手触刑章哀哉今之人逢时何不祥谷斛八钱汉米斗三
钱唐安得生其时鼓腹咏太康

增赋

吾哀天宝后刻剥穷锥刀豆实不得吃蕨卖输官曹【原注并见诗史】民生于斯时生意如
鸿毛安知咸淳际赤子滋磬磬税租责三倍田野晨号咷柔桑稊未茁调帛已骚骚骄兵饫醲
鲜黎民窄糠糟九关虎豹守哀吁愁天高

桑贵有感

我老与时忤十年守穷空衣食相驱迫遂师田舍翁每当春蚕起不敢怠微躬晨兴督家人留
心曲箔中客寓无田园專仰买桑供岂谓桑陡贵半路哀涂穷三百变三千十倍价何穹家貲
已典尽厥费犹未充乃知楮法坏流毒刀兵同苍天此何人血面诉难通弃蚕满阡谷行当歌
大东预忧儿女曹凜冽当严风我穷何足道四海关吾胷赤子已露立视天犹梦梦

劫桑叹

美哉幽郊道风日清且熙条桑纷冉冉采蘩复祁祁盛时不可再乱世诚堪悲守令既闇懦凶黠何纷披千林非无主夺攘无子遗白刃鬪原野长义守路垂羸童拥树泣弱 空篮归更怜贫家女束手看蚕饥尔蚕何不幸生此叔季时千筐与万箔委弃如京坻昔闻花门乱倒麦折桑枝幸无风尘警气象胡尔为天门万里远吾君那得知恨无古肤使观风采吾诗

次韵不浮问疾末章及蝗

卧疴连夏秋尔来收药喜羣腴久嚼蜡今始甘鲂鲤自非天矜怜安得吉祥止寄声问何如感此远方弟炯然忧爱心谆谆见词防兼馈药笼珍废疾居然起末章悼飞蝗布阵长千里那知自北来今亦徧苔水公田吏如虎收拾无滞穗诉伤服大刑遑哀室如燬古来此乱国赤子先遭弃北桥千万仓何翅敖洛峙一粒不肯捐肯念饥由已谨勿传吾诗隙间天蝼记

题钱可则茆雪庵

我家雪山下结茅几度秋一朝劫火燎身堕江南州相逢茆雪君感慨不能休我今如丧狗狂走长包羞子幸成小筑廊岩可夷犹何不学孔明草庐傲王侯何不学袁安高卧絶行辔鸛鸾恍入梦猿鹤凄生愁逋客亮非然谁其执怨仇山茅自高洁得雪逾清修三白待君足毋为垢氛留

酒阑

世道日沦忽涔泪夜中滋客问子何伤予士气痿不见齐鲁閔所争在糟醅我吻燥已久幸歌韩奕诗若遭禁酒国曹瞞尔何为一麀臯兰下赤壁竟不支虽云竟不支主翁自怜之骑虎不敢下悲鸣亦可 朝廷尽君子拄撑赖公师似此好局面诸生愿扶持尹京用老蔡恐翻元祐规斯言是耶非识者当能知哑钟悬清庙瘡虎伏路垂此而为君子小人当谓谁币轻物痛跃赤子命一丝尚曰此元祐天乎欲谁欺醪粢恩诚深报复机诚危独哀三百年豢此终何裨咸幡不复举志士徒伤悲

蜀酒

我辞相国归【原注赵公葵】遗我酒十器拜受起潜然为上有蜀字狐狸之所嚙种秫宁有地得非父兄血或是乡人泪我饮不下咽思广相国赐愿得投防江咸使西南醉端午日觴客东湖遇雨移饮寿台楼分韵得壁字

晖东田游明远东城歷深心慕尘轨湖舷拟觴客零雨或尼之辍防骈兹席霁虹带高岑倾羲被廻陌良知共遐睎数陪竹林七境恬微尚愜赏胜幽怀适怀沙事千载旧恨犹能辟延首瞻楼顔新愁渺难释【原注新闻杜丞相薨】天问愧非才且可浮大白徙倚惊漏穷晨宵挂

东壁

赠道士刘友鹤

翰林纷万族白鹤称善鸣标榜在诗易斯义渊然精子今自羽客复慕胎僊名烟煴吐奇讯警
露争圆清平臯播声兰广隰防芳苓于焉事飞薄安得有恶声聒俗讵知我胡为枉撓情帝乡
阔万里短羽无遐征

读哲宗长编

我于咸淳际偶读绍符编昏气塞宇宙临文深慨然孽惇暴于虎泰陵度如天惇言一脱口辄
奉以周旋嘯呼尽顽凶排斥咸忠贤意偏覆辙蹈时移善政还【音旋】济恶蔡元度推波曾
子宣纪纲耳目地悉以私人專其间如商英牙吻尤呀然神灵不可测党人得生全矧乃崇观
后于邑更堪言孝弟尧舜道祸反阶中天圣经岂误人无乃説用燕孤臣泪迸血后来其监旃

近者昌言多出诸贤之后有感一首

吾观唐虞时辅佐多世胄一时谋谟嘉十世典刑旧古道日以衰象贤始不懋近者梧桐鸣多
出芝兰秀杜李倡其前【原注杜清献之子渊李竹之子务观】刘胡继其后【原注刘侍御
汉弼之子胡评事梦昱之子】最后康乐公【原注谢读山从子名章】卓出汉庭右元气倚
迢续疵国资匡救起予气为增感事眉复皱彼出进士科视此矜廉茂谁能持我诗往为披恂
瞽

生日自嘲

今朝出门去路逢揶揄子汝形何龙钟汝色何顛顛人皆鑽当路汝独鑽故纸故纸高泰山不
直一杯水当路众所趋汝独无一字玉堂炳宫烛金华曳丝履珥笔立螭头属车陪豹尾世人
共歆羨汝乃独掩鼻七十不回头汝亦自苦耳抗手谢少年吾今将仕矣

次韵俞揆县尉见赠钓台赋梅

严风折繁圃嘉卉难为香坐令众芳林直为萧艾乡妖红与嫋紫乘时鬪新妆梅生处局外皚
然防衣裳独无摧折忧一笑春洋洋犹怀臭味感苦口嗟难尝风人妙托物予德惭菲凉坡公
诂为役涪翁可齐芳尚此短兵接当君阵堂堂

齿落

韩公四十五已赋齿落诗呀然顿崩弛存者皆浮危我今恰半百衰暮固其时一齿阙当门撼
其秋叶飞感兹生有涯抚枕中夜悲伊人未闻道文与百世期吾今食粟耳将随野草萎圣路

千万里加鞭犹可迟

次韵功远兄惠诗见劳

平生闻父师择术明诺谔岂不依德言其奈根器弱听庭开兽樽坐听诸臣咋谁其酌尝之自牖勤纳约维时鹤山翁铁作元祐脚振鬣一以鸣万马立皆却此老埋虎丘自顷气何索徽音阁不嗣吾侪得无忤偶从锋镝余来被纓组缚每怀季父风自笑吾瘠恶十驾希乘黄其敢自菲薄啾啾竟何裨有如丛间爵那知桓将军早已憚孙绰歟彼韝上鹰掣臂将汝攫何不追防鸿幡然见几作会逢故人刘危言取眙愕【原注刘起为博士轮对甚伟】腥 忌雕胡蕢茱妬芳若遂仇作俑人意欲屏医药【原注予对班偶在刘前亦及嵩之故尔】乐哉余不亭闲身颇堪着寒谿静可鉴青山岑如削未能及黎侯且可栖晋鄂憑谁共行藏归语故山鹤

赠蜀僧钦师

天台招提薺我常避其尘夫岂无名缁近膩终汗人【原注时鬻寺之风颇盛】衲子来西州见之独情亲岂惟粉社意亦喜丛林声钦公惜我去索赠良殷勤子道我弗学安能淑而身虽然第一义儒释曾何分要踏石头路须还铁脚根

次韵李通甫赋中秋

秋容满苕谿天籁生菌阁幽怀对萧辰意味更冲泊招朋倾一盛相与慰牢落抵掌谈世事亦可资一噱须防白玉盘高挂青绡幙赏心与景会喜极悲还作渺然望西南慨想旧猿鹤岂无首丘情归去事耕凿奈何朝廷上聚铁方铸错【原注时余晦将入蜀】弃置勿复道洗盞更深酌我老倦吟诗无惊纪行乐故人诗筒来晨檐有鸣鹊

送刘养源游吴中

自我识松涧于今二十年【原注浙西宪俞掞】譬彼鸿与虬薄霄而栖川忆昔初见时予客刘养源邂逅一相遇松涧称其贤蹇予久骚屑养源亦萧然攜家輶轂下炊玉斗万钱贷粟监河侯盖为生事牵访予苕之濱欲学东方先率然集吴地求汲松涧泉予谓子往矣辙鳞今复鲜杜陵送李君南入黔中天应为汧公醉剩操云峤篇

次韵不浮和东坡端午游真如寺

君居秣陵时日夜书旁午念我方投闲遠方同甘苦别来日月长如发不可数弟兄两浮萍功名一炊黍相逢饮佳节小慰情凄楚东坡旧公案君房妙言语乃翁满腹书一字不堪煮晚岁膝上君端能继华祖我已困屠龙君应思画虎相期寸田耕心亨无齟齬

平生欲一游金陵而不得再用韵简不浮

金陵帝王州遗事多典午我昔读其书抚卷辄凄苦一皆豪杰士错出可胜数荣名既销歇陈迹付离黍惟有东山翁于今尚翹楚我欲一访之千载同晤语酒于白下酌茗向钟山煮北道有主人载酒思出祖但畏傍人讥率野非兕虎此事从昔然非予独齟齬

不浮欲卜居雪川而未决再用韵趣之

君如夏日槐浓陰正亭午我如秋渚莲心老味加苦卜居既未果会面真堪数二米同一稊何时如秬黍我今居异邦一齐咻众楚出门无所诣欲话谁晤语盍念荆同生母忧豆逢煮急来共伏腊相与续妣祖昔人兄弟多八龙及三虎安有予二人而堪长齟齬

不浮弟摄兴国守书趣其归

自君摄富川政声达王畿乡邦大夫士相率聯书驰欲控江州督版授俾真为羣来质于予予则力止之父兄本公论彼反疑为私诸公怅然去未免方轮嗤日者召书来自言摄承募弩马恋短豆或者能无讥累牒上尚书愿趣新侯来白头分趋幕不敢求旌麾开书喜见面与我同肝脾高安别未久德进兄嗟咨我今亦复然坡颖真吾师虽无逍遥堂迟君同赋诗已扫安乐窝扁舟早来归

次韵王深道领客登翠屏

东皇趣归旆行色在陇麦抚旧念易盈感逝忧难释谓春姑徐驱为我咏今夕天涯浩漫漫迷路那可索林芳坐自销庭草已如积南亭慨灵运东园悲阮籍咨余畏简书无路追羣屐故知凝睇处惟见嵎尖碧如叩欠宿愿入越成误适一笑命渌樽人生匪金石

题王茂悦郴州白水奇清园【原注瀑布也】

灵区有异产化国无潜珍坡公论人物我则赋奇清壮哉此白水谁其泻青防薶藏富媪嗇抉剔天公噴霹雳起神物颺颺擘巨灵阳山得瀑布永嘉赖斧斤乃知出世事须待开物人倒悬讶瑶池吹立惊沧溟千穗落晓镜万仞垂天绅清寒入山骨霏润霑人巾麝防为瘦爽草木皆坚贞臞仙挹瓢饮俗士湔尘纓度堂匪秩防筑馆先储英函书静秩秩子佩来僉僉清风濂溪像古栢文翁庭从容讲道要宛转余诗情谪仙一派妙休文八咏新兹惟佳山水我尝驻骐驎平湖尚芜漫絶境宜荆榛按图重慨叹岁月今峥嵘壮观夸好句窘步歆丰擎聊以赠我友无庸寄山神

书室揭刘元城陈了斋像以自厉

我昔天台防偶得陈公像以公谪是邦祠堂悬真相寻执宪于衡复得刘元城以公子孙寓家传遗写真揭之书室内朝夕得晤对焉能为之役妄意他年配刘公色贞坚疾惇固宜然陈公甚和易排京乃敢言惇京为腐草二公长不老汝其择于斯庶以传不朽

次韵詹丞贺得祠

我生天地间自笑一疣物燕蝠争晨暝龙蠖安伸屈三度偃黄冠十载谢丹绂无学陪旃厦无才演纶綍晨防恣幽探午窻饶睡兀平生正坐口自使穷到骨纷纷蝶争春悄悄蟆啖月从来彭泽琴不胜昭阳羯安有冷笑姿可入艳阳节积年几穴床经旬不逾闥时逐志和风惯卧袁安雪初无子公书谁其项斯說忽令管龙宫传闻从鴈帛还来防香火幸不废书册偷闲容我辈用世付时哲鹏鷃各逍遥何烦较优劣

感事

太师百僚长历代皆有之所用有贤否邦以分安危惟彼太公望桓桓定周基至于尹氏徒宁逃小雅讥汉唐姑勿论我朝有元龟潞公四朝老德望钦边陲咄哉京桧侂言之可欬近者扬王庭举朝莫言非文潞不可作吾其谁与归

鬼瞰吟

相公不入府却走湖上宅朝防庙堂上暮作水云客公府爵罗张别墅车毂擊三日斂履朝万楫戈船疾【原注出朝以军船涉西湖人以为不祥】畔官義和诛离局春秋责主寬置不问士佞那敢斥倡优湛夜宴台馆穷晨策华堂枕千岩幽龕通百尺知非晋公洞故是伯有窟蘧蘧梦蝶飞冉冉长蛇出【原注大蛇出于其寢】烦冤哭中夜魑魅来白日方期燕婉求难拒幽明迫天不相厯居鬼乃瞰其室不见霍氏亡千妖日丛积不见蔡京败万怪无宁迹持危岂颠坠起秽宜荡涤君看韩家园斜阳空寂歷

次韵刘养源见寄二十韵

山寺传好语盈耳欢声腾侧闻新天子有意绥黎蒸金鸡肆大眚民散防哀矜诏书日夜下合沓来凌兢访落首鲐背导諫延龟朋讲习召遗席轺车聘才能官簿还故邸孝思齐定陵宛如春气至顿释朝霜凝神龙妙嘘云妖狐疑听冰维今万机政欲言何可胜安得批肝血排云叫觚棱崇兰变成艾春鸠化为鹰贪夫野外贄善类风中灯百壬各自媚两如偏见憎【原注选诗事蹊两如直】盈庭苍玉佩絕响朱弦绳愿我圣明后金台择先登昭苏聵聵听凌厉高高层陰霾半夜駁日月高衢升吾侪老 畝鼓腹歌中兴齿发已自料息翅甘防鹏

要君

圣人戒要君春秋罪同弑推此无上心将何所不至近者凶相归决烈谁能比羣愚惑其迹咸谓难夺志老夫非圣人固知决无是或问何以知荅云非奥秘岂有患失夫能为勇退事未闻介推归留母以为质府中俱荡析般移到花卉殿前卒二百輦载填城市都人彪其愚家家失欢喜謹言真不返剥剥竞弹指朝士独可怜一朝失怙恃聯章乞还相留莽无少异天王虽圣明勉徇非得已御前金字牌一日数十置冠盖何纷纷排日遣郎吏端明奉玺书侍郎传睿防

师王袖亲批祈恳留涕泗相公卧愈坚那肯东山起陛下如迫臣臣当还故里羣使骇其言连名奏天陛安知夜半舟已渡曹娥水新亭候徒劳刘裕已还第狄青度昆仑李愬擒元济忍于君父前用此军中诡一劳可永逸所欲已称遂从今政事堂深根且固蒂愿已愜臧孙専当逾季氏上苍孔威神那知从汝未

五月

五月出师时老臣抱忧惧端防问詹尹愿告吉凶故卦得明夷中惊愕不敢露庸知三日后日眚大可怖【原注六月朔日有食之既】天象与人占真如相对语师出无寸功败书常踵路世道复谁论当局委而去更令水中榆袅袅擎槃露【原注露义不同故竝押】秋风日以高吾未得死所援笔识蓍辞泪血满襟素【原注明夷上六不明晦初登于天后入于地象曰初登于天照四国也后入于地失则也应在德祐二年正月痛哉】

次韵方泳道【沂】见寄

延首浙河外浮氛翳青天下有豺与豸纷其集中田况复直岁祲蒿莱莽连阡民流入他郡百里无人烟咨予忝观风七州命所悬驻车问疾苦入耳潜潜然期令万苍黔生意春无边一网猎羣鸞其敢谗力绵天王自圣明凝旒蔽其前曰此何罪辜而诬饮贪泉奉使既不称还印归民编南窻可笑傲双溪恣流连不贪金门步不慕东壁躔但愿紫皇寤赤子逃烹煎贤聚国脉壮吏良民瘼痊臣虽就九死没齿无怨言方子遽投赠厉我弥贞坚枯木已无心安能被朱弦江水倘可楫吾其劒西川

次韵王深道见寄

虚斋隠几坐忧思来万端我带旧盈豁忽复数孔寛追思昔迷复驱驰困尘鞍终蹈世涂险衽席生洄滩平生仗忠信意若无惊湍虽有被野罗何篡凌风翰嫠忧抱耿耿进退良独难亦欲纫蕙茝殷勤奉所欢【原注离骚以君为所欢】终疑薛居州一暴难胜寒众陰日夜长正气日以单国枋落熏腐民生困贪残言路久榛棘肉食咸空餐蹇予宿嗜好与世殊醎酸柰何不自爱当门植芳兰故效五柳君归求容膝安我友在天末洞我肠与肝新诗妙镌发字如汤铭盘盍簪眇无因东望慨其叹遥闻病新愈致我囊中丹愿君彊吞咀百年永相看

次韵刘友鹤端午三首

昔经屈原坂寒湍下悲鸣又渡汨罗江 记曾输诚慨彼幽乱国成此湘累名雕胡不受膩渚予膳膏腥离骚二十五往往言其清招汝千载后来乎不来灵

桐江五月凉波上搏层飈伤屈念已怆怀严濂逾滋维彼不逢世如斯良遇时怀沙与钓濞异节同光辉故人去奚伤宗国逃惧非精义贵有质圣逵咨从谁

笺天欲移病心与孤鹤飞苔青弁峯秀遥昔梦佳期恬鳞慕深藻倦翮怀安枝焉能系浮名翠
翔辰升霏已约东里伴无烦北山移他年倚磻门望子蹁跹衣

道中遇雨

车中览书罢举头失青山五日无纖云春晴固应怪须防骤雨过忽已罗青鬓天公自知我所
遇无不安奈何苦相戏晦明翻覆间浮云虽暂收未肯故山还终当买不借践此泥涂艰

送王深道赴荆门教授

苍龙挂秋汉凉风鼓吾袪夜中不能寐慷慨悲有余美人背我去山川 盘紆平生嵇叔夜龙
性不可拘以兹直谅益弱念咸刊除四海岂无交谁为真丈夫温蜀本兄弟不过姓氏殊临分
悄无言执手空踟蹰世事举目知安能共沦胥君理江介柅我念苕瀆庐后会难前期且复立
斯须努力崇明德歲寒盟可渝

次韵北涧禅师留别

维北有深涧其中贮幽泉兹泥不可滓万境涵澄鲜老人挹其流浊世相周旋清寒涤腴膩八
解不敢專我来宿招提逾月从金仙解后涧濒老笔力回百川参寥一以去诗宗久无传阿师
佩密印絕后如光前禅房竹色静秋深暑将阑双崑恍入梦寄予白云篇

中秋独坐有感

三年三中秋月作一樣奇清贫不设客老倦不吟诗今年更凄凉儿孙鎖秋闈独坐南窗下兀
兀如孤黑追思欢娱地无如少壮时尚记壬辰岁鹤山靖州归八月十五夜月华散前墀诸父
秋山阁羣从幽芳池赋诗各分韵醉墨纷淋漓鹤山读我句终夜相嗟咨明朝操纸来倾倒里
中儿一往三十载坐念心生悲前辈已雕谢诸兄亦无遗奇孤一身在流落天之涯明月如昨
日而我鬓成丝天人固异分何烦涕交頤

又中秋分韵得处字

西风淅残防秋水静如濾客心悲未央感兹年芳去聊携池上酌相与豁烦虑我穀楚以陈曾
未举前箸延首视太清飞娥已来御屏翳虽放纷不敢捩眼覷清辉岂不佳祇益畸人苦故乡
值良辰辄与亲昵醺转蓬随天风异县不可据明年看清光那知又何处

自叙六十韵

苍苍大峨山高标致青天西江走其下东井纏其颠积此二仪气钟为万古贤粤从扬马来作
者接项肩我家高阳氏遂古已婣媯爰及开府公世德乃昭宣挺生六男子如鼇海上连逢时

供世用报国或躯捐【原注先忠襄公】二季遇明主皇极佐后先英芬播家国余辉照山川
咨予食旧德一线千钧悬结髮日砮砥植节图贞坚龙飞四十春先皇始招延绛侯正骄主荅
防聊相鑄无心得天下人力何有焉有司矜其愚寘之龟列前先人既死城【案原本缺一字】
遭祸愈挺挈身归君父叨沐登史筵是时嘉熙末大臣私自便抗疏警其偷侧目尤谗言【
原注乔行简】未几孽嵩来当国恣且専白发竝相议【原注庚子冬雷封事】一斥逾三年
祁公俄入相招我赤城边公寻薨于位游老司陶甄蓄缩多畏忌百壬闇煎煎汲黯又妄发羣
彫益呀喧卧家百余日遂棹严滩船偶乘浙东传入手埋轮权南床有妇翁出桺流馋涎劾章
格不下使者反归田流落经七载那复凌翔鹄淳祐更化瑟弓旌罗八纒例叨赤车使收召湘
江壩南宫甫逾月遂玷蓬萊仙仍侍玉皇案兼操金匱篇主恩海岳比每欲输尘涓谢吴对持
鉉国势如舟偏薰莸共一器两党操戈鋌予与赵徐辈放逐纷聯翩吴公亦去相国事堪潜然
荏苒兵难作扰攘纷戈鋌吴公再秉钧首议贾生篇诸梁尚当路【原注沈炎】公愿竟以愆
亡何事大异萊国冤南迁国忠乱天经党祸何连延伤哉淳祐士萧艾化兰荃腰金空照地噤
如秋后蟬嗟我亦何人赵璧乃独全挂舌坐林间嫠忧耿无眠一旦彗星出应诏言数千厯数
蔡京罪请收贾充权书遏不得上龙髯已飞天尚有闻戒集秘之未敢传其间朝阳吟好事达
湖 几欲齿奸鉄终虞隕深渊偃蹇逾十载氷山尚顽坚不学李拾遗尽付酒家钱不学杜拾
遗穷愁诗自传圣涯浩无际前路 以緜且复系寸景终予犀革编

池荷就衰有感

双池万荷花姣好欺子都秋风一披拂槁悴如三闾子有君子操昔人所叹誉奈何不自奋俛
仰悲荣枯荷花不能言请以意对吾两间草木蕃万象粲以舒一从鷓鴣鸣荃蕙首见疏况我
值末运忽忽良辰徂相随就衰叔容色何能愉抗手谢荷花子诚志士模嬰肸悼季世箕干感
沦胥春陵大中正所品良非虚

九日分韵得花字

秋日何烈烈忧心在丘麻老圃跬步间无惊问黄花及兹九九候清樽畅幽遐朋簪既肃穆宴
豆亦静嘉风雨知萧辰飒然掠牕纱乔松助声势轰豗掉狂车萸囊顿精神似与老守夸渊明
有三径我独归无家浮骖竟安适伫立空咨嗟

学诗

燕說谈古书六籍无诗如彼序鬼一车毛郑賁其须古今几大儒亦复鼓应桴歷年二千余耳
目为所軀卓哉紫阳朱订顽砭其愚俗說力扫除沙沉得简珠士惑真难祛于今道犹孤高叟
一鄙夫服膺与世殊在天悬方诸如闻叹起予

读书

问翁几何年翁年七十余尚作蠹书虫嗟翁一何愚旋增通典缺旋修阜陵书毫芒集阅尽白

编还卷舒五诗讽被底【原注选李杜韩苏】柳集诵日晡玩物能丧志圣贤言皦如赋受有奇偏谁能为耘锄

读荆轲传

夜读荆轲传掩卷喟然叹结交天下士贤哉太子丹报秦一片心秋莲孤劒寒介绍田先生得结荆卿欢太子一语疑先生甘自残荆卿欲借手临事敢开口走见樊于期愿借将军首将军搃擊言念此固已久得复平生讎性命何足有四雄英烈风精诚凌白虹函关初未入气已吞祖龙其事虽不就简牍光无穷奈何今之人蹙缩如寒虫

九日防客面岳亭以采菊东篱下悠然见南山分韵得采字诗

四运相摧斥秋容忽而改英英晚节花含霜发鲜彩游子感萧辰命侣登爽垲湘山俨横陈秀色如有待独怜祝融峯尽日埋黳璫安得诛云师吾将罪真宰悠悠元亮心千载宛如在遥知把不盈搔首终朝采胜达不可追迷涂谁堪悔弃置勿复谈且复浇磊砢

谢郑如晦饷酒诗

渊明久闲居欲酿苦无秫萧条倚东篱目断杯中物可人王荆州白衣来扣寂高情属天云于今照方防我穷交旧絶门外无行迹旧时如海肠辙鲋等枯涩谁怜东溟臣西江分一滴嗟哉子立贤【原注王子立子由之壻】肯念黄州客清酒冬百壶昔酒夏千石陶然北窗下但觉天地窄东西高虽异南北郑能一感荷吾子德酬报乏珪璧但诵昌黎诗以谢郑羣锡【原注昌黎谢郑羣锡赠簞诗明珠青玉不足报赠子相好无时衰】

耻堂存稿卷七

宋 高斯得 撰

七言古诗

题天台夏肯甫晓山亭诗

谢公晨防花崖登杜陵早起开前林徽之朝挹西山爽退之晓望南山棱古人看山自有 一个中意味谁探寻林霏夕敛羣动息泽气宵上英云蒸不于此际毓神秀安得向曙岚光凝平生苦不识夜气见山忽得邹人心卷书默坐防有得此岂文字能摹临斯亭题扁有咀嚼慎勿只遣供闲吟直须敲破第一义庶防山鬼逢知音

题赵致道茅斋

三百年前茅屋歌谁其继者茅斋铭杜陵忧世何其切鹤山观物何其精两诗妙处均不朽吾能合异融其真绮栊雕宇贮豪士此岂有意矜吾民从来大庇天下手乃在茅栋茨檐人请君观铭驗吾德复来歌义充吾仁庶防体用归一贯二老可作当欣欣

五月六日约诸友遊北山舟已具而予偶不能出诸友和坡公法华寺诗亦赋一首

区中无由舒眼界欲上云峯观九 颇闻黄龙擅奇特傥得窥临真一快清茗一线仅委蛇具区万顷何滂湃又闻法华两招提清旷夔絶人境隘池光潋灩镜无台山色清寒身不壞石林幻出三玲珑万虎千黑断雄怪幽贞叶防天相之梅雨初晴白日晒州家幸肯借官 亟饌鱼鰕菹葑薤奈何欲往竟不谐徒羨诸公脱天械归来争发古锦囊令予伎痒如爬疥 康本自不羈人况复时屯方翮铩终当於此结菁茅庶可偿渠猿鹤债

刘友鹤以诗赠别次韵送之

昔披朝霞寻洞天五峯矗汉高防岬灵君营魄去千歳秋桂春萝空锁寒古心未死不忍去摇摇风纛空中悬五年失脚堕时网梦思重到无由縁竭来出守山水郡公余颇得穷幽偏丹丘仙客旧心赏骑鹤过之同晤言诗妍青林华煜煜气老幽涧松桓桓问余君土信奇絶孰与吾山多紫烟桐江缙鱼烂志节猴山笙鹤夸神仙能衡铁炭识轻重众山部娄真如拳羽人闻此深领防笑指双台催棹船题诗莫作世间语防有剜剔青苔看时雪应祷周子车和东坡所次柳子玉韵见贻用韵答赋

大冬愆阳人从渴井泥无泉百川竭老天有意濡沫之一夜幻成三尺雪勿嘲见卵索时夜在眼来牟疑仿佛蹇予谁敢贪天功片片无非后皇德由来此物贵腊前况复霏霏当畅月坡公守颍足风流坐看斜飞咏愁絶明朝亦欲踵前规试与诸君相暖热

出其东门行【原注刺郡守贪暴】

君不见防稽太守第五伦罢官潜去逃吏民不知当时何所畏乘船夜渡曹娥津只縁惠爱入人髓攀车叩马千万羣使君若不行诡道爱河浩 难抽身旧闻吴兴解郡绶归路南指朝天京尔来史项后先去云何却出东城闐【原注史越翁项公泽皆贪暴】横山伺 不知数【原注横山南路小聚落】携壶挈榼相邀迎使君自揣非壽我西子不洁将污人水军二百耀南路三更一舸临湖门防稽吴兴迹相似谁知爱恶殊其情畏匡戒薛圣贤有岂比汝曹祇自焚嗟哉后人亦监此慎勿继踵成三人從今要辨守贤否只观去路东南分

禹柏行

往年上防稽凌空禹穴曾得窥今年浮沅湘又见禹柏蹲山陂茫茫禹迹遍天下独此二物称神奇凌云意气销铄尽根心就化空存皮樛柯入地枯不死反更上擢青铜枝被以九龙名流传自何时得非木宿苍龙精储英萃异成雄奇头角崔嵬讶撑拄牙须磔裂相纷披孔明庙柏信称古上距何翅千年奇杜陵品藻一何陋遗落鼻祖收孙枝倭云此地不身到何由得集衡湘诗呜呼衡之山巍巍湘之水弥弥地气何太偏独于草木乎钟之柏兮手植自神禹竹也种传由舜妃谁能为天分此畀人物庶防可使悍俗囂风移

题浯谿寺

舂陵太守真好奇结茅肥遯湘江湄三吾出意作新字脱畧苍籀遗水斯溪山於我本何有占断不许傍人窥人生天地遠行客恋身外物庸非痴漫郎仙去五百载名字永与兹山垂要知忠义不磨处虽不自与人与之至今过者望卷石森然魄动中兴碑此公何用專壑鄙世上寧有争塹儿我来访古荆蓬藿怅然不识亭台基扫出蟬噪发斯义元子可作然吾诗

次韵王深道寄题其弟敏道菊山

黄花有鉴能品人俗士往往遭眼白独怜寂寞陶长官到死同盟不相释至今采采东篱诗千载晶光犹陆离瓊人妙质久无记羞对纷纷女曹儿子今风尘走异县故山举头不可见奈何友此隱逸花三嗅幽香意中恋我闻 堦足隄州梦生八翼飞秋秋不须苦覓菊山句晚节相期拂衣去

次韵不浮弟自金陵相过

老夫睡眠方昏花梦中忽闻歌棣华暮春逢此晴雨好足慰飘零少陵老知君重踏东华尘先访雪堂老师兄大篇铿鍠来扣寂读之宛如花萼集花残谁复倚栏干黄鹤催归呼子安此花当屈第一指徐娘风情犹可喜诗成共赋岂厌多惠连何不偕羊何【原注君朋不来故云】古来难并良与美报答春光一盛防勿云数见恐不鲜勿忧相煎豈其然我今已信天行止小冯当门乃吾意一春花恼只颠狂行乐最怕功名妨杜牧寻春迟有悔且须十日浇磊隗

再次韵

神仙不求三朵花颜色不求陰丽华但愿时清风日好娱此无裘痴钝老花光云锦柳麴尘买春不用孔方兄止过寂寂还寂寂有弟有弟遠方集客来我常为段干长恐高卧惊袁安踉蹌开门门指指为见阿同无量喜阿同尔来新诗多句法不减水部何盎然醺人如酒美梦回牙頰闻余防我诗端如食小鲜间厠八瓊徒赧然掀髯浩歌不能止酒酣一麾铁如意高楼捶碎谪仙狂茫茫宇宙隘而妨手捋虎须终不悔谪仙与我如龚隗

絕交行

男儿独立天地间太华絕尖一何峭子房不肯下萧曹伯夷本自轻周召往来舞袖拂云霄醉里扁舟海峽风饥肯向鸡求餐玉防不与蝇同调山高路断客来稀日晏防空臂争掉穷涂李白友俗人歲晚杜甫交年少前门长揖后门关当面论心背后笑云门轻与凡耳弹夜光莫怪儿童诮君平世弃政自佳老子知希渠所要人间对面九疑峯未许冲风鼓无窍

物贵日甚

自從为關以为暴物价何止相倍蓰人生衣食为大命今已勦絕无余遗真珠作襦锦作袴白玉为饭金为糜苍天苍天此何人遭此大疾谁能医无食吾欲食其肉无衣吾欲寝其皮谁能为我覆八溟一洗世界无疮痍丝麻粪土被天下菽粟水火燭民饥风后力牧不可起吾輩碌碌安能追

次韵徐景說贈安象祖

千仞岗头孤凤飞翰林万族惊且啼桐江得树一栖息足以慰我饥渴思飘然径度烂柯去再仪天陞来何时子今追逐一何遠所期不负平生知独慙托我非所任泌水洋洋难疗饥夜光明月要人识而我何知和与隋端人择友必有取定交从此夫何疑长安綠槐十二街五都遊客争奔驰咄哉掉臂不肯住来同圣路乘坚肥嗟余旧学荒已久安能扣击探机世事举目已可知淹留此土终何为苕谿一曲挽归梦与子共赋临流诗

次韵刘養源见寄

咨余暮齿依蒲柳见君无门慚九九小臣久去孔鸾庭太史曾供牛马走忽闻妖彗出不虞天子惊惶下手书孤忠泣血悼危乱有诏不应心何如一阳剥尽羣陰长四海八荒俱痛痒充庭溢序岂无人借问何人真挺鯁老夫空忆陈王前语慙惟惧人抄传擒贼擒王真古语肯拚鸡肋安尊拳相如虽乏三千牍自谓一言能报国此腰堪斧尚不辞更问世间闲祸福但愁蠖濩宸居深司马门遠终浮湛【原注或谓予封事不得达】德音秩秩犹在耳罪言杀士俄相寻权威当朝底时节不见朱云攀檻折弗拚要处箴膏肓毛举万端何屑屑友鹤仙人当暮秋诗来开卷风飈飈句法森严何所自丈夫冠冕垂前旒淡交如君真耐久何不来同一杯酒期君

他日孟浩然男儿事业无穷年

次韵王深道见寄

社鼙屋防非难攻我力如绵不能动生令墨吏弥奋张气涌如山高寵從天王圣明侔日月跂望丹青眦防裂孤忠耿耿达无路独抱幽香分芜絕诸偷恣睢方摇尾忽报台州随逝水人不代天天代人造物明威乃如此嗟予粗不愧守官繫有承君镌志完

次韵张防见寄

掀髯一笑天地间八代文衰谁为起夷陵丹砂空自光中山老 不可使一从麦秀获麟台二千余载无文字谪仙岂无希圣心谁其起子二三子张君忽赠白云句墨妙笔精真可喜宗师奇涩费吟嚙三读方能得其意奋髯苍防色无冤吐气黑蛟云可致恨子初筵我旅酬妙处安能为標指惧遭掎摭不哦诗畏触祸刑寧作史翰林主人子墨卿昔也同盟今趣异不见当年圣德诗犹被他人呼怪鬼慙君问我乞余丸安得锦囊出懷里丈夫蓋棺事始定斯文固应付后死试问涪翁余七言松苓臭味固相似

西湖竞渡遊人有蹂踐之厄

杭州城西二月八湖上处处笙歌发行都士女出如云骅骝塞路车聯轳龙舟竞渡数千艘红旗綠棹纷相戛有似昆明水战时石鯨秋风动鳞甲抽钗脱钏解佩环匝岸遊人争赏设平章家住葛山下丽服明妆四罗列唤船催入里湖来金钱百万标竿揭倾湖至人相登万众崩騰遭踏杀府门一旦尸如山生者呻吟肱髀折西湖自是天下景何况遨头古今压一时死者何足道且得嘉话传千叶諫官御史门下士九重天高谁敢說溪翁聊尔作歌謠谨勿传抄取黥刑

三丽人行【有序】

杜子美作丽人行讥丞相杨国忠也国忠贵妃之兄近事有相似者以苏公有续丽人行故作三丽人行

丽人列屋芙蓉城烟红露綠千娉婷朝回迎笑拥前后忽遭唾弃嫌羶腥汝曹面作死灰色争似平康坊里人连眉倒晕双顰鬓临春璧月阳台云西湖喧天歌鼓鬧列坐长筵来狎賓紫衣中使天上至黄封百榼罗前庭海螯江柱堆 崦猩唇熊白争鲜新防哉何曾食万钱陋矣杨家送八珍酒酣自有娱客具非丝非竹非歌声呼卢一掷数百万刘毅酸寒何足陈此时相公眼生纈平康一笑华堂春鸡鸣钟动却归去相公手自与金银恩纏爱结无与比何意一朝遭怒嗔偶緣病起思破闷亟遣花使传丁寧谁知青鸟不解事还报從人嬉水亭立驱百骑猝而至判司姓贾如弟兄同遊七吏俱簿錄一日得钱千万缗大书明梏令湖曲苏堤扫迹无蹄轮风流宰相推第一但恐稷契羞同伦腥风霎霎塞宇宙万年遗臭何时泯要当壮士为一洗我

老无力覆八溟

次韵周子车喜雨

平生报国无才力日夜只祈天雨粟诎今歲事少差池怪证谁云一而足入春郡国多苦早起
瞻四方何蹙蹙陋邦愚守介其间造物私之意何笃桑蚕有歲麦有秋十里欣欣人足欲尔来
勤雨才浹旬日日眼穿云石触哀哉赤子命如线亟吁苍穹求迓续果然马上天瓢翻谁谓龙
公慳一掬吾侪所学自孔氏颇信此身兼位育真能办得一寸心勺水固知焦可沃君诗信美
嫌太夸只恐流传辜自速八荒延首待甘霖傳說谁其踵芳躅

次韵雪寒郡中糴米养源有赋

父兮儿饥母兮寒餅中无粟囊无钱天公何不知人苦狞风裂肤雪塞户我来日月虽未多舛
令已干天譴呵医疮眼下尚无药更有妙诀瘳沉痾防贫为富非不窘坐视沟瘠吾何忍长民
要识天之天此事前人固加谨我仓我庾虽甚枵且须倾空苏瘵凋慙无大德与汝曹聊以小
惠为寬条何时公私俱露积慰我片片心事赤圩丰食可接青黄盜弭丸无探赤白老夫借手
得归田免讥取禾三百防君诗太夸不可传吾恐闻者讥贪天

莫恃势行

夜灯读书史慄然抚予胷竒哉天下士英雄见略同子长叹息芋家事谓势矜人将有穷谪仙
作诗戒鯨鯢亦云勿恃风涛之势如白龙乃知世上夸毗子控抔外物终成空君不见寡大夫
围初得楚章华台前汗成雨郑田周鼎哆然求齐桓晋文何足数一朝乾谿万众溃饥卧独枕
涓人股君不见夫差称霸防黄池诸侯不敢捫眼窥临盟争长莫敢拒吴竟为先晋次之中原
甫归败笠泽甬东百家恹可悲君不见赵家主父尤雄强吞灭代北如驱羊诈称使者入秦地
威风惊倒秦昭王暮年立子一失计探鵲沙丘终饿亡诵诗读史余更披金匱书章蔡与秦韩
往事尤可吁惇欲族诛元祐人荐福鑱碑立诸京绍兴五十三家桧掌股庆元五十九人侂牙
跟章蔡投荒韩授首秦亦奄奄泉下人当时气势动山岳如今一窖寒灰尘后来视今犹视昔
哀哉踵路双辘倾三书读罢灯亦暗齁齁一枕东方明

次韵赵郎中【与豈】泛舟之作

危楼杰出清苕浒一眺苍然尽平楚倚栏兴尽兰桡举时聽长年作吴语赵盾当权人共苦白
苹清风渺何处人生得闲价无伍天遣吾侪共休汝公孙爱客茶屡煮风味端能继桑苎晚凉
一卮荐菰黍清唱时闻采莲女纪兹胜践须燕许好与留题镇烟屿吾诗老去浑漫与不畏传
抄殫万楮

编局

舜为天子臯为士瞽瞍杀人执而已從來三尺天下平析律二端真可鄙近闻编局荡巢穴尽取防輩尸诸市布衣韦带三十余笞配黥流动千里独遗太学四五士但以奸京法从事秦相不重褒衣人曷为忠恕而已矣乃知能掉三寸舌极恶穷凶犹可恃大理得臯陶汝曹应颺泚

官田行

噫呼嘻乐哉咸淳三年之秋大有年近自浙河东西江与淮遠及七闽二广连四川黄云一望千万里莫辨东西南北阡陌窳污邪满沟塍秧马折轴担頽肩天公更好事十日不打雨三边不动尘穠人更何虑自从田归官百姓糟糠难况复连年苦饥饉草根木实为珍餐嵯峨殍骨横千里待得今年能者防只道伸眉得一笑酒肉淋漓浑舍喜谁知一粒不入肠总是公家主家米夜闻东家邻偃仰啼孤婢我问汝为谁答云无食无儿穷妇人今年公田分司官吏恶那有遗秉滞穗霑饥贫大家京坻那复有惜米如珠藏在困我闻唐家天子即位当四年天下斗米惟三钱我皇不减贞观主相公亦如房杜贤奈何米价百倍逾贞观此病岂得无其源呜呼噫嘻我知之矣自从买公田丰年亦防年此何人哉悠悠苍天更有一事尤堪怪欲说未說心先怕今年处处皆有秋何故天台大水独无一粒收一粒不收犹自可臣水王君火囚此事颇關宗社忧书生守经论白黑无乃将身豺豕投

读陆逵常簿奏篇喜而有赋

老翁關门贪睡味朝廷近事到耳疎朝廷忽收故旧信得此痛哭流涕书书中所道果何事人心天命關机枢昔无叛民今已起赤子至此谁之辜公田下损而上益楮法子废而母孤三尺孤童尽知得谁能暴虎编其须朝阳一鸣百聵醒幸哉仅有而絕无三后在天甚神圣佑此一脉皇基扶我非庆厯石守道聊题数语昭羣愚

和刘养源

日景何须土圭测腊尽熙熙好春色明眉翠柳弄精神调舌珍禽破岑寂叠嶂融融迟日丽双溪涣涣层冰释行看骑簇昭亭晓还闻猿啸高斋夕宛陵山泽纷纒余尔来憔悴緣急符安得春风百万斛为散和气还郊墟北帝回车已浸遠东皇布令应潜孚原畴苏醒天雨玉草木滋润渊生珠我诗背城犹借一吏气暂扫因元日预忧簿领还压头不得时陪竹林七茗溪苇间舟延緣白鱼朱橘不论钱幽栖已入五更梦早春顾渚何时煎老师谨勿先抽单苦嫌道院颺颺寒吟编未载两轂鯨莫惜娉婷珠一斛

读梅福传有感【原注因皇子薨而作】

君不见绥和天子在御世五春画堂甲观寂寂空无人岂无壮髮类元帝奈燕飞来啄皇孙三星屡暗紫宫里羣臣默默谁扣阁忽闻县道上急变乃是南昌梅子真书言愿蚤建三统以孔子后上继殷存人自立乃周武壅人自塞为亡秦陛下若欲保继嗣成汤不祀宜留神子真先曾挂王凤言不见省徒报闻小臣读史每流涕福矜异代犹淳淳而况交柯紫荆树东枝顛顛

西枝荣有能建此第一义本支百世何足云我今那复效梅叟聊欲全生吴市门

记二首儿四日雷二异

咸淳七年正二月天灾人异何稠叠细推厥咎端有繇孤臣未言先泣血日当丙子月当寅【原注正月十二日】湖州昆山有妖孽曹家产子威杀人二首一身连骨节左首似爹右似娘浑舍惊走趾欲折里胥不敢上其事一州喧喧腾颊舌从来天子天下首二首之占何待說我闻唐家仪凤年的证端为今日设泾州之民有生儿异干同躯不容裂是时武氏乘其夫唐祚中微殆将灭圣朝家法与唐异四星在天循轨辙咎在君阳非太陰娼羿虽殊祸俱烈人妖示变未三旬二月天灾来不辍粤从己亥至壬寅据厯雷声未当发胡为砰訇震天鼓四日四夜声不絕上天威怒端有意要使吾君用刚决夏竦奸邪致天变仁皇感悟真明哲只凭霹雳一声雷扫去有同汤沃雪后来高庙遵故典汤相罢归同一诀奈何灾异过两朝犹复留此大饕餮二首之儿四日雷占虽不同应无别作诗防入五行传谨勿流传取剗剗

鸡祸诗

君不见西汉初永光年当时鸡变祸连延冠距名将尊已成坐令戚里倾中天那知千五百年后咸淳之歲为续弦黑鸡两翅生五距食輒伤人万口传家鸡尽缚向市卖美味不敢登盘筵皆云黑鸡乃癸酉十二相属符昭然生不矜他独于翅盖言羽翼爪距全我欲攀龙报天公无路可到明光宫安得尸乡祝鸡翁为我用术禳其防天子九九八十一万歲免使真人白水还飞龙

冬大雷电

方冬十月天灾蒸雷公吼怒声凭凭投壶玉女忽大笑晦明倏烁来相乘天方收声地藏蛰激怒岂为陰所陵圆苍寓意端有在要使强臣生战兢强臣闻之但一笑小儿怖我终何能白鸡巨浸九龄亚青防妖星千道棱我犹视尔为戯剧此雷何啻虫薨薨圣君小变亦知惧奸臣大异那能惩寄语天公停此小伎俩只须一声霹雳王茂宏

孤愤吟四十韵【原注效子美对属体】

岷峨老人白头哭宇宙频年生意蹙自从解绶逖遁逃日望君王戒危辱幡然尽改乱亡事斩新为辑和平福丛祠猎去嗥夜狐逖岳收取鸣阳族閤籍惟供永巷埽梁总向高阁束上方月进絕前蹊污吏日攘行显侈赋租时为率土蠲恩泽尤当近畿足圣心悔祸诚勇猛天命何忧难迓续老人静中揩眼看时事转觉令心寒旄头妖彗久不出黔首剜肉殊未完炎然防渠气脉壮莆葵奸党根株盘小臣乘间肆邪论【原注陈伯玉】众正盈庭徒坐观北衙无人素为地南徼何路能通天【原注伯玉时谪】首血淋漓谁困邓头子勾追空忆韩仪舜鸣周九苞凤溢序盈庭五彩鸾若为千载遭圣代不肯一喉惊朝端得非尽善遇尧舜毋庸卖直同箕干我闻屋漏知在下君欲箸筹烦暂借尺籍无粮创市田告身易醉空酬价膏腴已被公家夺

硤瘠复遭奸佃吓积庾如京宁复得羸觜盈沟谁为嘅蚩尤兵革自久遠新莽王田徒扰害哀鸿惨淡集中泽饥虎咆哮行旷野柯山一関犹未平茗水三贪尤可怕罔民白撰肯蠲除括税红由恣姑囁城门口嗅严酒防民屋寸量甚间架瘠人封已信可诛剥下媚上当何如崔烈为公近日有刘毅答诏今时无【原注毅言西园卖爵事】民间已食乌昧草【原注事出长编】天上犹积琼林储小人长国但牟利大学生财谁读书民贫盗起已有兆内敕外宁犹贡谀纷纷谄子谅无责挺挺诸贤何不图芳草为萧晚节壞嘉橘成枳中年渝虞庭盛际枉者直周室衰时哲亦愚漳濱病叟愁谁语杜曲诗翁恍如晤最怜稷契许身愚岂谓陰何用心苦每篇必寓忧世懷直笔寧愁当国忤法律森严信殊絶对属始终无齟齬嗟予衰老才力弱稽首名贤晨夕慕忧来援笔偶成章力戒负囊母辄露

送庸斋赴召

宗臣一去今三年玉堂诏许还坡仙党魁久屈再徵用识与不识皆欢顏先生出处固有道诸公进說徒啾喧或云时事正孔棘百万生灵皆倒悬公卿唯阿固权位阉戚盘互拏金钱三垂蹙蹙迫军垒万口瞀瞀愁实田南交伺衅谋幹腹东海遗患方聚船奈何揖逊救焚溺同姓体国宁其然或云大老世模楷晚节要同金石坚不闻鸣犊反潜圣况复白驹遗众贤济川必待烝徒楫倾否亦资茅茹连试看醉翁门下士当今谁者居清聯角巾支杖亟还里覽辉翔集毋轻前我当静虑为折 咄此二议何其偏卦爻时义各有当圣贤出处无非天五真应二泰可致四不求初屯岂亨要知君相诚与否卓识谅已穷防先苟能举国聽夫子虽不俟驾何尤焉严风吹衣落闽土幸与盟主相周旋酒边抵掌谈世事爱君忧国固拳拳鸿飞遵渚望不及中夜起坐徒烦煎心乎爱矣思有助斐然狂简成兹篇【原注庸齐后辞不赴】

闲中读书次第

紫阳礼编甫尽卷亟偿通典平生愿增损温公鉴目成【原注通鉴目录有详有畧】要把二岩书贯穿【原注巽岩长编终徽宗秀嵩要録惟高宗一朝欲合为一】夜灯覽彻六一文眉山鉅集思重见七书卷帙二千余加我三年当阅徧尔来两目渐眇昏一 一手钞宁敢倦固知衰頹力不胜其奈嗜好顽难变又恐贪多或溺心闭閣时烧香一篆

园中读书

南楼幽帘虽粗适犹嫌尘务妨闲逸读书老圃四无人啼鸟落花春寂寂试垂修绠汲义泉更把长鑱斲 窟已无俗物败人意犹有睡魔入吾室且须时擎看山脰不妨暂着穿花屐君平身世两相弃韩子老大百无益但愿残生更防年了我床头二三防

耻堂存稿卷八

宋 高斯得 撰

五言律

次韵养源避暑西湖

墙拥千竿竹帘萦一穗香避喧情散朗懷旧意悲凉小簟琉璃色新醅琥珀光夢回闻剥啄浑欲懒衣裳

次韵戴石屏见寄

霞峤诗人窟夫君独擅場太羹无厚味嘉稷有真香投老安蓬户平生似草堂【原注戴诗颇近子美】遥知道机熟尊酒百忧忘

晚秋

飒飒晨飈凜萧萧暝色凄拒霜城上下衰柳岸东西老去慵青简忧来俯碧溪饥乌谁教汝故作傍人啼

江夫人挽诗

悲哉金氏志未读涕先零祖统他宗嗣 忧再世丁天矜人一念姑与妇三龄【原注夫人之姑张氏九十七而终夫人九十三而终】幸有孙枝秀翹然防户庭

病起二首

老去增书癖还遭病见磨杜诗能止疟周易解祛魔不得青编伴惟应白日过坐多肤欲痺时起眺清波颡面惊杈出梳头感髮稀鹤饥从自瘦骥老更求肥萧索盘中馔寬长身上衣惟余酒未减兴至羽觞飞

鹤林吴尚书挽诗二首

珠纬躔奎后坤文世载英奇才冠元祐大手擅端平时事虽难并词华略与京自从双鸟寂禁柳谩嚶鸣魁孽奸时论词臣格诏除承明俄罢直光范肯驰书东土淹灵运南州哭仲舒平生丞弼望只此閼高墟

吴叅政渊挽诗三首

造化千年秀皇家数世仁功名光庆祐人物輩干淳萃萃旂常纪睽睽鼎鼎新
愁留天不许国步痛斯频中外逾三纪勤劳备百为韩公饱经济杜杞困驱驰
风静千屯祲春回数路饥江淮与襄汉何地不丰碑念昔先君子慈恩托下陈
孤虽愿识李御竟无因赏遇肝肠照书题骨肉亲数行知己泪西望防沾巾

题林屋洞天

将返鸱夷棹聊观古洞天苍崖还谷口圓峤结湖壖大药惭无质还丹莫浪传
具区如弱水重到定何年

陈枢密【宗礼】挽诗二首

读公淳寶防风节一何奇凜凜戮丁刃堂堂伐郑师良医渠不使倾厦故难支
不见陈攻蔡当年亦右司【原注谓陈莹中宗礼去国亦右司】

直道终难恃平生一险夷蛮谿憔悴日公府笑谈时来识鲁山面空防有道碑
雉膏殊未食付与宁馨儿

书事四首

晨炊出避难中夜尚伤弓赤地眠枯结青天入短蓬可怜穷白叟所至聚黄童
老耳虽多聩时闻话相公坎凜乾坤志苍茫宇宙身十年犹铍翮尺泽岂游鳞
汗简时鑽蠹斯文企获麟但忧来日少沧海濶无津不必繙金匱何须校石渠
科条唐代典刀尺汉人书【原注予修通典之外有汉刀尺论西汉得失论二十四卷
兵火失之】后世应知我时人莫起予祈天无厚望更予十龄余

两月甯荆棘愁生祇自怜屈盘茅屋底擎蹠野人前尽室逾百指看囊无一钱
长安望不见何日静戈鋌

耽书

年来得奇疾彷彿似书淫二史番休读【原注史记汉书周而复始】三诗夢觉吟
【原注李杜蘓诗枕间更诵】少时轻寸晷老去惜分陰只恐前生是蓬山阁上蟬

端午小饮分韵得身字

此节知何节悲欢发兴新懷沙吊沉塚高戸庆长身豪气今安在忠魂死不泯
咏余增感慨命酒慰沾巾

立春日集杜句

春日垂霜鬓江村乱水中偷生长避地愁坐正书空乞米烦佳客应门试小童布衾冷如鐵长夜岂堪终早行石上水泥泞苦相牵兵甲浮生困艰辛众目怜囊空罄金错米尽折花钿更有伤心处君臣半壁天

五言长律

存斋牟端明挽诗

硕德千人表高风一世钦师承文靖正识防秀巖深奥学方前古雄文独擅今史筵新发轫儒馆力抽簪萧艾俄当路蘅兰复出林螭头恩舄奕豹尾步嵌崱斯脰思全玉围腰肯待金绶甘辞若若防喜对森森孽火遭千劫防波沸百壬然脐机奔巧【原注董宋臣】防眼计谋陰【原注丁大全】诬诋渊 监成罽宠命临一麾犹偃蹇三节又侵寻听履星辰近司纶雨露湛世方期汲直人已感迟任披腹平生节攀髯晚歲心幅巾朝第就遗服暮庭廡书殿荣封塚台閤在岑鹤山初共被苔水晚同襟感旧须成雪懷人涕作霖元成负文采端可嗣徽音

邹枢密【应龙】挽诗

有伟伦魁彦风标九牧倾直声同日揭峻节与霜明贺旅羞权 佳兵折敌萌一麾人共惜再入道弥贞专对思尊主涂归首正名终然踈汲黯谁复挽阳城访落当元祀干旄并两英【原注庆元元年与真西山魏鹤山同召】驂车方税鞅局面已翻枰不憚笈天苦坚留出昼行一言婴虎怒八载与鸥盟【原注鹤山补外上防留行并得罪】改瑟新元化持枢賛国成咎言方汹涌悟主独和平南谷撩归夢东藩薄宦情寒花馨晚节潜潁谢浮荣落落灵光殿堂堂董相莹国人歌辍杵志士泪綠纓 也常尊孟嗟哉未识荆易名如得与犹足慰平生

读天台侍郎黄公宜神道碑

昔纂宁宗纪名臣叹寂寥鉅奸方枋国多士谩盈朝快读黄公传如闻舜代韶尽言醒众瞶独立耸清标辨枉全张猛持身简豎刁要途方凜凜归梦已摇摇防广还家勇義之入海遥寒花矜晚节老桧傲霜朝迁史虽犹缺邕碑亦孔昭咨予无健笔魂去若为招

奏院豫七弟挽诗

瑟瓚天资美洪枢地胄华安恬羞善宦孝谨克承家籀学耽奇古文房好静嘉顏瓢空不继原粟防无涯庭径长生草山园妙识花公门捐造请内典却纷拏留邸空陈迹分麾付一嗟【原注屡得郡皆不赴】阶兰芳欲尽池草句谁夸甚欲号森栢其如叹系 遥将万行泪洒向夕阳斜

挽亡弟豫九制参诗

山园有佳树生处本同枝客土何年异孤根两处移西栽种岭下东植雪溪湄君壮方逢世吾衰从忤时丘园甘寂寞门户倚扶持乘障能名著参筹婉画奇平生境虽顺末路数终奇屡厄泉鸣暴仍遭马蹏危【原注马光祖观望拒其入幕】客魂翔寓里旅櫟出京师鴈泽羈孤影鸰原踣躅悲殓予暮光景恤汝众孤临穴万行泪九原知不知

七言律

谿亭春日二首

嚶嚶春哢沸青郊老鹤翛然独在臯澹沲和风眠五柳冲融暖日醉三桃尽输乐事归妍唱肯把牢愁寄续骚想得旧游时入梦西堂春草未应薶

岂不懷归蜀道难故来谿上税浮骖新诗功次日迂九潜圣仪刑昼接三牕竹有情陪素隐园花无頼恣红酣要将云淡风轻句参请宗门老晦庵

送胡吏部颢赴阙

枌榆陰里植甘棠民坐春风吏履霜治粟从持肤使节握兰归喷望郎香去思应共湘江永来谗谁云周道长拖玉腰金君不羡令名姱节防流芳

郎省分携恰五朞相逢一笑楚江碕钓鱼山下人方到回鴈头客已归夜雨未厌挥麈柄春风无奈趣鞍韉临岐但祝加餐饭人物如今角宿稀

建宁府鹿鸣宴诗

鹤书夜下建谿南防尽乡英万口谈帝阙伫听胪唱九賓筵试咏鹿鸣三身名虽待文章显气质须从道义涵海内如今人物掀天事业要奇男

题张志山留稿

一眼高悬四海空评诗谁出杜陵翁紫鸾翠驳真难并翡翠鲸鱼定孰雄门外飞来清婉句坛中报起寂寥风锦囊已逐春风去何日花前一醉同

劝农有感三首

井卦分明说劳农周人田制寓其中但令此念纯无已可使吾民养不穷数豆荒餐延野老一篇腐语诲村童尔忱不属知何补漫道天公靳屡豊

三代兴厖法已精田官众建日淳勤一年一度情何简于县于州责孰分爱礼存羊斯仅可卖刀买犊匪攸闻周官千载何曾试我欲重拈静楚氛

衍漾春郊徧野畴不堪回首劔南州劝农官吏浑冠鹖力穡丁夫总带牛苦欲如叩嗟未得自怜适越竟何求春风万斛浓于酒一与畸人荡许愁

次韵赵庸斋贺除闽漕

方向江湖拜散人天王明圣尚哀臣牵舟未得还三峡乘传何堪使七闽作牧幸逢青眼旧论交宁叹白头新却愁未税周原鞅公已催归上要津

庸斋再赋予亦再和

苕滨衰白一羈人五玷皇华遣使臣已自无恩及南楚那能有福散东闽预忧刺史声名减不称君侯佳句新踏偏山川成底事徒令沮溺笑知津

次韵养源双溪阁野眺

雨余人不眺寒城平楚遥知一望清老杜颇慵防白谷大王惟爱寫黄庭剪裁花柳春刀尺错綜江山帝纬经终待幅巾同遠望逃他天械与天刑

送不浮赴沿江制参二首

地徧难颁虎竹分不妨六度作参卿九江日落回君首三树风吹动我情此别不堪分袂苦何时重聽对床声到官休道无来使湓浦双鱼自可烹

餅中储粟苦无多百口张颐剧雁鹅王粲依刘宁得已严公待甫定如何且须省却痴儿事只好长为醉后歌 熟归来再相聚阿兄犹自种阳坡

次韵上饶温淳投赠

从来箕斗只虚名石火光中了一生寂寞九京薤子政荒凉三径老渊明我方遯世人争弃君独忧时意未平多谢相逢便如故次山词气浩纵横【原注来诗忆赵庸齐】

送饶漕

已催四牡使駉归江汉旋歌命召诗借问仪庭集鸾鳳何如当道卧熊羆柳迎士行成陰密楼得元规发兴奇少待邊亭永清晏却归簪笔侍龙墀

次韵戴石屏见简二首

采玉探珠遍九围先容分不到离奇委心自信天行止用世定慙道觉知且可谩持东海钓终期不负北山移杜陵虽老心犹壮盍与同寻蜀相祠

入东颇亦交名胜安道闻孙更崛奇明月清风能我共高山流水只君知遥怜把酒懷人处正是登楼望远时安得抽簪投海岸相从朗诵快心诗【原注戴有快心诗数十章】

送史深之入蜀

我读江湖夜雨编西风搔首一凄然如何经济二三防仅见琳琅千万篇小隐安能老丹峤壮懷犹欲上青天此行若与涪翁遇定把诗家古印传

次韵施秀才新楼有赋

白鹤山中熊豹姿可怜营窟傍苕溪无家那得还三蜀寄迹堪嗤傳一齐共詫閣能扪斗柄谁知堂不爱櫳题厦成人已辞骚国何日同登醉似泥

饮牡丹

尚记年时醉我賔抽簪起舞坐生春谁呼七七逡巡手重现三三梦幻身独乐园中老居士沉香亭北谪仙人吾今望此如蜂蚁莫恠名花向我颦

夜坐有感

自叹吾生行且休谁能长抱畏涂忧三番自取刳肠害百链多成绕指柔鞭鳳咎鸾劳梦想鬪鸡走狗好沉浮从今投劾归渔隐手掬清波荡许愁

次韵赵庸斋见寄

人在南山第防重采薇端可继高踪褰衣辟世锄三径闭户求仁印五 周室如何废常棣楚人犹听夔夫容大书元祐党魁传今代岂无人姓龚

邓侍郎再和予亦再荅

烟雨凄迷主簿 伤心蕙帐十年空梦魂吴蜀千山隔归路湘江一水通庄舄相防均是客虞卿何事独嗟穷天涯邂逅诚多幸许挈诗囊入社中

春日偶成

七年高卧雪溪滨阅尽诸公上要津共恠朝无书一字宁知项有铁千觔渊明肯仕义熙世刘老要完元祐人四壁新堂基已就从今饱挹洞庭春

七言絕句

蜀锦亭

故国名花复不同景阳机里织春风莫将丽质惊丹卉只把孤根托化工

孤愤吟十三首【原注甲戌十一月以后邊事日急作北以纪一时之事】

桧 当权十五年始终只被一私缠人心失尽天心怒燎火炎炎故不然【原注前汉成纪叙传炎炎燎火亦允不炆】

金缯私许北方盟君父前头却隐情今日祸胎从此始罪浮孽桧与权京

先帝方归盛德园龙輶半夜浙江邊孤臣泣血无他请愿把奸臣诉九天

军功阁束万人多兵部门前雀可罗悍将武夫心失尽可知弃甲与投戈

国家元气是人材稍露光芒尽力摧今日举朝皆妇女邦衡此语亦诚哉

扫除学法防诸生精锐销磨直可坑乞斩三奸亦人尔汝曹何忍负斋羹

无罪无辜窜逐人防经大霈不霈恩更将改正张罗网结尽千千万万冤

疆买民田自噬肤大家破尽为催租防多怨气冲霄汉天欲无诛可得乎

督帐行趋建业东壮哉迎敌气如虹劝君猛拾一腔血莫学檀公误乃翁

乘桴颺浩元无防进蹕丰公妙達权宁死老身终不去太皇此语可回天

覆按山凌挈累行金多季子橐賫轻殿中御史尤堪戮尽室逃归骇一城【原注文及翁陈过】

囊封癸酉罄愚惓第一亲征次守江啼得血流无用处自怜弱步要丰扛

阜录新书幸已成名山藏去复传人母令十载编摩苦竟与家书共厄秦

闻杨元极去国

倾厦难将一木支微垣累防亦何为鳳凰本自翔千仞不待区区夺我池

题爱梅亭

生世梅花是故知相逢不负歲寒期自从一防梢头白防到青陰弄实时

题同濂阁

霁月光风洒落人与君同调故怜君不须叹息知音少后世岂无扬子云

乐语

台州宴包知府乐语

铜竹分符霞峤欣逢于召芟金兰缔好星屏幸踵于萧规联翩振鹭之偕来先后淶之孔迓宜开华宴用庆康侯恭惟某官麻岭名流象山法嗣絕人问学汉侍中家法犹存经世才猷包孝肃风声故在屡起南涯而佐幕亟登西序以影纓弄月台巘分风帝里已富外庸之馭歷合躋中禁之班联顾方涉笔于麟宗使屈凝香于燕寝盖在庭莫不举遂而弄印无以易尧致烦刘梦得之重来为继孙兴公之高咏暂对五峯双阙行膺一札十行自太守数歲而三公此吾州近年之故事某官偶因易地初起佐州已忻密接于英尘更获亲陪于坐啸千里江山如有喜一番守相总更新试心事之共论慰邦人之企瞩金壶缓箭翠管鸣筵今宵琼玉楼邊莫惜清樽共醉来歲丝纶阁下好将佳话重拈某等濫綴伶工获趋台庑敢陈韵语上佐欢惊

使君五马日邊来犹是当年逸驥才汉竹光荣知妙简召棠蔽芾喜重栽试听孝肃传新令竚防文清拜首台盛事难逢须烂醉楼头玉漏莫相催

宴建宁知府赵尚书乐语【原注时为福建漕】

北门学士从镇藩维西塞山人新乘使传共处建安之都防均为元祐之党人宜秩华筵以旌盛事恭惟某官司马九分来地位欧阳数百载天人铁脊擎空善类倚为合脉丹心贯日天子识其精忠拳拳八士之荐扬凜凜百壬之排斥使得居周公之位有大设施则回视更生之流一何溟涬涂归不遂勇退无难老龙方卧于洛波五马催临于建水受防百万再生鱼腹之余负笈三千聳听虎皮之讲共惜汉宗臣之从去行催周大老之来归某本践归田还来问俗尚记希文之去国曾陪师鲁之留行及逢李稷之登车又际潞公之出镇志同方而道同术声相应而气相求今宵一笑交欢此防百年防见黄花晚节相期不改于真香青竹芳名庶可共传于他日某等载陈谐语以洽好盟

本意苕溪老钓蓬乘轺来访玉仙翁并游元自从迂叟将漕何妨拜潞公宿世神交双劔合平生心事一樽同乾坤整顿须公等夜掣铃绦紫禁风

建宁府宴徐意一知院乐语【原注时权建守】

元臣就第共钦爵齿德之尊三小国防公敢献伯子男之礼六要举绿野堂之盛事须烦紫霞洲之主人乃卜芳辰肆开华宴恭惟某官地位臯防稷契声名杜富范韩重朝廷如周庙之黄钟主公道若汉军之赤帜七年政地一念君天渭相擅朝最憚沂公之正直荆人相国深嫌清献之刚方进力争于凝旒负展之前退显斥于合席同堂之际岂不知以身察察将射影之难逃独奈何执我仇仇欲褰裳而不可殆萧兰之并植终玉石之俱焚陆贄延龄功何难辨韩非老子传岂雷同投簪与赤松子以并游举杯对武夷君而无愧故乡昼锦不妨暂乐于闲身圣主宵衣竚见亟还于大老某偶来驾牡曾是登龙耳倾英袞之相周目骇深衣之还洛虽则为国家而甚惜却欣观道德以亲承属暂管于铜符爰亟张于绮席丹山碧水佳气方新白酒黄花萧辰已近试展醉翁之怀抱庶观退傅之风流今日午桥喜胜游之得与他年东阁好佳话之重拈上佐欢惊可无韵语幅巾支杖勇还乡昨夜方开昼锦堂司马高风倾国慕韩公晚节袭人香已忻绿野脩初服好为丹山酌一觴卜夜莫嫌秋漏永仙翁鹤骨尽康强